

Tuhun vaha nacaŋhyí Lucas sahá ña naja na apóstol

Nasahan Jesús tuhun a quixi ínima yii Ndióxi

¹ Jihna sa nacaŋhyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña naja Jesús ta cáhan ndihi a sahá ña najánaŋa mé á tá nacasáhá cajú chúun a ² ta janda tá nandaa cuahan indiví. Tá nasahin a ñuyívi yóho ta cámani cuhun a indiví já naxi Jesús uxu ivi dataa cacuu da apóstol ña ná cajú chúun na cuéntá mé á. Ta naja ínima yii Ndióxi ña ná cuu jánaŋa Jesús nuú na cán ña ndítahan nu ná cajú na. ³ Ta tá sa naxihí Jesús ta nanditacu tucu a já naxica nuu a ñuyívi yóho tixi ivi jícó quivi. Ta nanaŋa mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaŋa nu ná ña cúní Ndióxi cacomí a cuéntá sahá ñayivi.

⁴ Tá cámani ndaa Jesús cuhun a indiví já nasahin a xihín na apóstol já nasahnda mé á chuun nu ná já cáchí a já xihin ná:

—Xíní ñúhú candati ndó ñuu Jerusalén yóho anda quiahva xinu ínima yii Ndióxi cañuhu a ini ínima ndo. Jáchi nasahan tátá i tuhun a nu ndo ña quixi ínima yii mé á ndacaan ini ínima ndo ña cán quea najánaŋa i ndohó ña naxi mé á. ⁵ Mé a ndaa najácandúta Juan ñayivi xihín ticuifí joo tixi chá quivi jándicutú Ndióxi ndohó xihin ínima yii mé á —cáchí Jesús xihin ná.

Tá nandaa Jesús cuahan indiví

⁶ Ta ndaja coo tá nataca na cán xihin Jesús já nacasáhá ndaca tuhún na mé á já cáchí na já xihin á:

—Jesús, xitoho nde, á viti quéa quiahva ndó ñamaní nuú nde, na Israel cacomí nde cuéntá saha mé nde já ná a cacomí ga gobierno ñuu Roma cuéntá sahá nde —nacachi na xihin á.

⁷ Anda já nanducú ñehe Jesús tuhun nu ná já nacachi a já:

—Co ndítahan toho nu ndóhó candaa ini ndó ndá quivi caja Ndióxi, tátá yo ña jan. Jáchi in túhún mé á cuití va quéa xini a ndá quivi yaha ña sáhdá mé á coo. ⁸ Joo ndítahan nu ndó candati ndó yóho anda quiahva ná quixi ínimá yí Ndióxi cañuhu a ini ndó. Já ná nduu ndeé ini ndó ña ná cuu jánaħa ndó nuú ñayivi sahá i. Anda já ndítahan nu mé ndó caħan ndó saħa i ñuu Jerusalén yóho xihin estado Judea xihin estado Samaria. Anda já quee ndó cuħun ndó cuħá ñuu xicá ní cúu ñuyiví jánaħa ndó nuú ñayivi cán saħa mí i —nacachi Jesús xihin ná.

⁹ Tá nandihí nacahan Jesús ña yóho xihin ná ta nani sándehe cáxi na cán nu Jesús ndíta na já nandaa cuħan indiví. Já naxinu in vico nachijahvi ñahá a chí coo naxini ga na mé á. ¹⁰ Ta nani ndíta na cán sándehe na nuú nandaa Jesús cuħan indiví já nandicoto nihni na ta sa ndíta ivi ta ndíxi jahmá yaa jín ná. ¹¹ Já nacachi da já xihin ná:

—Taa Galilea, ndávaha sándehe ndó indiví nuú nandaa Jesús cuħan. Jáchi tá quiahva naxini ndó nandindita cuħan indiví quiahva já cuni tucu ndó a ndicó coo tucu a ñuyiví yóho —nacachi ndíví da cán xihin ná.

Nacaxi na Matías caja da chuun ña najándacoo Judas

¹² Tá nandihí nandaa Jesús cuħan indiví já naquee na apóstol yucu naní yitó olivo cán já nandicó coo na ñuu Jerusalén. Ta mé yucu cán cándo a tátuhun in kilómetro jatá ñuu Jerusalén. ¹³ Tá naxinu coo na ñuu Jerusalén cán já nandaa na vehe cánúu jicó jáchi mé vehe cán nasanduu tóo na. Tóco ndihí na nasanduu cán nasacuu

Pedro xihin Jacobo xihin Juan xihin Andrés xihin Felipe xihin Tomás xihin Bartolomé xihin Mateo xihin Jacobo, da cúu jahyi Alfeo xihin Simón, da naxica cuénta cananista xihin Judas, da cúu ñani Jacobo. ¹⁴ Níi tiempo nasataca ndihuxu in na yóho xihín ñani Jesús xihin María, náná Jesús xihín java ga najihí caca tahví na nu Ndióxi.

¹⁵ Ta ndaja coo in quivi natatacá tathun in ciento oco na cúu cuénta Jesús. Já nacandichi Pedro mahñu na cán ta já nacachi da já xihin ná:

¹⁶ —Candehé ndo, ñani i, na cúu cuénta Jesús. Nasahin tá in nacachi inima yii Ndióxi coo. Jáchí nacaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahan na vecaa. ¹⁷ Mé Judas yóho nasacuu da da naxica xihin yo ta nacaja chúun da cuénta Jesús xihin yo. ¹⁸ Joo najicó tühun da Jesús ta naquehe da jihún sahá ña núu nacaja da. Ta xihín jihún cán naxeen da in ñúhu. Ta tá nandihí já najándicava ndayi da mé dá ta nandata tixi da chí nacana cuyu ndihi xiti da. ¹⁹ Tá ñañehé ñayivi ñuu Jerusalén tuhun ña sa naxihí Judas cán já nacinúu na quivi mé ñúhu naxeen da cán cananí a Acéldama. Mé tuhun cán cúní cachi a yójo nuú naxita nii jáchí cán naxita nii Judas tá naxihí da. ²⁰ Jáchí já cáchí in Salmo ndácaan ini libro yii Ndióxi tá nacahan saha Judas já cáchí a já:

Ná candoo ndáha vehe da,

ta ni in ñayivi ná a canduu ga ini a.

Ta sa mé cán ndácaan inga tucu Salmo ta cáchí a:

Inga tucu da ná ndicojo chuun nasandojo da, cáchí tuhun Ndióxi.

²¹ Anda já nacachi tucu Pedro já xihin ná:

—Taño mí yóho ndúu java na naxica nuu xihin yo tá naxica í xihin Jesús, xitoho í nani nasahin a ñuyiví yóho.

²² Java na yóho nasanduu na xihin yo tá najácandúta Juan

Jesús xihín ticuif ta nasanduu na xihin yo janda quiahva nandaa Jesús cuahan indivi. Ña cán quea ndítahan nu yó caxí in da tañu na yóho já ná caca da xihin yo caxi tuhun da nuú ñayivi ña nanditacu tucu Jesús —nacachi Pedro xihín na cán.

²³ Sahá ña cán quea nacana ivi da tañu ñayivi cán. Anda já nasacu ini na caxi na in da tañu ndíví da. In da nacana na cán nasananí José ta naní tucu da Barsabás ta inga tucu quivi dá nasacuu Justo. Ta da inga cán nasananí Matías.

²⁴ Anda já naxica tahví ndihi na cán nu Ndióxi já nacachi na já:

—Tátá Ndióxi, sa xini ndó ndía cáhvi ini tóco ndihi ñayivi. Ña cán quea caja ndó ñamaní jánaha ndó nuú nde ndá da cúu da sa nacaxi ndó ²⁵ cacuu apóstol ña ná caja da mé chuun ña najándacoo Judas. Mé Judas nacaja da cuachi cáhnu nu ndo ña cán quea viti íin da nu ndítahan nu dá coo da —nacachi na xihin Ndióxi.

²⁶ Anda já nasajiquí na ndá da cuu quee vaha. Naquee vaha Matías chí nandique táhan da xihin na uxu in apóstol cuéntá Jesús cán.

2

Tá nanuu ínimá yii Ndióxi jatá na cúu cuéntá Jesús

¹ Tá naxinu coo quiví coo víco Pentecostés já nanditaca ndihi na cúu cuéntá Jesús ndúu tútú na ini in vehe. ² In cuití naxini johó na in a níhi naquixi a chí indivi. Tá quiahva níhi xícó tachí ndeé quiahva já níhi a naquixi a. Ta já naxini johó ndihi na ndúu coo vehe cán ña. ³ Anda já naxini na in ñaha ña cáa tá quiahva cáa ñuhú ita. Anda já nanditahnda ña nasandójó a jini in in na cán. ⁴ Ta nachutú ndaa ínimá ndihi na cán xihin ínimá yii Ndióxi. Chí nacasáhá nandicahan na tuhun, ña coo nasatiahva na jáchi já nacaja ínimá yii Ndióxi.

⁵ Mé tiempo já ñasanduu java ña Israel, ña cája cáhnu Ndióxi ñuu Jerusalén cán. Mé ña Israel yóho ñaquixi na ndijáá ñuu jatá ñuyíví. ⁶ Tá ñaxini joho ña cán ña níhi xójo cúu cán já ñacasáhá ndítaca na. Joo tá ñaxinu ña nu ndúu ña cúu cuéntá Jesús cán já ñacatóntó ña jáchi ñaxini joho na cáhan ña cúu cuéntá Jesús cán mé tuhun cáhan ña vatí cõ cúu ná ña ñuu na. ⁷ Chí ñacatóntó ndivaha ña cán já ñacasáhá ndítuhún xihin táhan na já cáchi ña já:

—Tóco ndihi ña cúu cuéntá Jesús yóho cúu ná ña ñaquixi estado Galilea. ⁸ Ndá cuéntá quéa cáhan ña tuhun cáhan in in mí. ⁹ Jáchi sa jíin sa jíin ñuu ñaquixi mí. Java í ñaquixi nación Partia ta java í ñaquixi nación Media ta java í ñaquixi nación Elam ta java í ñaquixi nación Mesopotamia ta java í ñaquixi estado Judea ta java í ñaquixi estado Capadocia ta java í ñaquixi estado Ponto ta java í ñaquixi estado Asia ¹⁰ ta java í ñaquixi estado Frigia ta java í ñaquixi estado Panfilia ta java í ñaquixi nación Egipto ta java í ñaquixi ñuu cuéntá Africa, ña xíca chága a juú ga ñuu Cirene. Ta ndúu java ñayivi ñaquixi ñuu Roma yóho. Ta java ña cán cúu ná ña ñaquixi chichi Israel ta java na cõ cúu ná ña ñaquixi chichi Israel joo cája cáhnu na Ndióxi, mé a cája cáhnu mí. ¹¹ Ta sa mé yóho ndúu java ñayivi ñaquixi nación Creta xihin nación Arabia. Ta xini joho ndihí cáhan ña cúu cuéntá Jesús yóho tuhun cáhan in in mí. Ta cáhan ña sahá ñaha xituhún cája Ndióxi xihin ná —cáchi ndihi ña sándehe cán.

¹² Ta chí cõ xini ña ndúu sándehe cán ndía cahán ña sahá ña cúu cuéntá Jesús cán. Jáchi ñacatóntó ndivaha na jandá ndáca tuhún táhan mé ná ndúu na já cáchi ña já:

—Ndía cuni cachi ña cája ña yóho.

¹³ Joo java ña ndúu cán ñacasáhá sácõ ndaa ñahá ña já cáchi ña já:

—Ña xíhi va cúu ña yóho.

Cáhan ndojó Pedro nuú ñayivi

¹⁴ Anda já nacandichi Pedro xihin ndíhuxu in ga na apóstol cán já nacasáhá cáhan cóhó da xihin tóco ndihi na cán já cáhí da já:

—Cuni johu vaha ndó ña cáhan i xihin ndó, ñayivi Israel, na estado Judea xihín ndihi ndó na tóho ndúu ñuu Jerusalén viti. ¹⁵ Mé ndó cáhán ndo ña naxini tóco ndihi ñayivi ndúu yóho. Joo co cúu ná na naxini jáchi jacá caa in naha va queá. ¹⁶ Ña cája na yóho queá nacachi da naní Joel sanahá tá nacahan da xihín ñayivi ña ndítahan coo. Mé da cán cúu da nacachi ña cáhí Ndióxi coo já nacachi da já:

¹⁷ Tá sa nacayati quiví ndihi saha ñuyiví yóho já cáhí Ndióxi já:

“Chindahá i ínima yii mí i cañuhu a ini tóco ndihi ñayivi. Ta tóco ndihi jahyi yii ndo xihín jahyi jíhí ndo caxi tuhun na xihin ndó tuhun cahan i xihin ná.

Ta na tacú cuni ndímáhnú na ñaha nahá i nu ná.

Ta na yatá quixi sani nu ná caja i.

¹⁸ Ta mé tiempo já chindahá i ínima yii mí i ña ná cañuhu a ini na cája chúun cuéntá mí i, á cúu ná taá á cúu ná ñaha.

Ta caja i ña ná cahan na sahá i nuú ñayivi.

¹⁹ Ta cuahá ndivaha ña náhnú caja i indiví xihín ñuyiví ta cuni ñayivi ña.

Cuni na nij xihin ñúhu cáyi xihín ñihma ña ndindita tátuhun vico núhú.

²⁰ Ta canaá nuú candii ta ndicuáhá nij nuú yoo.

Ña yóho cacuu ña yaha tá sa nacayati quiví xinu yehe, mé á cúu xitoho na caja vií i sahá ñayivi ñuyiví.

Mé quiví cán cacuu a in quiví cáhnu ndivaha.

²¹ Joo cacu ndaa ínima tóco ndihi na ná ndicahán quiví i”, nacachi Ndióxi ini libro nacahyí Joel sanahá — nacachi Pedro.

²² Anda já nacachi tucu Pedro já:

—Cuni johu vaha ndó tuhun cáhan i xihin ndó, na Israel. Jáchi cáhan i saha Jesús, mé a naquixi ñuu Nazaret. Jáchi natahan ini Ndióxi xihin tóco ndihi ñaha nacaja mé Jesús. Ta naxini xihín nuu ndó ña náhnu xihín ña xitúhún nacaja mé á nu ndo xihin ndée nasahan Ndióxi nu a. Ta sa cándaá vaha ini mé ndó ña yóho. ²³ Joo tá natiin ndó Jesús já najáxinu coo ndó ña nasacu ini Ndióxi coo sanahá ndivaha. Ta mé ndó nandiquiahva ndó Jesús ndáha ta quini. Ta nacaja ndó ña ná cata caa na Jesús ndica crúxu.

²⁴ Joo najánditacu Ndióxi Jesús já ná a cóo a nu ndóho ini na sa naxihi jáchi ni in ñaha a cúu caja ña ná coo Jesucristo nu ndúu na sa naxihi. ²⁵ Sanahá ndivaha nacahyí rey David sahá Jesús já nacachi da já:

Xini vaha i ña ní tiempo íin ndó xitoho i, xihín i, ta íin ndó xoo cuáha i chindeé ndó yehe sahá ña cán quéa co yíhvi toho i.

²⁶ Sahá ña cán quéa nacajii ndivaha ini i, ta nacahan vatá ndivaha i.

Jáchi vatí ná quivi i cacuu u ndji joo coo vaha ini i.

²⁷ Jáchi caja ndó ña ná nditacu tucu u já ná a cándo nahá ínima i nu ndúu ínima ndii.

Ta ni a quiahva toho ndó ñamani tahyi yiquí cuñu i jáchi cúu u jahyi máni ndo.

²⁸ Najánaha ndó nuu i ndaja caja i ña cúni ndo.

Jácutú ndaa ndó ínima i xihín ña cájii ini i jáchi já íin va ndó xihín i, nacahyí David sanahá ndivaha —cáchi Pedro xihín na ndúu cán.

²⁹ Anda já nacachi tucu Pedro já xihin ná:

—Candehé ndo, ñani i ná ndicani i nu ndo ña cúnj cachi ña yóho. Sa cándaq cáxí iní ña sa naxihí David, da nasacuu tásáhnú jícó yo. Ta najánduxu na da ta ín yíi va nuú najánduxu na da.³⁰ Nacachi David ña yóho jáchi nasacuu da profeta. Jáchi mé Ndióxi queá nasahan tuhun a nu dá ta nacachi a xihín dá ña quixi Jesucristo chichi mé dá ta nacachi a ña cacomí mé Jesucristo cán cuéntá sahá ñayivi Israel.³¹ Sa nacandaq ini David ña caja Ndióxi chí nuú sahá ña cán queá nacachi da xihín ñayivi ña nditacu tucu Jesús tá nandihí quivi a. Ta nacaxi tuhun David nu ná ña a jándicoo toho Ndióxi ínima Jesús nu ndúu ínima ndij ta ni a quiáhva toho mé á ñamani tahyi yiquí cuñu mé Jesús cán.³² Ta viti cándaq iní ña naxinu tuhun nacahyí David jáchi naxini tóco ndihí ña najánditacu Ndióxi Jesús.³³ Ta najándindita cáhnú ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínima yíi mé á nu Jesús jáchi ña yóho cúu tuhun nasahan Ndióxi sanahá. Ta tóco ndihí ña naxini ndó xihín nuú ndo ta naxini johó ndó yóho cúu á ña naquixi cuéntá Ndióxi.³⁴ Ta sa xíni yo ña co cáhan David saha mé dá jáchi a juú David cúu da nandaa indiví, vaha. Sa mé David cúu dá da nacachi tuhun yóho:

Nacachi Ndióxi xihín xitoho i:

“Naha xoo cuáha jíin i cacoun,

³⁵ janda quiáhva ná cacu u na cándají yohó tixi sahun”,
nacachi Ndióxi —já nacahyí David sanahá.

³⁶ Anda já nacachi tucu Pedro já:

—Ña cán queá cúnj ña ná candaq ini tóco ndihí ndó ña cáhan i xihín ndó, na Israel. Mé Jesús, mé a nacata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuéntá sahá ñayivi —nacachi Pedro xihín na ndúu cán.

³⁷ Tá naxini johō nā cán ñā nācachi Pedro xih̄in ná ivi laá nātahvi ini na já nācasáhá ndáca tuhún nā Pedro xih̄in java gā nā apóstol cán já cáchí nā já xih̄in ná:

—Ndía ndítahan caja nde, ñani, nā cúú cuéntá Jesús.

³⁸ Anda já nanducú ñehe Pedro tuhun nū ná já cáchí da já xih̄in ná:

—Xíní ñúhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já queá ná caja cáhnu ini Ndióxi sahá cuachi ndó ta já ñehe táhvi ndó quiahva Ndióxi ínima yii mé á nū ndo. ³⁹ Jáchi nasahan Ndióxi tuhun a caja ñā jáchutú ndaa ínima ndo xih̄in ínima yii mé á ta quiahva já caja ri a xih̄in jahyi ndó ta jári xih̄in nā tóho, nā ndúu xícá. Jáchi já caja mé á xih̄in ñayivi nācaxi mé á —nācachi Pedro xih̄in ná.

⁴⁰ Ta cuahá ndivaha java gā tuhun nācahan Pedro xih̄in ná ta já najácahan da nā já nācachi da já xih̄in ná:

—Candeé ini ndó Jesús já ná jácacu a ndohó já ná a cūhūn ndó indayá nuú cūhūn ñayivi cája cuachi —nācachi Pedro xih̄in ná.

⁴¹ Cuahá ñayivi nandiquehe vaha na tuhun nācahan Pedro ta nācandeé ini na Jesús. Ta mé quivi já nācandúta tátuhun unī mil ñayivi já nandihvi na íchi cuéntá Jesús. Ta nandique táhan nā cán xih̄in java gā nā cúú cuéntá Jesús.

⁴² Ta ndinuhu ini na jácuaha na ñā jánaha nā apóstol nū ná. Ta cándúsa táhan tóco ndihi na ta ndítutú nā xíca tahvi nā nū Ndióxi. Ta níí tiempo sá taca na ndicahnda java táhan na pan cuxu na.

Ñā nācaja ñayivi tá nācasáhá nā ndico nā íchi cuéntá Jesús

⁴³ Mé tiempo já nasahan Ndióxi ñamanī nuú nā apóstol cán ñā ná cuu caja na cuahá ndivaha ñaha xituhún xih̄in cuahá ñā náhnu ndivaha ta chí cátontó tóco ndihi ñayivi tá xíní nā ñā yóho. ⁴⁴ Ta tóco ndihi nā cúú cuéntá Jesús

cán in nanduu ndihi na ta ndícahnda java ñaha nu táhan na. ⁴⁵ Ta jíco na ñaha cómí na ta já ndícahnda na jiuhún na nuú na ndímaní ñaha nuu. ⁴⁶ Ta ndijáá níí quivi ndítútú na cája cáhnu na Ndióxi veñuhu cáhnu ndácaan ñuu Jerusalén cán. Ta tá ndíque táhan na vehe já ndícahnda java táhan na pan cuxu na ta cávatá ndivaha xihin táhan na cája na já. Ta ni in na co ndíñehe jíco mé. ⁴⁷ Nacaja cáhnu na Ndióxi ta tóco ndihi ñayivi ndúu ñuu Jerusalén ín vaha ini na xihin na cán. Ta nini quivi nacaja Ndióxi ña nandicuahá na cúu cuéntá Jesús, mé na jácau ndaa Ndióxi ínima.

3

Ndivaha in taa rénco cája Pedro

¹ In quivi tátuhun caa uní sahini cuahan Pedro xihin Juan veñuhu cáhnu Jerusalén cán. Mé hora já táca ñayivi cuahan na veñuhu caça tahví na nu Ndióxi. ² Ta mé yuyéhé ñuhu cán ín coo in da naxihi tuchu saha. Ta janda tá nacacu da cáa da já. Ta ndijáá níí quivi ñehe na da cuahan da yuyéhé ñuhu cáhnu naní yéhé ñúchí. Ta cán ín coo da sáti da nuú ñayivi ndíhvi ini veñuhu cán. ³ Ta tá naxini da rénco cán cuahan quíhvi Pedro xihin Juan ini veñuhu cán já nacata ñee da ndáha dá nu ná sáti da. ⁴ Anda já nandicoto nihni Pedro xihin Juan nuú da rénco cán já nacachi Pedro já xihin dá:

—Candehé nuú nde.

⁵ Anda já nasandehé cáxí da cán nu ná jáchi cáhán da quiahva na jiuhún nu dá. ⁶ Joo já nacachi Pedro xihin dá já:

—Coó toho jiuhún i quiahva i nuun joo ña ín nuú i ña cán quiahva i nuun. Ín ndivaha ndée Jesucristo, mé á ñuu Nazaret sahá ña cán quéa sáhdá i chuun nuun ña ná candichún cacún —nacachi Pedro xihin dá.

⁷ Andá já natiin Pedro ndahá cuáha da cán ta nandínehe da da já nacandichi da chí ivi laá nandihvi ndée saha dá já nanditacu tuchu saha dá. ⁸ Andá já nacandita mé da nasahijn réncō saha cán já nacandichi da ta já nacasáhá da xíca da. Cándita da cája cáhnu da Ndióxi nandihvi da xihin ná ini veñuhu cán. ⁹ Ta tóco ndihi ñayivi ndúu cán naxini na cándita da cája cáhnu da Ndióxi. ¹⁰ Ta a juú quiahva nacatóntó na ta nayihví na sahá ña naxini na cán. Jáchí nandicuni na da cán cúu da da nasacuu réncō, da nasahijn coo sáti yéhé ñuhu naní yéhé ñúchí cán.

Cáhan ndojó Pedro nuú ñayivi ndúu yéhé ñuhu cáhnu cán

¹¹ Mé da nasacuu taá réncō cán natiin tuun da Pedro xihin Juan ta chí cō cúní da janí ñahá da. Ta tóco ndihi ñayivi nacatóntó na xínu na cuahan na candehe na da réncō cán nu ndíta da yéhé ñuhu, ña naní yéhé Salomón. ¹² Tá naxini Pedro nacasáhá táca cuahá ñayivi nu iin da já nacasáhá cáchí da já xihin ná:

—Cuni johō vaha ndó, ñayivi Israel. Cátóntó ndivaha ndó sándehe ndó ndehe jáchí cáhán ndō ña nandaja vaha nde da yóho xihin ndée mé nde. Á tá coó ta cáhán ndō ña nandaja vaha nde da sahá ña ndicahán ndivaha nde Ndióxi. ¹³ Joo cō iin toho a tá quiahva cáhán ndō. Jáchí mé Ndióxi, ña nacaja cáhnu Abraham xihin Isaac xihin Jacob, tásáhnu jícó yō nandaja vaha mé á da yóho. Ta mé Ndióxi cán nacaja ña ná nduu cáhnu ndivaha Jesucristo, jahyi mé á. Joo mé ndó nandiquiahva ndó a ndahá na jutixia. Ta tá cúní Pilato janí da Jesús já nasaji nuu ndó nu dá caja da ña. ¹⁴ Mé Jesús cúu á ña yí ndivaha ta ndinuhu ña ndaa cuití va cája. Joo mé ndó nacandají ndó a ta naxica ndó nu Pilato ña ná janí da in da sáhní ndíi. ¹⁵ Tá nandihí já nasahní ndó Jesús, mé a cúu cája ña ná catacu ñayivi anda ama cáa quívi. Ta vatí naxihí a nasacuu a ndíi joo

najánditacu tucu Ndióxi mé á. Ta cándaá cáxi ini nde ña cáhan nde ña ndaa xihín ndo. ¹⁶ Ta sa mé Jesús cúu á ña cándeé ini nde. Ta sahá ña cándeé ini nde mé á sahá ña cán queá nandivaha da cándichi nu ndó yóho. Ta xini ndó da nandivaha yóho ta cándaá cáxi ini ndó nandihvi ndée saha dá sahá ña cándeé cáhnu ini nde Jesús.

¹⁷ Candehé ndo, ñani i. Sa xini vaha nde viti ña tá nasahní ndó Jesús co nacandaá ini ndó ndia nacaja ndó. Ta ni na cúu jefe ndo coo nacandaá ini na ndia nacaja na. ¹⁸ Joo xihín ña yóho najáxinu coo Ndióxi tuhun nasahan nu yó sanahá tá nacachi na profeta cuénta Ndióxi ña ndítahan ndoho ini Jesucristo, mé a nachindahá Ndióxi cacomí cuénta sahá ñayivi. ¹⁹ Sahá ña cán queá xini ñúhú jándacoo ndó cuachi caja ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já caja Ndióxi ña ná ndivaha ini ndó. ²⁰ Janda jihna nacaxi Ndióxi Jesucristo ná chindahá a ña ná quixi a ñuyívi yóho já ná cacomí a cuénta sahá ñayivi. ²¹ Ta viti íin Jesucristo indiví ndati a tandaa quívi caja Ndióxi ña nduu víi tóco ndihi ñaha. Já ndítahan coo jáchi sanahá ndivaha nacahan Ndióxi xihín na profeta mé á sahá ña yóho ta mé ná nacaxi tuhun na ña nuú ñayivi. ²² Ta ña yóho cúu tuhun nacahan Moisés nu tásáhnu jícó yo já nacachi da já xihín ná: “Taño mé ndó jan cana in profeta caja Ndióxi, xitoho í tá quiahva nacaja mé á xihín mí i. Ta coto a quehe núu ndó ni in túhún tuhun cahán mé profeta jan xihín ndo. ²³ Jáchi tóco ndihi ñayivi, na co cuni candúsa tuhun cáhan mé profeta jan ndihi saha ná ta a ñéhe táhvj ga na coo na xihín na ñuu Ndióxi”, nacachi Moisés sanahá —nacachi Pedro xihín ná.

²⁴ Ta nacahan chága Pedro xihín ná já cáchi da já xihín ná:

—Tóco ndihi na profeta nacahan na sahá ña yáha tiempo viti. Ta profeta Samuel cúu da nacasahá cahán

sahá ña yóho. Ta tóco ndihi java ga na profeta naquixi tá nu ndíhi nacahan na cán saha tiempo viti. ²⁵ Nachindahá Ndióxi na profeta sanahá ña ná caxi tuhun na xihin yo ña sahan Ndióxi tuhun a nu yó, na Israel. Nacaja vaha mé á saha yo tá nacachi a já xihin Abraham, da nasacuu tásáhnú jíco yo: “Xihin ña caja na quixi chichún chí nuu já caja cuahá ndivaha i ñamani xihin tóco ndihi ñayivi ndúu ndijáá ñuyívi”, nacachi a. ²⁶ Tá najánditacu Ndióxi Jesucristo, jahyi mé á jihna ñúhú ga nu mé ndó, na Israel nachindahá a ña já ná caja yij á ndohó já ná jándicoo ndó cuachi cája ndó —nacachi Pedro.

4

Ndíquehe Pedro xihin Juan saha mé dá nuú na sacuahá veñuhu

¹ Ta janda cahan chá va Pedro xihin Juan nuú ñayivi cán já naxinu java da cúu jutú xihin da sáhná chuun nu policia veñuhu cán. Ta tañu na yóho naxinu ri na saduceo. ² Xójo ndivaha ini na jáchi jánaha Pedro xihin Juan nuú ñayivi ña sa nanditacu tucu Jesucristo. Ta xihin ña yóho náha ña vaxi quivi nditacu tucu ndij. ³ Sahá ña cán quéa natiin na cán Pedro xihin Juan ta nataán na da vecaa. Ta cán nacando da janda inga quivi itaan jáchi sa nacuaá va. ⁴ Joo cuahá ndivaha ñayivi nacandúsa tuhun nacahan Pedro ta xihin ña yóho nandicuaaha chága na cúu cuéntá Jesús. Jáchi na nacandúsa cán nasacuu na tátuhun uhun mil dataa.

⁵ Ta ndaja coo na cúu sacuaaha nuú ñayivi Israel cán xihin na sacuaaha veñuhu xihin na jánaha ley Moisés nandique táhan ndihi na inga quivi itaan. ⁶ Ta tañu na cán ndácaan ri da naní Anás, da cúu sacuaaha nuú jutú. Ta tañu na cán nasandacaan ri Caifás xihin Juan xihin Alejandro xihin tóco ndihi na cúu na vehe na sacuaaha nuú jutú cán.

⁷ Andá já natavá na Pedro xihin Juan vecaa. Ta ñehe na da cuahan na nuú nataca na cán ta nasani ndichi na da mahnú na nataca cán ta já nandaca tuhún na da já cáchi na já xihin dá:

—Ndaja nacaja ndó nandaja vaha ndó da nasaquíhvi saha cán. Yo já nasahan ndée nu ndó ña cúu cája ndó ña yóho —cáchi na ndaca tuhún ñahá na.

⁸ Ta nacaja Ndióxi ña ná ndicutú ndaa ínima Pedro xihin ínima yii Ndióxi ña cán quéa nacasáhá da ndúcú ñehe da tuhun nu ná já cáchi da já xihin ná:

—Cuni johu vaha ndó, na sacuaña ñuu xihín na sacuaña veñuhu Israel. ⁹ Nandaca tuhún ndó ndehe ndaja nacaja nde nandaja vaha nde da nasaquíhvi saha cán. ¹⁰ Cuni johu ndó ná ndicani nde sahá ña yóho nu ndo ta já ná cuu candaa ri ini tóco ndihi ñayivi Israel ña mé dataa, da cándichi nu ndo yóho nandivaha da xihín ndée Jesucristo, ña ñuu Nazaret. Mé a cán nacata caa mé ndó ndica crúxu cán ta tá nandihí já najánditacu ñahá Ndióxi. ¹¹ Ta mé Jesús yóho cúu á ña cáhan tuhun Ndióxi saha, ña cúu á tátuhun yuu ndúhu, ña nacandají na cávaha vehe. Ta mé ndó cúu ndó tátuhun na cávaha vehe cán, na nacandají Jesús. Joo viti naxinu a cúu á tátuhun yuu ña íin chága saha nacaja Ndióxi. ¹² Jáchí ni in túhún toho ñayivi ndúu ñuyiví a cúu jácacu mí ña ná a cúhun yó indayá. In túhún Jesucristo quéa nachindahá Ndióxi nu yo já ná cacu ndaa ínima yo —nacachi Pedro xihin ná.

¹³ Tá naxini na sacuaña cán ña co yíhvi Pedro ni Juan ndíta da cáhan da xihin ná já nacatontó na jáchi sa xini na ña coo tiaha da tutu. Ta naxini na ña cúu dá da ndahví, da naxica xihin Jesús. ¹⁴ Ta ni co ñehe íni na sacuaña cán cachi na xihin Pedro ña cúu dá da tuhún jáchi sa nuu táhyí na já va cándichi da nandivaha saha cán. ¹⁵ Andá já natavá

tóo na da cán já nacasáhá ndítúhún xihín táhan na. ¹⁶ Já cáchí na já:

—Ndía caja í xihín ndíví da yóho viti jáchi sa nacandaa ini ndihi ñayivi ñuu Jerusalén ña xitúhún nacaja da. Ta ni mí, a cúu cachí ña cúu á ña tuhún. ¹⁷ Joo cóho jáyihví yó na ná a cáhan chága na saha Jesús nuú ni in tuhún toho ga ñayivi. Jáchi co cúni yo ña ná ndicuita nuu tuhun saha Jesús —cáchi na ndítúhún xihín táhan na.

¹⁸ Anda já nacana tucu na Pedro xihín Juan ta nasahnda na chuun nu ná ña ná a jánaħa ga na saha Jesús ta ni ná a cáhan ga na quivi Jesús. ¹⁹ Anda já nanducú ñehe Pedro xihín Juan tuhun nu ná já cáchí da já xihín ná:

—Cahvi vaha ini ndó, na sacuaħa. Á cáhan ndó ña vaha chága caja nde ña sáhdá ndóhó á ña sáhdá Ndióxi nuú nde caja nde. ²⁰ Jáchi a cuú jándacoo nde cahan nde saħá ña naxini nde xihín saħá ña naxini johó nde —cáchí da xihín na sacuaħa cán.

²¹ Anda já nacahan cuehe na sacuaħa cán xihín dá ña ná a jánaħa chága da saha Jesús. Joo tóco ndihi ñayivi cája cáhnu na Ndióxi saħá ña nacaja da cán. Ña cán quea najani ñahá na jáchi coo ñañehe íni na ndá quiaħva caja xíxi na xihín dá. ²² Ta mé da nandivaha cán naxinu chága da nuú ivi jícó cuia tá nandivaha saħa dá.

Xíca tahví na cúu cuéntá Jesús nu Ndióxi

²³ Ta tá sa najani Pedro xihín Juan já naquee da cuahan da nuú nasanduu java ga na cúu cuéntá Jesús cán. Ta já nandicani na nuú na cán ña nacahan na sacuaħa nuú jutu xihín na sacuaħa veñuhu cán xihín ná. ²⁴ Tá naxini johó java ga na cúu cuéntá Jesús cán ña ndícani da nu ná já nacasáhá tóco ndihi na xíca tahví na nu Ndióxi já cáchí na já:

—Tátá Ndióxi. Mé ndó cúu Ndióxi ña nacavaħa in-diví xihín ñuyívi xihín tañuhú xihín tóco ndihi ñaha.

²⁵ Sanahá ndivaha tá najándicutú ndaa ndó ínima David, tásáhnú jícó nde xihín ínima yii mé ndó já nacachi ndó já xihín dá ta já nacahyí da:

Ndá cuéntá queá ndívaá nahá ñayivi ndúu ñuyíví ta ndinuhu ña núu cáhvi ini na caja na.

²⁶ Tóco ndihi da cómí cuéntá sahá ñayivi ndúu ñuyíví xihín da sáhdá chuun nuú ñuu nandique táhan na cani táhan na xihín Ndióxi.

Ta cáni táhan na xihín mé a nacaxi Ndióxi chindahá a cacomí cuéntá sahá ñayivi, nacachi ndó sanahá.

²⁷ Ta mé a ndaa queá yóho jáchi ini ñuu yóho najátaca táhan Herodes xihín Poncio Pilato xihín na tóho xihín na Israel viti. Najátaca táhan na caja núu na xihín Jesús, da cúu jahyi yii mé ndó, mé a nacaxi ndó. ²⁸ Joo xihín ña nacaja na yóho naxinu coo nuú ña nasacu ini mé ndó coo janda jihna ndivaha jáchi cuu caja ndó tóco ndihi ña cúní ndó caja ndó. ²⁹ Ta viti candeheé ndo, tátá Ndióxi ndá quiáhva cúní na caja xíxi na xihín nde. Ta quiáhva ndó ñamaní ná candeé ini nde ndohó já ná a yíhvi nde cahán nde tuhun vaha saha mé ndó xihín ndá nuú ñayivi nacuu jáchi mé nde cúu nde na cája chúun nu ndo. ³⁰ Ta xíca tahví nde nu ndo ña ná cuu ndaja vaha nde na quíhvi xihín ndée mé ndó. Ta ná caja ndó ñamaní ña ná caja cuahá nde ñaha xitúhún xihín cuahá ña náhnú ná cuni ñayivi ña xihín ndée Jesucristo, jahyi yii mé ndó cája nde tóco ndihi ña yóho —cáchi na xíca tahví na nu Ndióxi.

³¹ Tá nandihí naxíca tahví na nu Ndióxi já naquiji nuu vehe nu ndúu tútú na cán. Ta já nandicutú ndaa ínima ndihí na cán xihín ínima yii Ndióxi ta nandindeé ini na cahán na tuhun Ndióxi nuú ñayivi.

Sáhdá java táhan na cúu cuéntá Jesús ñaha cómí na

³² Cuahá ndivaha nasacuu na cúu cuéntá Jesús cán joo chí in jini ndíhi na. Ta ni in túhún na co cájhnda

ñaha nu táhan jáchi cáchi na: “Ñaha tóco ndihí queá.”
³³ Xiñin ndée sáhan Ndióxi nu ná cáxi tuhun na apóstol
 ña nanditacu tucu Jesús. Ta ñajaja Ndióxi cuahá ndivaha
 ñamani xiñin tóco ndihi na cúu cuénta Jesús cán. ³⁴ Ta
 ni in na coo nandimaní ñaha nuu jáchi na in ñaha nuu
 tátuhun vehe á ñúhu najicó na ña ta ñéhe na mé jjuhún
 cán ³⁵ ta sáhan na ña nuu na apóstol já ná ndicahnda mé ná
 ña nuu in in na xini ñúhú a. ³⁶ Já ñajaja in dataa naní José,
 da ñaquixi chichi Leví. Ta cúu dá da ñacacu in isla naní
 Chipre. Mé da yóho nachinúu na apóstol quivi dá naní da
 Bernabé ta mé tuhun yóho cuni cachi a da sáhan tuhun
 ndeé ini ñayivi. ³⁷ Ta mé da naní Bernabé yóho najicó da
 ñúhu dá ta já ñasahan da mé jjuhún da cán nuu na apóstol.

5

Cája Ananías xiñin Safira cuachi nu Ndióxi

¹ Joo mé tañu já in da naní Ananías xiñin Safira, ñájíhí
 da najicó na in ñundáhyi ná. ² Joo coo nandiquiahva ndihi
 da jjuhún ña ñacayahvi ñúhu cán nuu na apóstol. Ta
 ñacachi da xiñin ná ña cán cúu ndihi va ña ñaquehe da
 saha ñúhu. Joo najándique táhan tuhun da xiñin ñájíhí
 da ña ná candoo chá jjuhún cán nu ná. ³ Ta tá ñaxinu
 coo Ananías ndiquiahva da jjuhún cán nu Pedro já ñacachi
 Pedro já xiñin dá:

—Ndá cuénta quea ñasahun ñamani nu tiñáhá sacuaña
 nandihvi rí inimun, Ananías. Ta ñasacu inún jándahvún
 inima yii Ndióxi ta já ñaquehún táhan jjuhún ñachahvi na
 sahá ñúhu jan. ⁴ Ñaha mé vún ñasacuu ñúhu jan, nduu. Ta
 tá najicún ña, ñaha mé vún cúu ri jjuhún jan va. Ñacahvi
 inún cajún ña núu yóho ta xihín ña ñacajún yóho a juu nu
 mé nde cuití va ñacahún ña tuhún joo ñacahún ña tuhún
 nu Ndióxi —ñacachi Pedro xiñin dá.

⁵ Tá naxini joho Ananías ña ñacachi Pedro xihin dá ivi laá nandicava da naxihi da sahá cuachi ñacaja da nu Ndióxi. Ta tóco ndihi na ñacandaá ini sahá ña ñayaha yóho ñayihví ndivaha na. ⁶ Anda já naxinu java da tacú já naxitíví na ndii cán já ñéhe na a cuahan na jánduxu na.

⁷ Ta tá sa ñayaha tátuhun uní hora já ñaquihvi ñájíhí Ananías nu ndácaan Pedro cán. Joo ni co xini ñá ña ñandoho yíi ña. ⁸ Anda já ñandaca tuhún Pedro ña já cáhí da já xihin ña:

—Á mé a ndaa najicó ndó ñúhu ndo ta ñachahvi na tá quiahva ñacachi yíun xihín i sahá —ñacachi Pedro.

Anda já ñanducú ñehe ñá cán tuhun nu dá já cáhí ña já xihin dá:

—Ajan, quiahva já najicó nde ña.

⁹ Anda já ñacachi Pedro já xihin ña:

—Mé ndó najándique táhan ndó tuhun ndó coto ndojó ndo inima yíi Ndióxi. Candehé. Jata vehe jan vaxi na ñasahan najánduxu yíun. Ta viti cañehe ri na yohó va cuhun na jánduxu na —ñacachi Pedro xihin ña.

¹⁰ Tá ñacachi Pedro já ivi laá nandicava ña saha dá naxihi ña sahá cuachi ñacaja ñá. Tá naxinu coo da tacú, da ñasahan najánduxu yíi ñá cán já naxini na cándúhu ri mé va ñá naxihi ña. Anda já ñatavá na ña ta najánduxu na ña in xoo mé nuú najánduxu na yíi ña cán. ¹¹ Ta tóco ndihi na cúu cuéntá Jesús cán xihin tóco ndihi java ga na tá ñacandaá ini na sahá ña ñayaha yóho ñayihví ndivaha na.

Sáhan Ndióxi ndée nuú na apóstol já ná caja na cuahá ñaha xituhún

¹² Ta ñacaja Ndióxi ña ná cuu caja na apóstol cán cuahá ñaha xituhún xihín cuahá ña náhnu tañu ñayivi cán. Ta tóco ndihi na cúu cuéntá Jesús ñasataca na yéhe ñuhu

cáhnu naní yéhé Salomón. ¹³ Ta java ga ñayivi, na co ndico íchi cuéntá Jesús cán yíhvi na catáhan na xihín na cúu cuéntá Jesús yóho. Joo ndijáá java ga ñayivi cán ín toni ñúhú na xihín na apóstol cán. ¹⁴ Ta cuahá ndivaha ñayivi nacasáhá cándusa na Ndióxi, ta viti najihí viti. ¹⁵ Ta sahá ña náhnu cája na apóstol yóho natavá na na quíhvi jata véhe ta nachinduu na na nuú xito á nu yívi mé nuú yaha Pedro cán. Já queá tá ná yaha da vatí candahvi cuití da ná cani ndaa jatá java na cán ña ná ndivaha na. ¹⁶ Ta cuahá ñayivi ndúu java ñuu válí ndúu yati cán ñéhe na na quíhvi xihín na ñúhu ínimá quini ini vaxi na ñuu Jerusalén ta cán nandivaha ndihi na.

Jándoho na ini na apóstol

¹⁷ Anda já da cúu sacuahá nuú jutú cán xihín na cúu cuéntá Saduceo cán nacasáhá cáhivhi ndivaha ini na xihín na apóstol. ¹⁸ Sahá ña cán queá natiin na na apóstol cán ta nataán na na vecaa. ¹⁹ Joo ñuu naxinu coo in táto Ndióxi ta nasuná a yéhé caa cán ta natavá a na ta já nacachi a já xihín ná:

²⁰ —Cuáhán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndíjama ñayivi ná ndihvi na íchi cuéntá mé á —nacachi a xihín ná.

²¹ Ña cán queá tá nativi inga quivi itaan já nandihvi na apóstol veñuhu cáhnu cán ta nacasáhá na jánaha na nuú ñayivi cán.

Joo da cúu sacuahá nuú jutú cán xihín tóco ndihi na sacuahá cómi cuéntá sahá nación Israel cán nasahnda na chuun nu policia cán ña ná chun na tavá na na apóstol ñúhu vecaa cán ná quixi na nuú na sacuahá cán. ²² Joo tá naxinu coo na cúu policia vecaa cán coo nandínehe toho ñahá na. Ta já nandico coo na caxi tuhun na xihín na sacuahá cán. ²³ Já cáchí na já:

—Tá naxinu nde yéhé caa já naxini nde ndájí tuun a ta ndíta soldado ndáá vaha da ña. Joo tá nandihvi nde ini vecaa sándehe nde coó na apóstol cán ná ndiñehé nde.

²⁴ Tá naxini johó na sacuaḥa nuú jutú xihín da cúú sacuaḥa nu policia veñuhu xihín java ga na sacuaḥa veñuhu cán ña yóho já naçasáhá ndáca tuhún táhan na saḥá ña ndítahan quixi nu ná chí nuu saḥá ña cája na apóstol yóho.

²⁵ Mé hora já naxinu coo in dataa ta cáchí da já xihín ná:

—Na apóstol nataán ndó vecaa cuni cán, ndíta na jatá veñuhu jánaḥa na ñayivi —nacachi da cán xihín ná.

²⁶ Anda já nasahan da cúú sacuaḥa nuú policia xihín java ga policia já natiin tucu da na apóstol nasañehe da na nuú na sacuaḥa veñuhu cán. Joo coó nacaja xixi na xihín ná jáchi nayihví na ndicuita ñayivi cuaha cán cani na na xihín yuu. ²⁷ Ta tá naxinu coo na xihín na apóstol nu ndúu na sacuaḥa veñuhu cán já nasacu ndichi na na nu ná. Anda já nacachi da cúú sacuaḥa nuú jutú cán já xihín ná:

²⁸ —Mé nde nasahnda nde chuun nu ndó ña ná a jánaḥa chága ndó saḥá Jesús jan. Joo mé ndó sa najándicutú ndó Jerusalén xihín ña jánaḥa ndó jan. Ta cúní ndó jácojo ndó cuachi jatá nde ña nasahní nde Jesús jan —cáchí da.

²⁹ Anda já nanducú ñehe Pedro xihín java ga na apóstol cán tuhun nu ná já cáchí na já xihín ná:

—Ndítahan nuú nde caja jihna ñúhú ga nde ña sáhná Ndióxi nuú nde, a juú ga ña sáhná ñayivi nuú nde caja nde. Saḥá ña cán quéa coó nacaja nde ña nacachi ndó xihín nde. ³⁰ Ta mé Ndióxi nacaja cáhnu tásáhnu jícó yo sanahá nacaja ña ná nditacu Jesús, mé a nasahní ndo tá nacata caa ndó a ndíca crúxu. ³¹ Joo nandiñehe jícó Ndióxi Jesús ta nasacu a ña xoo cuáha mé á ta nacaja ña ná nduu Jesús ña cacomí cuéntá saḥá ñayivi Israel ta jácacu a na

já ná a cùhùn nà indayá. Ta tá ná ndicó coo ini na já caja cáhnu ini Ndióxi sahá cuachi cája na. ³² Ta naxini xihín nuú nde tóco ndihi ña yóho ta cáhan nde sahá ta quiahva já cáhan ínimá yii Ndióxi sahá ña yóho. Ta chindahá Ndióxi ínimá yii mé á cañuhu a ini nà cája ña cúní mé á —cáchi nà apóstol xihín nà cán.

³³ Tá naxini johó nà sacuaḥa cán ña nacachi nà apóstol já ivi laá naxojo ndivaha ini na xihín ná chí cúní nà cahní ñahá nà. ³⁴ Joo ndaja coo íin tañu nà cán in da sacuaḥa cúu fariseo naní Gamaliel, da íin toni ñúhú ñayivi xihín. Ta cúu dá da jánaḥa ley Moisés nu ná. Nacandichi da tañu nà sacuaḥa cán já nasahnda da chuun ña ná tavá xóo na nà apóstol cán jata véhe. ³⁵ Anda já nacachi da já xihín nà sacuaḥa cán:

—Candehé ndo, nataa Israel. Cuéntá coo ndó a juú caja ndaja nacuu ndó xihín nà apóstol yóho. ³⁶ Xíní ñúhú ndicuhùn ini ndó ña sanahá nandindita in da naní Teudas ta nacachi da xihín ñayivi ña cúu dá in da íin cuahá saḥa. Ta nasandico tátuhun comi ciento ta jata dá joo nasahní nà da ta tá naxihí da já nandicuṭta nuu tóco ndihi ñayivi naxica jatá da cán ta xihín ña yóho nanaá sahá ndihi ña nacaja da. ³⁷ Tá nandihí já nandindita inga tucu da naní Judas, da naquixi estado Galilea mé tiempo cándahvi ñayivi ñuu. Ta cuahá ndivaha ñayivi nandico jatá da cán joo nasahní ri na da cán va ta tóco ndihi nà nasandico jata dá nandicuṭta nuu ndihi na. ³⁸ Sahá ña cán queá jácahan i ndohó viti ná a quíhvi ndáha ndó nà apóstol yóho. A quíhvi nuu ndó xihín ña cája na jáchi tá jiní mé va na naquixi ña cája na já queá ndihi va sahá ña cája nà yóho. ³⁹ Joo tá Ndióxi nachindahá nà caja na ña cája nà yóho já queá a cúu toho caja ndó jándihí ndó sahá ña cája na. Cuéntá coo ndó jáchi tiahva náá xihín Ndióxi caní táhan ndó —cáchi Gamaliel xihín nà sacuaḥa cán.

⁴⁰ Tóco ndihi na sacuaḥa naxini joho nuú naçahan da cán, nathan ini na xihín ña naçahan da. Anda já naçana na na apóstol ta já naçani na na xihín churú. Ta naçachi na xihín ná ña ná a çahan ga na saha Jesús nuú ñayivi. Anda já najani ñahá na. ⁴¹ Ta cájii ndivaha ini na apóstol cán naqueta na nu ñuhu na sacuaḥa cán jáchi naçahan Ndióxi ñamani nu ná ndoho ini na sahá Jesús. ⁴² Ta ndijáá ní quivi ini veñuhu cáhnu xihín ini vehe ñayivi çahan na ta jánaḥa na saha Jesucristo.

6

Cáxi na usa da cacuu diácono, da chindeé na apóstol

¹ Ta mé tiempo cán ndicuḥá ndivaha na cúu cuénta Jesús. Ta ndaja coo na çahan tuhun griego cán naçasáhá çahan cuachí na nuú na Israel. Mé na çahan tuhun griego yóho cáchí na ña co ndítaḥnda in nuú ñaha cája na Israel tá ndítaḥnda ña cuxu na cuáan in in quivi. ² Anda já nandaja tútú ndihuxu ivi na apóstol cán tóco ndihi na cúu cuénta Jesús já naçasáhá cáchí na já xihín ná:

—Ña ndítahan nu mé nde, na apóstol quea çaxi tuhun nde tuhun Ndióxi nuú ñayivi. Sahá ña cán quea co yáchi nde ndícaḥnda nde ña cuxu ñayivi. ³ Sahá ña cán quea xíní ñuhú ndinducú mé ndó usa ta tañu ndó já ná caja na chuun yóho. Joo xíní ñuhú cacuu na ñayivi cándéé ini ndó. Ta xíní ñuhú cacuu na na tácu ini. Ta xíní ñuhú cacuu na na nandicutú ndaa ínima xihín ínima yii Ndióxi já ná cuu quiaḥva ndó chuun yóho nu ná. ⁴ Ta ña caja mé nde quea ndinuhu ini nde caça taḥví nde nu Ndióxi ta jánaḥa nde tuhun mé á nuú ñayivi —naçachi na apóstol xihín na cúu cuénta Jesús cán.

⁵ Ta tóco ndihi na nathan ini na xihín ña naçachi na apóstol. Sahá ña cán quea naçaxi na da naní Esteban. Mé Esteban yóho cúu dá da cándéé cáhnu ini Ndióxi. Ta

cúu dá da nandicutú ndaa ínima xihín ínima yii Ndióxi. Ta naçaxi na da naní Felipe xihín Prócoro xihín Nicanor xihín Timón xihín Parmenas xihín Nicolás, da naquixi ñuu Antioquía. Mé Nicolás yóho naçasáhá cándúsa da tá quiahva cándúsa na Israel, nduu joo nandiquehe da íchi cuéntá Jesús. ⁶ Tá nandihí já ñéhe na cúu cuéntá Jesús cán ndíhusa na naxinu coo na nu ndúu na apóstol cán. Anda já naxiça tahví na nu Ndióxi saha ná. Ta nacinúu na apóstol cán ndáha ná jini in in ndíhusa na cán ña ná caja na chuun Ndióxi.

⁷ Ta naçasáhá ndícuja nuu tuhun cahan saha Jesús chí nandicuahá na cúu cuéntá Jesús ñuu Jerusalén. Ta cuahá na cúu jutú cán naçasáhá cándeé ini na Jesús.

Tiin na Esteban

⁸ Ta ndaja coo naçaja cuaha Ndióxi ñamaní xihín in da naní Esteban cán ta nandicutú ndaa ínima dá xihín ínima yii Ndióxi chí naçasáhá cája da cuahá ñaha náhnu xihín ña xitúhún nuú ñayivi. ⁹ Joo in quivi naçasáhá java na cáni táhan yúhu ná xihín mé Esteban. Na cán cúu ná cuéntá veñuhu naní Esclavos Libertados xihín java na ñuu Cirene xihín na ñuu Alejandría xihín na ñuu Cilicia xihín java ga na naquixi ñuu válí ndúu estado Asia naçasáhá cáni táhan yúhu ná xihín dá. ¹⁰ Joo a cuú quee vaha na xihín dá jáchi nasahan ínima yii Ndióxi tuhun ndíchí nuú mé Esteban cán ña ná nducú ñehe da nu ná. ¹¹ Anda já nachahvi na cán java na já ná cahan na tuhun túhún saha Esteban. Ta naçachi na cán ña naxini johó na ña naçanahá Esteban xihín Moisés ta naçanahá da xihín Ndióxi. ¹² Ta xihín ña yóho najándivaa ná ñayivi xihín na sacuaha veñuhu xihín na jánahá ley Moisés. Ta já natiin na da já ñéhe na da cuahan da nuú ndihí na sacuaha ñuu cán. ¹³ Ta nanducú na da cándúsa cavaha tuhun túhún saha Esteban ta já naçasáhá cáhí da cávaha ña tuhún já:

—Cánaḡá da yóho xihín veñuhu cáhnu Ndióxi yóho ta cánaḡá da xihín ley Moisés. ¹⁴ Ta naḡini johu nde cáchí da ña játani Jesús veñuhu cáhnu yóho, mé da naquixi ñuu Nazaret ta ndijama da costumbre najándacoo Moisés nu yo —cáchí da cáhan ña tuhún saḡa Esteban.

¹⁵ Anda já nandicoto nihni na sacuaḡa xihín tóco ndihi na ndúu coo cán nu Esteban já naḡini na nandiyéhe nuu dá tátuhun in nuu táto Ndióxi ndúu indiví.

7

Ndíquehe Esteban saḡa mé dá nuú na sacuaḡa

¹ Anda já nandaḡa tuhún da cúu sacuaḡa nuú jutú cán Esteban já naḡachi da já xihín dá:

—Á ña ndaa cúu ndihi ña cáhan na yóho saḡun.

² Anda já nanducú ñehe Esteban tuhun nu ná já naḡachi da já:

—A juú toho ña ndaa quéa cáhan na jan saḡá i. Joo cuni johu ndó ña ná cahan i xihín ndo, na sacuaḡa xihín ñani i. Saḡahá ndivaḡa tá naḡahin táśahnu jícó yo, da naśananí Abraham ñundáhyi Mesopotamia tá cámaní quee da cuhun da coo da ñuu Harán já naḡaḡa Ndióxi mé á nu dá. Ta mé Ndióxi, xitoho í cúu á in Ndióxi cáhnu ndivaḡa. ³ Ta já naḡachi a já xihín Abraham: “Jándacoo táhún ta jándacoo ñuún ta cuáhán inga ñuu nuú naḡa i nuún coun”, naḡachi Ndióxi xihín dá. ⁴ Anda já najándacoo Abraham ñundáhyi Caldea nuú naḡahin da ta já naquee da cuahán da coo da ñuu Harán. Tá nandihí já naḡihí tátá da ta janda já naśandaca Ndióxi Abraham naquixi da nu ndúu yó viti. ⁵ Joo coo naśahan Ndióxi ñundáhyi nu dá tá naśahin da yóho. Ni in loho ñúhu coo naśahan mé á nu dá mé tiempo cán. Joo naḡachi a xihín dá ña quiaḡa ña nu dá cháḡa chí nuu. Ta naḡachi a xihín dá ña nduu a ñaḡa jaḡhi da tá ná quivi da vatí cámaní cacu

jahyi Abraham mé tiempo já. ⁶ Ta nacachi Ndióxi xihín dá ña tóco ndihi jahyi da xihín na quixi chichi jahyi da cacuu na tátuhun na tóho jáchi canduu na inga ñuu, ña co cúu ñuu na. Ta cán caja chúun na joo a quehe yahvi na sahá chuun caja na ta jándoho ndivaha na cán ini na tixi comi ciento cuia. ⁷ Nacachi tucu Ndióxi xihín dá já: “Joo jándoho i ini ñayivi, na caja xíxi xihín ñayivi quixi chichún. Ta tá nandihí caja i ña ná queta na quixi chichún ta quixi na chóho já ná caja cáhnu na yehe.” ⁸ Ña yóho quea nacachi Ndióxi xihín Abraham tá nasahan tuhun a nu dá. Ta nacachi a xihín dá ña ná chicaan da marca yiquí cuñu da já ná a ndíndójó da sahá tuhun nasahan Ndióxi nu dá. Ta tá nacacu jahyi Abraham, da naní Isaac já nachicaan Abraham marca yiquí cuñu da tá naxinu una quiví nacacu da. Ta quiahva já nacaja ri Isaac xihín Jacob, jahyi da tá nacacu da. Ta sa mé quiahva já nacaja ri Jacob xihín uxu ivi jahyi da tá nacacu da. Ta jahyi Jacob yóho cúu tátá uxu ivi táhnda ñayivi Israel.

⁹ Ta mé jahyi Jacob yóho nasacuu tásáhnu jícó yo joo nacahihvi ini na xihín in ñani na, da naní José. Sahá ña cán quea najicó na da cuahan da nación Egipto. Joo nasahin Ndióxi xihín dá. ¹⁰ Ta nachindee a da nu tóco ndihi ña nandoho ini da ta nasahan cuaha Ndióxi xini túni dá. Ta nacaja mé á ña ná tañan ini Faraón, mé rey nación Egipto cán xihín ña cája José. Sahá ña cán quea nasacu rey cán José ña ná nduu da gobernador saha tóco ndihi nación Egipto cán. Ta nacaja rey cán ña ná cacomí da cuénta sahá vehe mé rey cán viti.

¹¹ Ta in tañu naxinu tama ndeé ta nacasahá ndóho ndivaha ini tóco ndihi ñayivi ndúu nación Egipto. Ta quiahva já nandoho ri ini na ndúu ñundáhyi Canaán ta chí co ñehe ná ña cuxu tásáhnu jícó yo. ¹² Joo tá nacandaq ini Jacob ña iin trigo nación Egipto já nachindahá da jahyi da,

na nasacuu tásáhnú jícó yó cán já nasahan na naxeen na ña cuxu na. Ta tá nasahan na nu cuítí yóho coó nandicuni na ñani na José cán. ¹³ Joo tá nasahan na ña chí ivi chí Egipto cán já najánaḥa José mé dá nuú ñani da. Ta xihín ña yóho nacandaa ini da cúú rey nación Egipto cán ña cúú José da Israel. ¹⁴ Anda já nasahnda José chuun ña ná cañehe na Jacob, tátá da xihín tóco ndihi na vehe da quixi na canduu na ñundáhyi Egipto cán. Ta tóco ndihi na nasahan cán nasacuu na uní jícó sahun ñayivi. ¹⁵ Já naquee Jacob cuahan da coo da Egipto xihín tóco ndihi na vehe da. Ta sa mé cán naxihí da ta cán naxihí jahyi da, na nasacuu tásáhnú jícó yó. ¹⁶ Já nachicaan na ndij cán ini cáva mé Egipto cán joo tá nayaha tiempo já natavá na lásá na já ñehe na ña nasahan na nachicaan na ini cáva mé cama santo ña naxeen Abraham nuú jahyi in da naní Hamor ñuu Siquem cán.

¹⁷ Ta tá nacayati quiví xinú coo ña nasahan Ndióxi tuhun a nu Abraham coo já nacasáhá cácu cuahá jahyi na naquixi chichi Israel. Já nandicuaḥa ná nani ndúu na Egipto cán. ¹⁸ Anda já nacasáhá inga tucu rey cómí da cuéntá sahá ñayivi nación Egipto cán ta mé rey saá cán co xini toho da José. ¹⁹ Ta mé rey yóho najándahvi da tásáhnú jícó yó cán ta nacasáhá cája xíxi da xihín ná. Ta nacaja ndúsa dá xihín ná ña ná jándacoo na jahyi na, na jacá nacacu já ná quivi na. ²⁰ Ta mé tiempo já nacacu Moisés ta nasacuu da in ticuáhá loho ña natahan ini Ndióxi xihín. Ta najácuaḥnu tátá náná Moisés yóho mé dá tixi uní yoo mé vehe mé na cán. ²¹ Joo tá naxinu quiví ndítahan nu ná jándacoo na da já nandiquehe ñá cúú jahyi rey Egipto cán da já najácuaḥnu ñá da tátuhun jahyi ñá. ²² Ta najácuaḥa Moisés tóco ndihi ña xini na ndíchí nación Egipto cán. Ta nandindíchí ndivaha jini dá. Ta nacaja cuahá dá ña náhnú.

²³ Ta tá naxinu Moisés ivi jico cuia já nasacu ini da coto

nihni da ñani táhan da, na naquixi chichi Israel. ²⁴ Tá nacasaá da nu ndúu na cán já naxini da cája xíxi in da Egipto xihín in da Israel. Ta cuni Moisés ndiquehe da sahá da Israel ña cán queá nasahní Moisés mé da Egipto cán. ²⁵ Jáchí nacaán Moisés ña cuu candaa ini na Israel cán ña chindahá Ndióxi da já ná janí da na ndáha na Egipto cán. Joo coó nacandaa ini na ña yóho. ²⁶ Ta inga quiví itaan tá naxinu coo Moisés nu ndúu na Israel cán já naxini da cáni táhan ivi da naquixi chichi Israel. Anda já nacasáhá Moisés sáhdá java táhan da da cán já cáchí da já xihín ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” ²⁷ Anda já nachindahá nihni da cája xíxi xihín ñani táhan cán Moisés já nacachi da já xihín dá: “Ni in toho na coó nasahan chuun nu yóhó cacuún da cacomí cuéntá sahá nde já ná cuu caja viún sahá nde. ²⁸ Á tá quiahva nacajún nasahnún da Egipto cán cuni quiahva já cúnun cajún xihín i”, nacachi da cán xihín Moisés. ²⁹ Tá naxini johó Moisés ña yóho já nayihví ndivaha da chí naxinu da cuahan da chí ñundáhyi cuéntá Madián já nasahin da cán tátuhun in da toho. Ta cán natandaha dá ta nacacu ivi jahyi ta da.

³⁰ Ta tá sa nayaha ivi jico cuia nasahin Moisés Madián cán já nanaha in tátó Ndióxi mé á nu dá tañu in tohíñú cándaha ñuhú mé yucú íchí yati yucú naní Sinaí cán. ³¹ Ta chí nacatontó Moisés xihín ña naxini da nacaja Ndióxi cán. Ta tá nacayati da sándehe da ña já naxini johó da cáhan Ndióxi xihín dá já cáchí a já: ³² “Yehe cúu u Ndióxi nacaja cáhnu tásáhnu jícún Abraham xihín Isaac xihín Jacob.” Anda já nacasáhá quíji Moisés xihín ña yihví da ta coó nasahan ndeé ini da ndicoto nihni da nu cáhan Ndióxi cán. ³³ Anda já nacachi tucu Ndióxi já xihín dá: “Tavá ndusa sahun jáchí yii ndivaha cúu nu sánun jan. ³⁴ Sa naxini i ndá quiahva ndáhví ndóho ñayivi cuéntá mí i, na

ndúu Egipto ta naxini joho i nu tána na sahá ña jándoho na Egipto jan ini na. Sahá ña cán queá vaxi i chindeé e na ta yóhó cacuún da chindahá i cuhun Egipto já ná tavún na nu ndóho ini na cán”, nacachi Ndióxi xihin Moisés.

³⁵ Nacandají na Israel cán Moisés ta nacachi na xihin dá: “Coó na nasacu toho yohó ña ná cacomún cuéntá sahá nde já ná cuu caja viún sahá nde.” Joo Ndióxi queá nachindahá Moisés ña ná cacuu da da cacomí cuéntá sahá na Israel cán ta já ná jácacu da na. Jáchí já nacachi táto Ndióxi xihin dá tá nanaha mé á tañu tohíñu cándaha ñuhu cán. ³⁶ Ta mé Moisés nasahan tucu da mé Egipto cán ta natavá da tóco ndihi na Israel, na nasanduu Egipto cán ta nacaja da cuahá ñaha náhn xihín ña xituhún mé Egipto cán. Ta quiahva já nacaja da xihín tañuhú nani Tañuhú Cuáhá tá nasuná da do nuú nayaha na Israel cán. Ta quiahva já nacaja da cuahá ña náhn yucú íchí nuú naxica na ivi jico cuiá cán. ³⁷ Ta mé Moisés nacaxi tuhun da xihín ñayivi já nacachi da já xihin ná: “Tá quiahva nacaja Ndióxi nachindahá a yehé nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, nacachi Moisés xihin ná. ³⁸ Ta mé Moisés nasahin da tañu ñayivi Israel, na nasacuu tásáhn jícó yo tá naxica na yucú íchí cán. Ta xihin mé da cán nacahan táto Ndióxi jini yucu Sinaí cán. Ta cán nasahan Ndióxi ley nu dá já ná naha da ña nu yo ña ná caca vaha í íchí cuéntá Ndióxi.

³⁹ Joo coó naxeen toho tásáhn jícó yo cuni joho na nuú nacahan Moisés xihin ná. Ña cán queá nacandají na da ta nacasahá ndúcú na ndicó coo na Egipto. ⁴⁰ Ta nani nasahin Moisés jini yucu Sinaí cán já nacachi na xihin Aarón, ñani Moisés já: “Cúni nde ña ná cavahún tiniñu yúu Ndióxi caja cáhn nde ta ná canuu a cuhun a nuú nde. Jáchí co cándaa ini nde ndía nandoho Moisés, da natavá

ndehe nuú nasanduu nde Egipto cán.” ⁴¹ Anda já nacavaha na in yoco ñehe nahná chélo ta já nasahní na quítí najoco na nuú mé yoco cán. Ta nacajii ndivaaha ini na xihín yoco ña nacavaaha mé na cán. ⁴² Anda já najándacoo Ndióxi na já ná caja cáhnu na ndá ña cúni na tátuhun quimi xihín yoo xihín candii. Já nacachi Ndióxi ini libro nacahyí na profeta sanahá:

Ndóhó, na Israel, a juú nu mí i nasahní toho ndó quítí najoco ndó tañu ivi jico cuia nani naxica nuu ndó yucú íchí jan.

⁴³ Ña nacaja ndó queá nacaja cáhnu ndó yoco ña nacavaaha mé va ndó.

Ta nacachi ndó ña cúu mé yoco cán inga ndióxi naní Moloc.

Ta nasañehe ndó ña xihín cáti á tá cuahan ndó.

Ta nacavaaha ndó inga tiniñu quimi nacachi ndó cúu á inga tucu ndióxi naní Renfán.

Ta nasañehe ndó tiniñu cán cuahan ndó caja cáhnu ndó coó nacaja cáhnu ndó yehe.

Ña cán queá tava i ndohó ñundáhyi na Israel ta chindahá i ndohó in ñuu tóho xicá chága a juú ga Babilonia, nacachi Ndióxi xihín na cán —nacachi Esteban xihín na sacuahá ñuu cán.

⁴⁴ Já nacachi tucu Esteban já xihín ná:

—Vatí nacaja cáhnu tásáhnu jícó yo java ga yoco joo nasañehe tá nasañehe na in veñuhu ní quítí cuéntá Ndióxi tá naxica nuu na yucú íchí nuú co ndúu ñayivi cán. Jáchi janda jihna nasahnda Ndióxi chuun nu Moisés tá quiahva coo mé veñuhu ní quítí cán ta nasahnda chuun nu dá ña ná cavaaha da ña xihín ní quítí. Ta ini mé veñuhu cán nataán da yuu jáhnda nu ndáa ley nasahan Ndióxi nu dá sanahá. ⁴⁵ Tá sa nayaha cuahá cuia já naxihí Moisés já nandiquehe da naní Josué chuun ña cañehe da cuéntá

sahá tásáhn̄u jícó yō. Ta mé tásáhn̄u jícó yō naçani táhan na xihín na nasanduu ñundáhyi yóho. Ta naçaja Ndióxi ña ná quee vaha na Israel xihín na cán. Natavá Ndióxi na cán já ná canduu na Israel ñundáhyi yóho ta mé tiempo já na Israel ñéhe na veñuhu níi quítj cuah̄an na. Ta já nasah̄iin a xih̄in ná jand̄a quiví nasacomí David cuéntá sah̄a na Israel. ⁴⁶ Naçaja Ndióxi cuah̄á ñaman̄i xih̄in David sah̄á ña cán queá nasacu ini David cavāha da in nuú coo Ndióxi, mé a naçaja cáhn̄u Jacob sanahá. ⁴⁷ Joo da naçavāha mé vehe Ndióxi cán nasacuu Salomón, jah̄yi David. ⁴⁸ Ta sa cándāa iní ña a juú quiah̄va cáhn̄u cúú Ndióxi ta cō ndácāan toho a ini veñuhu cávaha datāa. Íin in profeta ta naçah̄yí da ña naçachi Ndióxi já:

⁴⁹ Tátuhun in rey, da íin coo silleta vaha, ta chínúu da sah̄a dá jatá in táyi loho, quiah̄va já íin coo i indivi ta chínúu i sah̄a i jata ñuyiví. Yehe cómí i cuéntá sah̄a indivi xih̄in ñuyiví sah̄a ña cán queá cō toho vehe cuu cavāha ndó coo yehe, ta cō xíní ñúhú i in vehe nu ndíquehe ndée.

⁵⁰ Jáchj yehe cúú Ndióxi ña naçavāha tóco ndihi ñaha, já naçachi Ndióxi sanahá —naçachi Esteban xih̄in ná.

⁵¹ Anda já naçachi tucu Esteban já xih̄in ná:

—Joo mé ndó cúú ndó ñayivi sáa ini ta cúú ndó tátuhun na cō xínj Ndióxi. Jáchj cō cúnj ndó cuni joh̄o ndó ña cáchj Ndióxi xih̄in ndō ta cō cúnj ndó candāa ini ndó tuhun Ndióxi. Ta ni cō cúnj ndó quiah̄va ndó ñaman̄i ndih̄vi ínima yij Ndióxi ini ínima ndō. Xíxi ndivaha nasah̄iin ini tásáhn̄u jícó ndō ta quiah̄va já cája ri mé ndó viti. ⁵² Mé tásáhn̄u jícó ndō naçaja xíxi ndivaha na xih̄in ndihi na profeta ta nasahn̄i ñahá na mé na yóho naquixi na cáxi tuhun sah̄a mé a quixi chí nuu, mé a cō cája cuachi. Ta tá naxinu mé a cán já najicó túhún ndó a ta nasahn̄i ndó a.

⁵³ Ta mé ndó cúú ndó na nasahan̄a tátō Ndióxi ley nuu joo

cō cúnĭ ndó caja ndó ña cáchĭ a —ñacachi Esteban xihĭn ná.

Tá ñasahnĭ ña Esteban

⁵⁴ Tá ñaxini johō ña sacuaḥa cán tóco ndihi ña ñacaḥan Esteban já ñaxojo ndivaḥa ini na xihĭn dá chí cáhñá ñuhu na. ⁵⁵ Joo ñandicutú ndaa ínima Esteban xihĭn ínima yĭi Ndióxi ta já ñandicoto nihni da indivĭ já ñaxini da ndá quiaḥva cáhnu cúu Ndióxi ta ñaxini da cándichi Jesús xoo cuáha Ndióxi. ⁵⁶ Anda já ñacachi Esteban já xihĭn ná:

—Candehé ndó. Núná indivĭ xínĭ ĩ ta tívi cándichi Jesús xoo cuáha Ndióxi —ñacachi Esteban xihĭn ná.

⁵⁷ Joo ñachicaji tuun ña cán johō na já ná a cúnĭ johō na ña cáḥan Esteban. Ta ñacasáhá cáyuhú cóhó ña cáti na cuaḥan ña canĭ na da. ⁵⁸ Natavá ña mé Esteban yuhú ñuu ta cán ñacasáhá cúun na yuu dá. Ta mé ña ñajácojo cuaḥi jata Esteban cán ñatavá ña cotó ña ta ñachinduu tóo na ña ñuú in da tacú nanĭ Saulo cándichi cán. ⁵⁹ Ta nani cúun ña cán yuu Esteban já ñacasáhá mé Esteban xíca taḥví da ñu Ndióxi já cáchĭ da já:

—Jesús, mé ndó cúu xitohō ĩ. Ndiqehē ndó ínima ĩ viti.

⁶⁰ Anda já ñacaxítĭ Esteban já ñacasáhá cáyuhú cóhó da já ñacachi da já:

—Jesús, xitohō ĩ, a quéhe ndó cuéntá saḥá cuaḥi cája ña yóho.

Tá ñandihi ñacachi Esteban tuhun yóho já ñaxihĭ da.

8

Cásáhá Saulo cája xíxi da xihĭn ña cúu cuéntá Jesús

¹ Ta mé hora ñasahnĭ ña Esteban cándichi Saulo sán-dehē da ta ñatahan ini da xihĭn ña ñasahnĭ Esteban cán.

Ta mé quivĭ cán ñacasáhá ña cája xíxi chága ña xihĭn ña cúu cuéntá Jesús ndúu ñuu Jerusalén cán. Chí tóco ndihi ña cúu cuéntá Jesús ñandicuĭta nuu na ndijáá chí

estado Judea xihín estado Samaria. Joo mé na apóstol cuití va coó naxita nuu toho na. Naçandoo na ñuu Jerusalén. ² Ta java dataa nandiquehe na yiquí cuñu Esteban cuahan na jánduxu na da tá quiahva ín costumbre na ta a juú quiahva nasacu na saha dá. ³ Ta mé Saulo naçaja xíxi chága da xihín na cúu cuéntá Jesús ta naquihvi da vehe tá vehe na ta ñúhu da na ta táva da na jata véhe. Coó caja toho á cúu ná taa á cúu ná ñaha ta já ñéhe da na cuahan na vecaa.

Cáhan na cúu cuéntá Jesús tuhun vaha saha mé á nuú na estado Samaria

⁴ Ta na cúu cuéntá Jesús tá nandicuíta nuu na jata ñuu Jerusalén cán naçaxi tuhun na tuhun vaha saha Jesús níi cúu nu xíca na cuahan na. ⁵ Ta ndaja coo in da cúu cuéntá Jesús naní Felipe naquee da cuahan da chí in ñuu cuéntá Samaria ta cán naçasáhá da cáhan da saha Jesucristo nuú ñayivi. ⁶ Naçasáhá ndítutú cuahá ñayivi nu dá ta xihín ndinuhu ini na taa johu na nu cáhan da xihín ná jáchi naxini xihín nuu ná cuahá ñaha náhnu cája Felipe. ⁷ Nandaja vaha da cuahá ñayivi, na nasañuhu ínima quini ini chí cáyuhú cóhó mé ínima quini cán tá quéta ini na quihvi cán. Ta nandaja vaha ri da cuahá na naxihí tuchu ta nandaja vaha ri da na xíca rénco. ⁸ Saha ña cán quéa naçajii ndivaha ini ñayivi ñuu cán xihín ña naçaja da.

⁹ Ta mé ñuu cán nasahii in da tají naní Simón. Mé Simón yóho nasacuu da in taa, da najándahvi ñayivi Samaria cán jáchi nasacachi da ña cúu dá in da ín ndivaha saha. ¹⁰ Ta tóco ndihi mé ñayivi ñuu cán, á cúu ná na ndahví á na náhnu, nasaxini johu na xihín ndinuhu ini na nuú nasacahan da, nduu. Ta naçachi na saha dá ña cája da ña náhnu tá quiahva cája Ndióxi. ¹¹ Ta nasacandúsa na nuú nasacahan da xihín ná jáchi tixi cuaha tiempo najándahvi da na xihín ña tají. ¹² Ta ndaja coo naçasáhá na cándúsa na ñuu cán tuhun vaha cáhan Felipe saha

Jesucristo, ña cacomí Ndióxi cuénta saha ná tá ná candeeé ini na Jesucristo. Ta já nacasáhá na cándúta ná, òa xihin ñáha viti. ¹³ Ta janda mé Simón cán nacandúsa da ta nacandúta dá já nacasáhá xíca nuu da xihin Felipe. Ta chí cátóntó da xíní da ña náhnu xihín ña xitúhún cája Felipe cán.

¹⁴ Ta tá ñañehé na apóstol ndúu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já nachindahá na Pedro xihin Juan estado Samaria cán. ¹⁵ Ta tá ñaxinu coo Pedro xihin Juan estado Samaria cán já ñaxíca òahví na nu Ndióxi sahá na cúu cuénta Jesús cán ña ná chutú ndaa ínima ná xihin ínima yii Ndióxi. ¹⁶ Jáchi sa nacandúta ná cuénta Jesucristo saha ña candeé ini na mé á joo a ñáha chutú ndaa ínima ná xihin ínima yii Ndióxi. ¹⁷ Anda já chójó Pedro xihin Juan ndáha dá jiní in in na cán nani xíca òahví da nu Ndióxi já nachutú ndaa ínima ná xihin ínima yii Ndióxi.

¹⁸ Tá ñaxini Simón ña nachutú ínima na cúu cuénta Jesús cán xihin ínima yii Ndióxi tá chinúu na apóstol ndáha ná jiní ná já cúní da cueen da ndée Ndióxi cán. ¹⁹ Já nacachi Simón já xihin ná:

—Quiahva ndó ndée cómí ndó ñan nuú i já ná cacomí ri yehe va ña já quea ndá na ná chinúu i ndahá i jiní ná cuu ndicutú ndaa ínima ná xihin ínima yii Ndióxi.

²⁰ Anda já nanducú ñehe Pedro tuhun nu dá já cáhí da já xihin dá:

—Ná jándihi Ndióxi sahun xihín saha jiuhún cómún jáchi cáhún ña cuu cueún ña jása maní uun Ndióxi nuú ñayivi. ²¹ Coó saha tohún cajún ña cája nde yóho jáchi co ín vaha toho ínimum nu Ndióxi. ²² Xíní ñúhú jándacoún ña núu cáhvi inún ñan ta ndítahan caça òahvún nu Ndióxi já ná candehé mé á á caja cáhnu ini a sahun jáchi núu ndivaha cáhvi inún. ²³ Jáchi náha cáxí ña cáhíhvi ndivaha

inún. Cúu á tátuhun mé ña quini ñacató a yohó chí cájún ña núu.

²⁴ Anda já ñanducú ñehe Simón tūhun nū Pedro já cáchí da já:

—Caca tahvi ndó nū Ndióxi sahá i já ná a quíxi ña núu cáchí ndó ñan nūú i —ñacachi da xihin ná.

²⁵ Tá ñandihí ñandicani Pedro xihin Juan sahá ña ñacaja Ndióxi xihin ná. Ta tá ñandihí ñacahan ña tūhun Ndióxi nūú ña cán já ñaquee na ñasahan ña cáhan ña tūhun Ndióxi, ña cuu jácacu ñayivi ndijáá ñuu válí ñúhu chí estado Samaria cán. Anda jáví ñandicó coo tucu na chí ñuu Jerusalén.

Cáhan Felipe saha Jesús nūú in da ñaquixi nación Etiopía

²⁶ Tá sa ñayaha ña yoho já ñaxinu in táto Ndióxi nū íin Felipe estado Samaria cán ta já cáchí a já xihin dá:

—Cuáhán chí sur nū quée íchi ña quéta ñuu Jerusalén cuahan chí ñuu Gaza —ñacachi táto Ndióxi xihin dá.

Ta mé íchi cán yáha nūú co ndúu ñayivi jáchi íchí ndivaha. ²⁷ Anda já ñaquee Felipe cuahan da. Ta íchi nū xíca da cuahan da cán ñanditahan da in dataa, da ñaquixi nación Etiopía. Mé da Etiopía yoho cúu dá in taa cáhnu nación dá jáchi cúu dá da cómí cuéntá sahá jjuhún ña cúu ñaha ña nani Candace, ña cómí cuéntá sahá ñayivi nación Etiopía. Mé da yoho sa ñasahan da ñuu Jerusalén caja cáhnu da Ndióxi. ²⁸ Ta tá cuahan tucu da íchi ndicó coo da Etiopía cán ta nani íin coo da jata carreta já cáhvi da libro ñacahyí profeta Isaías. ²⁹ Anda já ñacahan ínima yii Ndióxi xihin Felipe já ñacachi a já xihin dá:

—Cativi jíin carreta cuahan ñan.

³⁰ Anda já ñacayati Felipe jíin carreta cán ta já ñaxini johó da cáhvi da Etiopía cán libro Isaías. Anda já ñandaca tūhún Felipe da já cáchí da já xihin dá:

—Á cándaá inún ña cáhvún ñan.

³¹ Andá já nanducú ñehe da Etiopía cán tũhun nu Felipe já nacachi da já:

—Ndaja caja i candaã ini i ñã cáhvi i tá coó na ndicani nuú i ndía cúní cachi a —nacachi da Etiopía cán xihĩn Felipe.

Andá já naxica da ñamaní nu Felipe ñã ná ndaa da jatá carreta da já ná cacoo da xihĩn dá ta ná ndicani da nu dá ñã cúní cachi a. Chí nandaa Felipe carreta cán.

³² Ta cáhvi da Etiopía cán tũhun Ndióxi nu cáchí a: Tá quiahva ñehe na in ndicachi cuahãn rí quivi rí quiahva já nasãehe na da cuahãn da quivi da. Ta tá quiahva cája ndicachi tá co ndáhyi ri nani ndíjatá na ri quiahva já nacaja mé dá jáchi coó nasuná da yũhu dá cahãn da.

³³ Nacaja xixi ndivaha na xihĩn dá ta coó nacaja ndaa na xihĩn dá. Jáchi janda na naquixi chichi nuú naquixi mé dá coó nandiquehe na saha dá.

Ñã nacaja na queã nasahní na da já ná a cóo ga da ñuyíví yóho, cáchí tũhun Ndióxi nu cáhvi da Etiopía cán.

³⁴ Andá já nandaca tũhún da Etiopía cán Felipe já cáchí da já xihĩn dá:

—Ta viti caja ndó ñamaní ndicani ndó nuú i ndía cúní cachi a yóho. Á saha mé va profeta yóho cahãn da á sahá inga va da cahãn da.

³⁵ Andá já nacasáhá Felipe ndicani da nuú da cán ñã nacahyí Isaías já nandicani da tũhun vaha saha Jesús nu dá. ³⁶ Ta tá yáha na cuahãn na nu ñũhu ticuíf já nacachi da Etiopía cán já xihĩn Felipe:

—Yóho ñũhu ticuíf. Á cuu caja ndúta ndó yehe —nacachi da xihĩn Felipe.

³⁷ Andá já nacachi Felipe xihĩn dá:

—Tá cándeé ini ndó Jesús xihín ndinuhu ini ndó ta cuu va candúta ndo.

Anda já nanducú ñehe da cán tuhun nu Felipe já cáchi da já:

—Cándúsa i ña cúu Jesucristo in túhún jini já jahyi Ndióxi —ñacachi da Etiopía cán.

³⁸ Chí ivi laá ñasahnda da Etiopía cán chuun ña ná cani ndichi na carreta cándójó ña cuahan ña cán. Anda já ñanuu ndívi da cuahan da nu ñúhu ticuí ta já najacandúta Felipe da Etiopía cán. ³⁹ Tá ñandihi ñaquee na ini ticuí cán já ñehe ínima yii Ndióxi Felipe cuahan da inga xoo chí coó ñaxini táhan chága da xihín da Etiopía cán. Joo cájii ini da Etiopía cán cuahan da íchi. ⁴⁰ Tá ñandicoto nihni Felipe sa ín da in ñuu naní Azoto. Ta tá ñuu tá ñuu cuahan da cáhan da tuhun vaaha saha Jesús nuú ñayivi anda quiahva ñaxinu coo da ñuu Cesarea.

9

Ndíquehe Saulo íchi cuénta Jesús (Hch. 22:6-16; 26:12-18)

¹ Joo ndaja coo da naní Saulo cája xíxi tá cája xíxi da xihín ña cúu cuénta Jesús. Ta sácú ini da ndaja caja da cahni da ña. Ta sahá ña cúni da jándihi da saha ná sahá ña cán quea ñasahan da cáhan da xihín da cúu sacuaha nuú jutú ² ña ná quiahva na in carta nu cáhan ña ñehe dá ñamaní quihvi da veñuhu ñúhu ñuu Damasco já ná ndinducú da ña ndíco íchi cuénta Jesús já ná cató da ña cañehe da ña quixi na cuhun ña vecaa ñuu Jerusalén. Co cája toho a á cúu ná ñaa á ñáha. Chí ñaquee Saulo ñuu Jerusalén xihin mé carta. ³ Joo nani xíca da cuahan da íchi tá sa yati xinú coo da ñuu Damasco já in náá cuití ñandiyihvi ndaa ñúhu jata dá. Mé ñúhu yóho ñaquixi a

chí indiví. ⁴Chí iyi laá nandicava Saulo nu ñúhu. Andá já naxini joho da cáhan in a xihin dá já cáchí a já xihin dá:

—Saulo, Saulo. Ndá cuéntá queá cája xísún xihín i — cáchí a xihin dá.

⁵Andá já nacasáhá ndáca tühún Saulo já cáchí da já:

—Yo cúu ndó, na cáhan. Ndaja naní ndo —cáchí da.

Andá já nanducú ñehe a cán tühun nu dá já cáchí a já xihin dá:

—Yehe cúu u Jesús, mé a cája xísún xihin. Ta xihín ña cájún yóho cúu á tátuhun cája xísún xihin mé vún jáchi cájún tátuhun cája in tindiquí tá sáni ndaa rí nu yócó poya ta jándicuehe ri mé va rí.

⁶Andá já nacasáhá quíji Saulo xihín ña yíhvi da já nacachi da já:

—Cáhan ndó xihín i, xitoho i ndía queá cúni ndó ná caja i —cáchí da.

Andá já nanducú ñehe Jesús tühun nu dá já cáchí a já xihin dá:

—Cuándacoo ta cuáhán quíhvi ñuu Damasco. Ta jan cáhan na xuhun ndía ndítahan cajún —cáchí Jesús.

⁷Ta tóco ndihi da cáshah xihin Saulo cán nayíhvi ndivaha da jáchi naxini joho da ña cáhan cán vatí coó ñayivi ná xini da. ⁸Tá nandihí já nandacoo Saulo nu ñúhu. Joo tá nasuná da nduchú núu da chí co tívi ga nuu dá. Sahá ña cán queá jándá tñin ndaa na da cuahán da chí Damasco.

⁹Cán nasahin cuáa da tixi uní quívi ta chí coó naxixi da ta ni ticuí coó naxihi da.

¹⁰Mé ñuu Damasco cán nasahin in da cúu cuéntá Jesús naní Ananías. Ta ndaja coo naxini ndímáhnú da Jesús ta nacahan xihin dá já nacachi a já:

—Ananías.

Andá já nanducú ñehe da tühun nu á já cáchí da já:

—Yóho ín i. Ndía cúni ndo, xitoho i.

¹¹ Anda já nacachi Jesús xihin dá:

—Candichi ta cuáhán cáyé naní a Ndacú Ndaa. Ta vehe da naní Judas cán ndaca tuhún sahá in da naní Saulo, da nacacu ñuu Tarso. Viti ñúhú xíca tahví da nu Ndióxi ndacaan da. ¹² Jáchi naxini ndímáhnú da ña quíhvi mún, Ananías vehe nu ndacaan da. Ta naxini da ña chínúún ndahún jini dá ta já cuu candehé tucu da —nacachi Jesús xihin Ananías.

¹³ Tá naxini joho Ananías ña yóho já nacachi da já:

—Candehé ndo, xitoho i. Yíhvi i cuhún i jáchi sa cuahá ndivaha ñayivi ndícani nuú i sahá mé Saulo jan. Ta ndícani na nuú i nda quiahva xíxi cája da xihin na cúú cuéntá mé á, na ndúú ñuu Jerusalén. ¹⁴ Ta viti vaxi da jan ñuu yóho jáchi sa naxica da ñamaní nuú na sacuaha nuú jutu ña ná cuu játaca da tócó ndihi na cája cáhnu mé ndó já ná cañehe da na cuhún na veca —nacachi Ananías.

¹⁵ Anda já nacachi Jesús já xihin Ananías:

—Cuáhán quíi jáchi sa nacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómi cuéntá sahá na cán. Ta nacaxi i da ña ná cahan da sahá i nuú na naquixi chi chi Israel viti. ¹⁶ Ta jánaha i nu dá nda quiahva ndítahan ndoho ini da sahá i —nacachi Jesús.

¹⁷ Anda já naquee Ananías cuahan da vehe nu ín Saulo cán. Tá naxinu da cán já nachinúu da ndaha dá jini Saulo já nacachi da já xihin dá:

—Ñani Saulo. Mé Jesús, xitoho í, mé á naxinún nuú naquisún íchi cán, mé á cán quea nachindahá yehe vaxi i já ná ndinuna nduchú núún já ná cuu candehé tucún. Ta já cúni Ndióxi ña ná ndicutú ndaa ínimun xihin ínima yii mé á —nacachi Ananías xihin Saulo.

¹⁸ Chí ivi laá nacasáhá cúyu ñaha tátuhun runchu tiyacá nduchú núú Saulo chí nanuna nuú dá sándehé tucu da. Anda já nasahan Saulo nacandúta dá. ¹⁹ Tá nandihi já

naxixi da ta nandihvi tucu ndée dá ta nasahin tóo da chá quivi xihin na cúu cuéntá Jesús ndúu ñuu Damasco cán.

Cáhan Saulo saha Jesús nuú ñayivi ñuu Damasco

²⁰ Tá nandihí já nacasáhá Saulo jánaḥa da tūhun Ndióxi ini veñuhu ta jánaḥa da ña cúu Jesús in túhún jini já jahyi Ndióxi. ²¹ Ta tóco ndihí na táa johó nu cáhan da cátóntó na cája da. Já cáchi xihin táhan na já:

—Á a juú da yóho cúu da nandicuíta cája xixi xihin na cúu cuéntá Jesús ñuu Jerusalén, nduu. Á a juú sa mé da yóho vaxi da tiin da na cúu cuéntá Jesús mé ñuu yóho já ná cūhun na nuú na sacuaḥa nuú jutū já ná taán ñahá na vecaa —nacachi xihin táhan na.

²² Joo ví ga ví ndíndeé ini Saulo cáhan da tūhun Ndióxi. Ta náḥa da nuú ñayivi ña mé Jesús cúu Cristo, mé á nachindahá Ndióxi cacomí cuéntá sahá ñayivi. Janda quiaḥva já najajaca da xini túni na naquixi chichi Israel ndúu Damasco cán xihin tūhun cáhan da xihin ná.

Xínu Saulo nuú java na Israel jáchi cuni na cahní na da

²³ Tá sa nayaha cuahá quivi já najándique táhan na naquixi chichi Israel cán tūhun na ña cahní na Saulo.

²⁴ Joo nacandaa ini Saulo ña ndúcú na cahní na da. Ta mé na ndúcú cahní Saulo cán nasandati na ñuu ta ndiví yéhé ñuu cán janda quiaḥva ná queta da já ná cahní na da.

²⁵ Joo in ñuu na cúu cuéntá Jesús ndúu ñuu Damasco cán nachicaan na da ini in toyicá cáhnu já najánuu na da ndica náma cáhnu ndájí yuhú ñuu cán já nacacu da ta naquee da cuahan da.

Cuahan Saulo ñuu Jerusalén

²⁶ Tá naxinu coo Saulo ñuu Jerusalén já nanducú da ndique táhan da xihin na cúu cuéntá Jesús ndúu cán. Joo tóco ndihí na cán nayihví na da jáchi co cándúsa na ña sa nandiquehe da íchi cuéntá Jesús. ²⁷ Joo nandiquehe

Bernabé saha Saulo. Nasahan da najánaḥa da da nuú na apóstol cán já ná ndique táhan na xihín dá. Ta nandicani Bernabé nu ná ndaja nasahiin tá naxini Saulo Jesús íchi nu xíca da cuahan da chí ñuu Damasco. Ta nandicani da ña naçahan Jesús xihín Saulo. Ta nandicani da ña coó nayihví Saulo çahan da saha Jesús ñuu Damasco. ²⁸ Anda já nandiquehe na Saulo ta naçandoo da ñuu Jerusalén. Ta naçasáhá xíca nuu da xihín na apóstol. ²⁹ Ta co yíhví da çahan da sahá Jesús. Ta nanditúhún da xihín na naquixi chichi Israel, na çahan tuhun griego ndúu ñuu cán. Joo mé na cán ndúcú na ndá quiahva caja na cahní na da. ³⁰ Tá naçandaa ini na cúu cuéntá Jesús ña ndúcú na cahní na Saulo já ñéhe na da cuahan da ñuu Cesarea. Anda já nachindahá na da cuanúhu dá ñuu Tarso.

³¹ Anda já nanduu vaha ini tóco ndihi na cúu cuéntá Jesús ndúu ndijáá estado Judea xihín estado Galilea xihín estado Samaria. Ta nandindacú chága ví ini na xihín tuhun Ndióxi. Ta xihín ndinuhu ini na cája çahnu na Ndióxi. Ta chindeé ínima yij mé á na. Ta já nandicuaḥa chága na cuahan na.

Ndivaha in da naní Eneas

³² Ta ndaja coo xíca nuu Pedro xíto nihni da na cúu cuéntá Jesús ndúu ñuu válí cán. Ta já nasahan ri da xíto nihni da na cúu cuéntá Jesús ndúu ñuu Lida. ³³ Cán nanditahan da in dataa naní Eneas, da naxihi tuchu saha. Ta tixi una cuia nasandúhu dá jáchi a cuú caca da. ³⁴ Anda já naçahan Pedro xihín dá já naçachi da já:

—Eneas, viti ndája vaha Jesucristo yohó. Cuáhán nda-
coo. Nditivún yívun —cáchi Pedro xihín dá.

Chí ivi laá nandacoo Eneas. ³⁵ Tóco ndihi na ndúu ñuu Lida xihín na ñuu Sarón naxini na da nandivaha yóho ta anda já najándacoo na costumbre yatá nasacaja na já nandiquehe na íchi cuéntá Jesús, xitoho í.

Ndítacu in ñáñáha naní Dorcas

³⁶ Ta ndaja coo ñasahjin in ñáñáha, ñá cúu cuéntá Jesús ñuu Jope. Ta mé ñáñáha yóho naní ñá Tabita ta tuhun griego cáhí na Dorcas xihin ñá. Ta mé Dorcas yóho níi tiempo ñandíhi ini ñá cája ñá ñamaní xihín ñayivi ta ñachindeé ñá na ñandahví. ³⁷ Ta mé tañu já ñaquehe cuehe Dorcas ta ñaxihí ñá. Ta tá sa ñandicata na yiquí cuñu ñá já ñéhe na ña ñasahan na ñachindúhu ná ña piso ñinu vehe cán. ³⁸ Ta yati va ñéhe táhan ñuu Jope cán xihín ñuu Lida nu ín Pedro. Tá ñacandaa ini na cúu cuéntá Jesús ña ín yati Pedro já ñachindahá na ivi dataa ñasahan da cana da Pedro ña ná cuhun quíi dá ñuu Jope cán.

³⁹ Anda já ndáca táhan Pedro cuahan da xihín ndívi dataa cán. Tá ñaxinu coo Pedro ñuu Jope cán já najáquihvi na da ini vehe nu ndácaan mé ndíi Dorcas cán. Nataka tiyivi cuahá najihí cuáan ndúu na sácu ndivaha na saha ñá ñaxihí cán. Ta najána ha na jáhma ña ñacavaha Dorcas nu dá tá ñasatacu ñá. ⁴⁰ Anda já ñacachi Pedro xihín ndíhi ñayivi ndúu cán ña ná quee tóo na jata véhe. Tá sa ñaqueta na cán já ñacaxítí da xíca tahví da nu Ndióxi. Anda já ñacasáhá sándehe da ndíi cán já ñacasáhá cáhí da já xihín ña:

—Cuáhán ndacoo, Tabita.

Tá ñacachi da já chí ivi laá ñanuna nduchú núu ña ñanditacu ñá. Tá ñaxini ñá Pedro já ñasacoo ñá. ⁴¹ Anda já ñatiin Pedro ndáha ña já ñandiñehe da ña. Anda já ñacana da na cúu cuéntá Jesús xihín na cuáan cán ná quihvi tucu na cán jáchí sa ñanditacu ñá. ⁴² Tóco ndíhi ñayivi ñuu Jope cán ñacandaa ini na ña ñanditacu Dorcas chí cuaha ná ñacandúsa na Jesús ta ñandíhvi na íchí cuéntá mé á. ⁴³ Ta chí ñacandoo Pedro cuahá quívi ñuu Jope cán. ñacandoo tóo da vehe in da naní Simón, da ndája víi níi quítí.

10

Cáhan Pedro tũhun vaha saha Jesús nu Cornelio

¹ Ta ndaja coo ñasahjin in dataa naní Cornelio ñuu Cesarea cán. Ta mé Cornelio yóho cúú dá da cómí chuun nuú iñu ciento soldado. Ta mé táhndá soldado yóho naní a Táhndá Italiano. ² Ta mé Cornelio yóho xihjin tóco ndihi na vehe da cája cáhnu na Ndióxi xihín ndinuhu ini na. Ta jásá da jiuuhún da ña chindeé da na ñaquixi chichi Israel. Ta níí tiempo xíca tahví da nu Ndióxi. ³ In quiví tátuhun caa uní sahini nani xíca tahví da nu Ndióxi já ñaxini cáxí táhyí da ñaquihvi in tátō Ndióxi ini vehe nu ndácaan da já ñacachi a já xihjin dá:

—Cornelio.

⁴ Ta chí ñayihví Cornelio sándehe da tátō Ndióxi cán. Anda já ñacachi da já:

—Ndía cúni ndo, tátō Ndióxi.

Anda já ñanducú ñehe tátō Ndióxi cán tũhun nu dá já cáxí a já xihjin dá:

—Xíni joho Ndióxi tá xíca tahvún nu á ta sa xíni a ña ñachindeé cuahún na ndahví. Ta táhán ini mé á xihín ña cájún. ⁵ Ta viti cúni Ndióxi ña ná chindahún java dataa ná cuhun da ñuu Jope já ná cana da da naní Simón, da cáhan tucu na Pedro xihjin ná quixi da. ⁶ Iin tóo Pedro vehe inga da naní Simón, da ndája víí níí quítí. Ta yati yuhú tañuhú iin vehe da. Ta mé Pedro cán caxi tũhun da xuhun ndía ndítahan nuun cajún —ñacachi tátō Ndióxi cán.

⁷ Tá sa ñaquee tátō Ndióxi cán cuahan já ñacana Cornelio ivi mozo da ta ñacana da in táhan soldado, da cómí da cuéntá saha. Ta mé soldado yóho cúú dá in da cája cáhnu Ndióxi. Ta cándeé ini Cornelio da. ⁸ Ta tá ñandihí ñandicani Cornelio nu ndihuni da ña ñacachi tátō Ndióxi xihjin dá já ñachindahá ñahá da cuahan da ñuu Jope.

⁹ Ta inga quiví itaan xíca nā cán cuahān nā íchī ta sa yati xinu coo na ñuu Jope. Ta cúú á tátuhun caxivi ta mé hora já nandaa Pedro jini véhe caça tahví da nu Ndióxi. ¹⁰ A juú quiahva cuíco Pedro chí naxica da ña cuxu da. Ta nani cája ndíví nā ña cuxu da já najánaḥa Ndióxi in ñaha nu dá. ¹¹ Ta ña naxini da quea nandinuna indiví já nanuu in jáhma cáhnu tátuhun in sábaḥa ña ndíco ndícomí tito ta núu a vaxi ñuyiví yóho xíní da. ¹² Ta mé ini jáhma cán ñúhu tá nuú quítí, rí comí saḥa xihín coo xihín laa viti. ¹³ Anda já naxini johō da cáhān in a xihín dá já nacachi a já:

—Pedro. Candichi ta cahní quítí jan casún.

¹⁴ Anda já nanducú ñehe Pedro tuhun já cáchí da já:

—A cája toho i já, xitoho i jáchī ni in túhún tañu a ñaha caxí i quítí quini tátuhun rí yóho. Jáchī cáchí ley nasahan ndó nuú nde ña ná a cáxí toho nde rí —cáchí Pedro xihín á.

¹⁵ Anda já nacahan tucu a xihín dá já nacachi a já:

—Sa nandaja víi va Ndióxi rí jan. Saḥá ña cán quea co ndítahan cachún ña cúú rí rí quini —cáchí a xihín dá.

¹⁶ Tixi uní táhndá naxini da ña yóho nacaja Ndióxi. Anda já nandindita tucu jáhma cán cuahān chí indiví.

¹⁷ Chí nacasáhá ndícani ini Pedro ndía cúní cachi ña naxini da. Ta xihín ña yóho naxinu coo ndíhuní dataa, da nachindahá Cornelio mé vehe nu ín Pedro cán. Jáchī vaxi da ndaca tuhún da saḥá vehe Simón janda quiahva nanditahan da ña. ¹⁸ Ndíta ndíhuní da cán yuyéhé vehe Simón ta cáyuhú da ndaca tuhún da saḥá in da naní Simón, da cáhān tucu na Pedro xihín. ¹⁹ Ta nani ndaca tuhún nā yóho ín yii va Pedro jini véhe cán ndícani ini da saḥá ña naxini da nacaja Ndióxi cán. Anda já nacahan ínima yii Ndióxi xihín dá já cáchí a já:

—Candehé, nandai cuu uni taa vehe yóho ta ndínducú da yohó. ²⁰ Cuáhán nuu cuhún xihín dá ta a ndícani inún jáchi mí i nachindahá i da vaxi —cáchi a xihín Pedro.

²¹ Anda já nanuu Pedro já naxinu da nu ndíta dataa nachindahá Cornelio cán. Já nacachi Pedro já xihín dá:

—Yehe cúú Pedro, da vaxi ndó ndínducú ndo ta viti cachi ndó xihín i ndá quea cúni ndo.

²² Anda já nanducú ñehe da cán tuhun nu Pedro já cáchi da já:

—Da naní Cornelio cúú da nachindahá ndehe vaxi nde. Mé Cornelio cúú dá in da cómí cuéntá sahá ĩñu ciento soldado. Mé dá cúú dá in taa cája ña nda. Ta cája cáñu da Ndióxi. Ta quíhvi ndivaha ini na Israel da. Ta nacahan in táto Ndióxi xihín dá ña ná chindahá da ndehe cana nde ndohó cuhun ndó vehe da já ná cahan ndó xihín dá ndá quea cúni Ndióxi caja da —cáchi da xihín Pedro.

²³ Anda já najáyaha Pedro ndíhuni dataa cán ini vehe. Já nacandoo da cán naquiji da ñuu vehe Simón cán. Ta inga quíví itaan já naquee Pedro cuahan da xihín ndíhuni dataa cán. Ta ndáca Pedro java na cúú cuéntá Jesús ndúu ñuu Jope cán cuahan na xihín dá.

²⁴ Anda inga quíví itaan já naxinu coo na ñuu Cesarea nu ín Cornelio ndáti da na. Mé Cornelio yóho sa najátaca da tócó ndihi na vehe da xihín java na ñehe táhan vaha xihín dá ndúu na xihín dá ndáti na saa Pedro. ²⁵ Tá naxinu coo Pedro vehe cán já naqueta Cornelio ndiquehe ñahá da. Ta tá nandihí já nacaxítí Cornelio nu Pedro ña caja cáñu ñahá da. ²⁶ Joo nasacu ndichi Pedro da já nacachi Pedro já xihín dá:

—Candichi jáchi ñayivi xihín mé vún cúú yehe.

²⁷ Sa já cáhan Pedro xihín dá ndáca táhan da nandihvi da ini vehe. Ta tá nandihvi da cán já naxini Pedro

nanditútú cuahá ñayivi ndúu na cán. ²⁸ Anda já nacasáhá Pedro cáhan da xihín ná já cáchí da já:

—Sa xíní vaha ndó ña cúu yehe in da naquixi chichi Israel. Ta sa xíní ndó ña sáhndá ley nuú nde ña ná a catáhan nde xihín ñayivi tóho. Ta ni vehe na ná a ndihvi nde cáchí ley. Joo viti najánaḥa Ndióxi nuú i ña co cúu ndehe ñayivi ví chága a juú ga ndóhó, na tóho. ²⁹ Sahá ña cán quéa tá nacana ndó yehe ivi laá naquee e vaxi i. Ta ni coó nandaja ndíchí i da ndáca yehe vaxi i yóho. Ta viti cúní candaḥ ini i ndá cuéntá quéa nacana ndó yehe vaxi i —cáchí Pedro.

³⁰ Anda já nanducú ñehe Cornelio tūhun nu Pedro já cáchí da já:

—Janda comí quivi tátūhun hora viti, xijuhun i ta xíca tahví i nu Ndióxi ndácaan i vehe e. Ta tá nasandehé e já naxini i in dataa ndíxí jahmá yéhe cándichi da nuú i. ³¹ Já nacachi da já xihín i: “Cornelio, sa xíní joho Ndióxi nu xíca tahvún nu á. Ta quéhe a cuéntá sahá ñamani cájún xihín na ndahví. ³² Ña cán quéa chindahá java dataa ná cūhun da ñuu Jope cana da Simón, da cáhan tucu na Pedro xihín ná quixi da cahan da xūhun. Viti ín tóo da vehe in da naní Simón, da ndája ví ní quítí. Ta yati yuhú tañuhú ndácaan vehe da”, nacachi táto Ndióxi cán xihín i. ³³ Sahá ña cán quéa ivi laá nachindahá i mozo i nasaa da nducú da ndohó. Ta vaha nacaja ndó vaxi ndó. Ta viti nanditútú ndihi nde ndátí nde nu Ndióxi. Ta cúní nde cuni joho nde tóco ndihi ña nasahnda Ndióxi nu ndó cachi ndó xihín nde —cáchí Cornelio xihín Pedro.

Cáxi tūhun Pedro nuú ñayivi vehe Cornelio

³⁴ Anda já nacasáhá cáhan Pedro já nacachi da já:

—Viti candaḥ ini i ña coó na náhnu chága a juú ga inga na nu Ndióxi jáchí nu mé á in cúu ndihi ví. ³⁵ Ña cája mé á quéa ndíquehe vaha ndá ñayivi nacuu tá cándéé ini na

mé á ta cája na ña vaha. Coó caja toho a á cúu ná na Israel á na tóho. ³⁶ Naçaxi tuhun Ndióxi nuú ñayivi Israel ndá quiãhva cuu coo vaha ini na tá cãdeé ini na Jesucristo, mé á cúu xitoho toco ndihí. ³⁷ Sa cándaã ini ndó ndaja nasahijn tá naçasáhá Juan cáxi tuhun da nuú ñayivi ndúu estado Galilea ña ná ndicó coo ini na nuú cuachi na ta já ná candúta na. Ta nãdicuita nuu tuhun ndijáá nu ndúu na Israel. ³⁸ Ta sa cándaã ini ndó ndaja naçaja Ndióxi xihin Jesús, mé a naquixi ñuu Nazaret. Najãndicutú ndãã Ndióxi Jesús xihin ínima yii mé á ta najãndicutú a ña xihin ndée mé á. Ta mé Jesús naçica nuu a cája ndinuhu ña vaha xihín ñayivi. Ta nãndaja vaha mé á na nasandoho ini naçaja tiñáhá saçuaha. Naçaja Jesús ña yóho jáchi nasahijn Ndióxi xihin á. ³⁹ Ta mé nde, na apóstol cúu na naçini ña naçaja Jesús tóco ndihi ña yóho tá nasahijn a estado Judea ta tá nasahijn a ñuu Jerusalén. Andã já nasahní na mé á tá naçata caa na a ndica crúxu. ⁴⁰ Joo tá nayaha uní quiví já najãnditacu Ndióxi Jesús ta naçaja Ndióxi ña ná naça Jesús mé á nuú nde. ⁴¹ Coó nanaha toho Jesús mé á nu tóco ndihi ñayivi. Nuú ndehe, na naçaxi Ndióxi cuití va nanaha Jesús mé á. Jáchi jãnda jihna naçaxi mé á ndehe ña ná cuni nde ña ta ná çahan nde xihín ñayivi saha mé á. Ta tá sa nãnditacu tucu a tañu ndij cán já naçixi nde xihin á. ⁴² Ta mé á naçindahá ndehe çaxi tuhun nde nuú ñayivi saha Jesús ta ná ndicani nde nu ná ña nasacu Ndióxi mé Jesús ña ná caja vií a sahá ñayivi. Coó caja toho a á tácu na á naçihí na. ⁴³ Ta jári na profeta va jãnda sanahá naçahan na saha Jesús ta naçachi na ña caja cáhnu ini Ndióxi sahá cuachi ndijáá ñayivi tá ná cãdeé ini na mé á —cáchi Pedro xihín ndihi na ndúu vehe Cornelio cán.

Jãndicutú Ndióxi na coó naquixi chichi Israel xihin ínima yii mé á

⁴⁴ Ta nani cáhan Pedro cándichi da já naxinu ínimā yij Ndióxi najándicutú a ínimā tóco ndihi na táa johō ña cáhan da cán. ⁴⁵ Ta na cúu cuénta Jesús, na naquixi chichi Israel, na ndáca Pedro vaxi xihín dá cán, nacatóntó na tá naxini na nandicutú na tóho cán xihín ínimā yij Ndióxi. ⁴⁶ Ta xini na ña cúu á ña ndaa jáchi naxini johō ña cája cáhnu na Ndióxi ta cáhan na inga tuhun ña coo nasatiahva na. ⁴⁷ Anda já nacachi Pedro já:

—Cája i cuénta ni in túhún toho ñayivi a cúu caji nuu nuú na tóho yóho ña ná candúta ná jáchi sa nandicutú ínimā ná xihín ínimā yij Ndióxi tátuhun nandicutú mé nde xihín á —cáchi Pedro.

⁴⁸ Anda já nasahnda Pedro chuun ña ná jácandúta ná na cuénta Jesucristo. Tá nandihí já naxica tahví na cán nu Pedro ña ná candoo da chága quivi xihín ná.

11

Ndicani Pedro nuú na cúu cuénta Jesús ndúu ñuu Jerusalén sahá ña nayaha vehe Cornelio

¹ Tóco ndihi na apóstol xihín na cúu cuénta Jesús ndúu estado Judea ñañehe ná tuhun ña nandiquehe ri na coo naquixi chichi Israel tuhun Ndióxi. ² Ta tá nandico coo Pedro chí ñuu Jerusalén já nacasáhá in táhnda na cúu cuénta Jesús ndúu ñuu cán cáhan núu na saha dá. Mé na yóho cáhán na ña ndítahan nuú na tóho cahnda loho na yiquí cuñu na tátuhun iin costumbre na Israel. ³ Já cáchi na já xihín dá:

—Ndá cuénta quea nasahún naxito nihnún na coo naquixi chichi Israel. Ta ndá cuénta quea naxisún xihín ná. A váha toho nacajún cáhán nde —nacachi na Israel cán xihín Pedro.

⁴ Anda já nacasáhá Pedro ndicani da tóco ndihi ña nayaha janda saha. Já nacachi da já:

⁵ —Nasahijin i ñuu Jope. Ta nani xíca tahví i nu Ndióxi já najánaḡa mé á in ñaha nuú i. Ta ña naxini i cúu in jáhma cáhnu tátuhun sábaná nanuu chí indiví ta ndícomí xoo títo á nacato. Ta chí janda yati nu ín i naxinu a. ⁶ Ta tá nasandehé vaha i ini a já naxini i ñúhu tá nuú quítí, rí comí saha xihin tá nuú quití yúcu xihin coo xihin laa ñúhu ini a naxini i. ⁷ Anda já naxini johó i cáhan in a já nacachi a já xihin i: “Pedro, cuáhán ndacoo cahní quítí jan casún.” ⁸ Anda já nanducú ñehe e tuhun já nacachi i já: “A cáxí toho i rí yóho, xitoho i jáchí co xíní toho i caxí i quití quini tátuhun rí yóho”, cáchí i xihin Ndióxi. ⁹ Anda já nacahan tucu a cán chí indiví já nacachi a já: “Sa nandaja víi va Ndióxi rí jan. Sahá ña cán queá co ndítahan cachún ña cúu rí rí quini”, nacachi Ndióxi xihin i. ¹⁰ Uní táhnda nayaha ña yóho nacaja Ndióxi. Anda já nandaa tucu tóco ndihi ña cán cuahan tucu a chí indiví. ¹¹ Ta chí sa mé hora já naxinu coo uní ta ndínducú da yehe mé vehe nuú nasahijin too i cán. Ta da cán naquixi da janda ñuu Cesarea ndínducú da yehe. ¹² Ta já nachindahá ínima yii Ndióxi yehe cuahan i xihin ná sahá ña cán queá coo nayihví i cuhun i xihin ná. Ta ndáca i iñu ñaní yóho nasahan da xihin i. Tá naxinu coo nde ñuu cán já naquihvi nde vehe Cornelio, da nachindahá da cán ndínducú yehe. ¹³ Ta tá sa ñúhu ndihi nde vehe Cornelio cán já nacasáhá ndícani da nuú nde ña naxini da cándichi in táto Ndióxi ini vehe da ta nacachi a xihin dá já: “Chindahá java ta cuhun da ñuu Jope cana da in da naní Simón, da cáhan tucu na Pedro xihin. ¹⁴ Ta da cán caxi tuhun xuhun ta xihin ndihi na vehún ndaja caja ndó cacu ndaa ínima ndó”, nacachi táto Ndióxi xihin Cornelio cán. ¹⁵ Ta tá nacasáhá i cáhan i xihin na vehe Cornelio cán já nandicutú ndaa ínima ná xihin ínima yii Ndióxi tá quiahva najándicutú a ínima mí jihna. ¹⁶ Xihin ña yóho nandicuhun ini i ña nacachi Jesús, xitoho

í xihín yó tá ñacachi a já: “Mé a ndaa najácandúta Juan ndohó xihín ticuif joo vaxi quivi jándicutú Ndióxi ndohó xihín ínima yii mé á”, ñacachi Jesús. ¹⁷ Ta tá sa ñasahan Ndióxi ínima yii mé á nuú ña cán tá quiahva ñacaja xihín mí sahá ña ñacandúsa í Jesucristo, xitoho í ama ná cani táhan i xihín Ndióxi sahá ña cája mé á xihín ña cán — ñacachi Pedro.

¹⁸ Tá ñaxini johó ña cán ña ñacachi Pedro já ñacatáji ná ta ñacaja cáhnu na Ndióxi já ñacachi na já:

—Mé a ndaa sáhan ri Ndióxi ñamaní nuú ña tóho ña ná ndicó coo ini na jándacoo na cuachi cája na já ná coo na xihín mé á anda ama cáa quivi —ñacachi ña cúu cuéntá Jesús, ña ñaquixi chichi Israel cán.

Cuahá ña ñuu Antioquía ndiquehe na íchi cuéntá Jesús

¹⁹ Tá ñandihí ñasahní ña Esteban já ñacasáhá cája xíxi na xihín ña cúu cuéntá Jesús. Anda já ñandicuíta nuu na cuahan ña ta java na ñaxinu na janda chí estado Fenicia. Java na ñaxinu na cuahan ña chí isla Chipre. Ta java na ñaxinu na chí ñuu Antioquía. Ta cán ñacasáhá cáhan ña tuhun Ndióxi nuú ña ñaquixi chichi Israel cuití va. Joo coó ñacaxi tuhun na ña nuú ña tóho cán. ²⁰ Joo java ña cúu cuéntá Jesús, ña ñaquixi chí isla Chipre cán xihín ña ñaquixi ñuu Cirene ñaxinu coo na ñuu Antioquía ta ñacasáhá ña cáhan ña tuhun vaha saha Jesús, xitoho í xihín ña coó ñaquixi chichi Israel ndúu cán. ²¹ Ta ñasahan Ndióxi cuahá ndée mé á nu ná. Ta cuahá ndivaha ñayivi najándacoo na costumbre yatá ña ta ñandiquehe na íchi cuéntá Jesús, xitoho í.

²² Tá ñacandaá ini ña cúu cuéntá Jesús ndúu ñuu Jerusalén tóco ndihí ña ñayaha cán já ñachindahá ña Bernabé cuahan da janda ñuu Antioquía cán. ²³ Tá ñaxinu coo Bernabé ñuu Antioquía cán já ñaxini da ndá quiahva ñacaja Ndióxi ñamaní xihín ñayivi ñuu cán chí ñacajii

ndivaha ini da. Ta nacaḥan da xihín ná ña ná candico na íchi cuéntá Jesús xihín ndinuhu ini na. ²⁴ Mé Bernabé yóho cúu dá in taḥa. Ta chútú ndaa ínima da xihín ínima yii Ndióxi ta cándéé cáhnu ini da mé á. Ta cuahá ñayivi nandiquehe na íchi cuéntá Jesús, xitoho í sahá ña naja da.

²⁵ Tá nandihí já naquee Bernabé cuahán da ndinducú da Saulo chí ñuu Tarso. Ta tá nandiñeḥe dá Saulo já ñeḥe da da cuahán da chí ñuu Antioquía. ²⁶ Ta nasanduu da xihín na cúu cuéntá Jesús mé ñuu cán tátuhun in cuia. Ta najánaha da tuhun Ndióxi nuú cuahá ndivaha ñayivi. Ta mé ñuu Antioquía cán cúu nuú nu cuítí nasacu na quivi ná cananí na ná cúu cuéntá Jesús.

²⁷ Ta mé tiempo já naxinu cōo java na profeta mé ñuu Antioquía cán. Mé profeta yóho naquixi na chí ñuu Jerusalén ta tiahva na jáyaha na tuhun cáhan Ndióxi nuú ñayivi. ²⁸ Ta in táhan da profeta cán, da naní Agabo nandaca ndíchí da tañu na cúu cuéntá Jesús mé vehe nuú nataca na cán. Já nacachi da já:

—Cáxi tuhun ínima yii Ndióxi xihín i ña quixi in tama ndeé ndivaha ndijáá ñuyíví yóho —nacachi da xihín ná.

Ta chí já ndusa nasahiin jáchi naquixi in tama ndeé ndivaha tá nasacomí Claudio cuéntá sahá ñayivi ñuu Roma. ²⁹ Anda já na cúu cuéntá Jesús ñuu Antioquía cán najátaca na jiuḥún chindeé ñahá na cán. Ta ndá quiahva xinu cōo nu mé ná quiahva na, quiahva já sahan na. Anda já nachindahá na ña nuú na cúu cuéntá Jesús ndúu estado Judea. ³⁰ Ta mé Saulo xihín Bernabé cúu da ñeḥe jiuḥún cán cuahán da ndiquiahva da ña nuú na sacuahá cómi cuéntá sahá na cúu cuéntá Jesús ndúu estado Judea cán.

12

Tá nacasahá ndóho chága ini na cúu cuéntá Jesús

¹ Ta mé tiempo já nacasáhá Herodes, da cómi cuéntá sahá ñuu Jerusalén cán cája xíxi da xihín java na cúu cuéntá Jesús. ² Nasahnda da chuun ña ná cahní na Jacobo, ñani Juan xihín yuchú cáni. Ta já nacaja na. ³ Ta tá naxini Herodes ña nacajii íní na sacuaha veñuhu Israel xihín ña nasahní da Jacobo já natiin ri da Pedro. Ta ña yóho nasacuu a mé tiempo tá cája na Israel víco tá xíxi na pan ña co cáva táhan yusá naxaa xihín. ⁴ Tá sa nachicaan Herodes Pedro veca ja nasahnda da chuun nuú comi táhnda soldado ña ná candaa na da. Ta comi comi taa ndáca in in táhnda cán. Mé Herodes nasacu ini da tavá da Pedro veca ndiquiahva da da nuú ñayivi Israel ña ná cahní na da tá sa ná yaha víco. ⁵ Nani ndácaan Pedro veca ndaá vaha na da. Joo na cúu cuéntá Jesús xihín ndinuhu ini na xíca tahví na nu Ndióxi saha dá.

Tává Ndióxi Pedro veca

⁶ Ta in ñuu sácú ini Herodes tavá da Pedro veca inga quiví itaan ña ndiquiahva da da nuú ñayivi, nduu. Joo mé ñuu já nani cándúhu Pedro quiji da tañu ivi soldado ta ndíco jiin ga cadena ndáha dá ta co cáhan sahá java ga soldado ndíta ndáá yéhé veca cán. ⁷ Ta in náá cuití naxinu coo in táto Ndióxi ini veca cán chí nandiyihvi ndaa ini a. Anda ja naxinu coo mé táto Ndióxi nu cándúhu Pedro já naquiní a ndáha á yica ndíca da ja nandicáxi ini da. Anda ja nacachi a ja xihín dá:

—Camún ndacoo quiun.

Anda ja nacuyu cadena ña nasandico ndáha Pedro.

⁸ Anda ja nacachi tucu táto Ndióxi cán ja xihín dá:

—Ndaja tuun ní tisún ta cayihi ndusun.

Ta tá sa nacaja da ña ja nacachi tucu táto Ndióxi ja xihín dá:

—Quehe ticachí níhnu chinúú jatun ná coho candico yehe —cáchi a xihín dá.

⁹ Andá já tácaa Pedro jatá tátō Ndióxi cán cuahān da. Joo cō xíní dā á jivi quéa á a juú a. “Sání ví”, cáhán da. ¹⁰ Ta xíca na cásahan nā já nayaha na nū ndíta in táhndá soldado. Ta anda já nayaha na nū ndíta inga táhndá soldado. Ta tá sa naxinu cōo na yéhé caa cán já nanuna mé va já naquee na vecaa cuahān nā. Ta tá sa naxica chá nā cáyé cán já naquee tátō Ndióxi cán cuahān ta já nacandoo Pedro cán. ¹¹ Andá já nacandaa ini Pedro ñā nayaha. Ta nacachi da já xihín mé dá:

—Viti ndusa cándaa ini i ñā mé a ndaa táhyí quéa nacaja tátō Ndióxi yóho. Mé Ndióxi nachindahá a tátō á já ná tavá a yehe ndáha Herodes já ná a cáhni dā yehe tá quiahva cúni nā Israel —nacachi da.

¹² Nani cáhán Pedro xíca da cuahān dā vehe María, ñá cúú náná Juan, dā naní tucu Marcos. Cán nanditútú cuahá nā cúú cuéntá Jesús ndúu na xíca tahví nā nū Ndióxi saha Pedro. ¹³ Ta tá naxinu cōo da vehe María cán já nacasáhá cáti ndáha dá yéhé cán. Andá já naxinu cōo in ñá loho naní Rode ñā candehé ñá ndá nā cándichi jatá véhe cán. ¹⁴ Tá naxini johō ñá cáhan dā já nandicuni ñá tachí Pedro. Joo nandindójó ñā cuná ñá yéhé sahá ñā cájii íni ñā. Ta já xínu ñá nandicó cōo tucu ñá ini vehe caxi tuhun ñá xihín nā java cán ñā cándichi Pedro jatá véhe. ¹⁵ Joo tá nandicani ñá ñā yóho nū ná já nacachi na já xihín ñā:

—Tachí va cúú yóhó.

—Jivi da —cáchi ñá cán ndúcú ndée ñā cáhan ñá xihín ná.

Andá já nacachi nā cán já:

—Ndá ínimā va da quéa jan jáchi vecaa va ndácaan Pedro —nacachi na.

¹⁶ Joo ndaja cōo Pedro cáti ndáha yii va da yéhé cán. Já naxinu cōo na nasuná nā yéhé nū dá ta chí nayihví nā tá naxini na dā. ¹⁷ Joo nacuu ndáha dá nū ná ñā ná a cáhan

chága nã. Anda já nacasáhá ða ndícani da nu ná ndaja nacaja Ndióxi natavá a ða vecaa cán. Ta já nacachi da xihín ná:

—Ndicani ndó ñã yóho nu Jacobo ta ndicani ndó ñã nu tóco ndihi nã cúu cuéntá Jesús —nacachi Pedro.

Anda já naqueta Pedro cuahan ða.

¹⁸ Tá nativi inga quiví itaan já nacatóntó soldado vecaa cán tá nacandaa ini da ñã coó Pedro íin vecaa ta coó naxini da ndáchí cuahan ða. ¹⁹ Anda já nasahnda Herodes chuun ñã ná ndinducú nã ða. Joo coó nandiñeñe ná ða. Anda já nacasáhá ða ndája ndichi ða soldado vecaa cán ndáchí cuahan Pedro. Joo coó nacuu cachi nã cán ndáchí cuahan ða. Sahá ñã cán quea nasahnda Herodes chuun ñã ná cahní ndihi na soldado ða nasandaa yéhe caa cán. Tá nayaha ñã yóho já najándacoo Herodes estado Judea cán ta naquee da cuahan ða chí Cesarea coo da.

Quiví naxihi Herodes

²⁰ A juú quiahva xójo ini Herodes xihín ñayivi ndúu ñuu Tiro xihín nã ndúu ñuu Sidón. Joo ndíví ñuu cán najándique táhan na tuhun na cuhun nã cahan nã xihín dá. Coo vaha ini na xihín dá cúní nã jáchí ñundáhyi rey cán cána tóco ndihi ñã xíxi na. Joo jihna ñuhú nandique táhan mání ná xihín in ða naní Blasto. Mé Blasto yóho nasacuu da in ða cáhnu cája chúun nu rey cán. Ta nacahán nã ñã ná cahan ndahví ða cán nu rey saha ná. ²¹ Ta nasacu Herodes in quiví nditútú ndihi na nu dá. Ta tá natandaa mé quiví já nasacandixi Herodes jáhma vaha ndivaha da, ñã sácandixi rey. Ta nasacoo da nu sácoo rey. Ta já nacahan cóhó ða xihín ñayivi. ²² Tá naxinu coo ñã cahan ða já nacasáhá ñayivi cán cáyuhú nã já cáchí nã já:

—Ndióxi cúu ða yóho ta coo cúu dá ndá taa nacuu —cáchí nã cája cáhnu na Herodes cán.

²³ Ta chí sa mé hora já naxinu in táto Ndióxi ta nacaja ña ná quehe Herodes cuehe jáchi coó nacaja cáhnu da Ndióxi ta já nasahan da ñamaní nuú ñayivi ña cáchi na cúu dá ndióxi. Chí sa mé hora já naquihvi ticujú yiquí cuñu da já naxihi da.

²⁴ Ta níí cúu nandicuita nuu tūhun vaha saha Jesús xíca cuahan. Ta chí nandicuaḥa chága na cúu cuénta Jesús.

²⁵ Ta ndaja coo nandiquiahva Bernabé xihin Saulo mé jihún nuú na sacuaḥa veñuhu ndúu ñuu Jerusalén já nandicó coo da cuahan da ñuu Antioquía. Ta ndáca na Juan, da naní tucu Marcos cuahan da xihin ná.

13

Cája chúun Bernabé xihin Saulo cuénta Ndióxi

¹ Ta ndaja coo tañu na cúu cuénta Jesús ndúu ñuu Antioquía cán ndúu na cúu profeta ta ndúu ri na jánaḥa tūhun Ndióxi. Ta ña yóho cúu quivi ná: Bernabé xihin Saulo xihin Simón, da cáhan na Taa Tuún xihin, xihin Lucio, da ñuu Cirene xihin Manaén, da nasahnu xihin Herodes. Mé Herodes yóho cúu dá da cómi cuénta saḥa ñayivi estado Galilea. ² In quivi nani nanditútú ndihi na ndúu na xíjuhun na ta cája cáhnu na Ndióxi já nacahan ínimá yii mé á xihin ná já nacachi a já:

—Tavá jíin ndó Bernabé xihin Saulo jáchi sa nacaxi mí i chuun quiahva i nu ná caja na —nacachi a.

³ Ta tá sa nandihí naxijuhun na ta tá nandihí naxica taḥví na nu Ndióxi já nachojó na ndáḥa ná jini Saulo xihin Bernabé já nandindayí na na cuahan na caja na chuun Ndióxi.

Cáhan Saulo xihin Bernabé tūhun vaha saḥa Jesús isla Chipre

⁴ Tá nandihí já nachindahá ínimá yii Ndióxi Saulo xihin Bernabé cuahan na ñuu Seleucia. Ta cán nandaa na

barco cuahān nā isla Chipre. ⁵ Ta ndáca na Juan, da naní tucu Marcos cuahān da xihīn ná já ná chindeé da na. Ta tá naxīnu ɔo na ñuu Salamina nu sá ndíchí barco cán já nacasáhá nā cáhan nā tuhun Ndióxi nuú ñayivi táca veñuhu nā Israel cán. ⁶ Níí cúú isla cán naxīca nuu na janda quiahva naxīnu ɔo na ñuu Pafos. Ta cán nanditahan na in da tají naquixi chīchi Israel ta naní da Barjesús. Ta cúú dá in da tuhún jáchi cáchi da xihín ñayivi ñā cáhan da cuéntá Ndióxi. ⁷ Ta mé da tají yóho nasahīin tuun da xihín in da naní Sergio Paulo, da cúú gobernador nuú ñayivi isla Chipre cán. Ta nasacuu da da ndíchí jini. Ta mé gobernador yóho nacana da Bernabé xihīn Saulo jáchi cūni da cuni johō da tuhun Ndióxi. ⁸ Joo da tají naní Barjesús, da naní tucu Elimas nacasáhá da sáji nuu da nuú Bernabé xihín nuú Saulo jáchi ɔo cūni da ñā ná candeé ini gobernador cán Jesús. ⁹ Nandicutú ndaa ínima yī Ndióxi ini Saulo, da cáhan nā Pablo xihīn já nacasáhá sándehe ndaa da nuú da tají cán. ¹⁰ Já nacachi da já xihīn dá:

—Yóhó cúún ɬa quini ta cúún jahyi tiñáhá, da xīca jándahvi ñayivi. ɔo cúnún tóco ndihi ñā vaha jáchi cúnun caji nuún nuú ñayivi ná a ndíquehe na íchi cuéntá Jesús. ¹¹ Ta viti jándoho Ndióxi inún. Jácuáá a yohó ta ni a cúnun nuú candii tixi chá quivi —nacachi Pablo xihín da tají cán.

Tá nacachi Pablo já chí ivi laá nacuaá da cán. Jandá tíin ndaa na da xīca da jáchi ɔo tívi nuu dá. ¹² Tá naxini da cúú gobernador cán ñā yóho chí ivi laá nacandúsa da Jesús. Jáchi chí catóntó da xīni johō da tóco ndihi ñā cáhan na saha Jesús.

Xīny ɔo Pablo xihín Bernabé ñuu Antioquia ñā ndácaan estado Pisidia

¹³ Nandaa Pablo xihín nā xīca xihīn dá barco ñuu Pafos cuahān nā chí ñuu Perge ñā ndácaan estado Panfilia. Joo nasahnda táhan Juan, da naní tucu Marcos xihīn ná já

nandicó coo da chí ñuu Jerusalén. ¹⁴ Tá nandihí já naquee Pablo xihín na xíca xihín dá ñuu Perge já naxinu na ñuu Antioquía ña ndácaan estado Pisidia. Ta mé quivi ndíquehe ndée ñayivi nandihvi na veñuhu já nasacoo na. ¹⁵ Ta tá sa nandihí naçahvi na ley Moisés xihín ña naçahví na profeta já naçana na sacuaħa veñuhu cán Pablo xihín na xíca xihín dá já naçachi na já xihín ná:

—Ñani i, tá íin tuhun vaha cúní ndó caħan ndó xihín ñayivi yóho cuu candichi ndó caħan ndó xihín ná viti — naçachi na cán xihín dá.

¹⁶ Anda já naçandichi Pablo já naçuu ndáħa dá nu ná catáji yúhu ná já naçasáħa cáħí da já xihín ná:

—Cuni johó ndó ñayivi Israel xihín tóco ndihí ndó, na cája cáħnu Ndióxi. ¹⁷ Mé Ndióxi, mé a cája cáħnu ñayivi nación Israel naçaxi a tásáħnu jícó yo ta naçaja mé á ña ná ndicuáħa ndivaha na nani naçacuu na na tóħo nación Egipto cán. Joo tá nandihí já naçavá mé á na xihín ndée mé á. ¹⁸ Ta cáħnu naçahin ini Ndióxi saħa cuachi na tañu ivi jico cuija nani naxica nuu na yucú íchí cán. ¹⁹ Ta najándihí Ndióxi saħa usa nación ñayivi naçanduu ñundáhyi Canaán já najáyaha ñundáhyi jan ndáħa tásáħnu jícó yo jáchi janda sanahá naçahān mé á tuhun a nu ná ña caja já xihín ná. ²⁰ Anda já naçahnda Ndióxi chuun nu juexe já ná cacomí na cuéntá saħa ná tixi comi ciento java cuija janda quiaħva naxinu coo tiempo tá naquixi profeta Samuel, da jáyaha tuhun cáħan Ndióxi nuú ñayivi. ²¹ Anda já naxica taħví na Israel nu Ndióxi ña ná cacu mé á in rey ná cacomí da cuéntá saħa ná. Saħa ña cán quea naçacu Ndióxi in da naní Saúl ná cacuu da rey nu ná. Naçacuu da jahyi Cis, da naquixi chichi Benjamín. Ta naçacomí Saúl cuéntá saħa ná tixi ivi jico cuija. ²² Tá nandihí já naçavá Ndióxi Saúl já naçhinúu a David ña ná cacomí da cuéntá saħa ná. Já naçachi Ndióxi já saħa dá: “Íin vaha ini i xihín David, jahyi

Isaí jáchi xíní ña caja mé dá tóco ndihi ña cúní”, ñacachi Ndióxi saha David. ²³ Ta in da ñaquixi chichi mé David cán cúu Jesús, mé a ñasahan Ndióxi tuhun a chindahá jácacu ñayivi Israel janda sanahá ndivaha. ²⁴ Ta janda tá cámaní quixi Jesús já naxica nuu Juan, da jácandúta ñayivi ñacahan da xihín ñayivi ña ndítahan nu ná jándicoo na cuachi cája na ta ná candúta ná. ²⁵ Ta tá sa yati quivi da já ñacachi da já xihín ñayivi: “A juú cahán ndo ña cúu yehe da ñachindahá Ndióxi cacomí cuéntá saha ñayivi, vaha. Jáchi ja chá xinu inga da ín chága saha a juú ga yehe. Ta da cán cacomí cuéntá saha ndo ta cúu ndusa da cáhnu chága ta chí coo saha mí i caxítí i ndaxí i correa ndusa dá”, ñacachi Juan xihín ñayivi cán.

²⁶ Cuni johu vaha ndó, ñani i, na ñaquixi chichi Abraham xihín tóco ndihi ndó, na cája cáhnu Ndióxi xihín ndinuhu ini. Mé Ndióxi cúní a ña ná candaa ini ndó ña ñachindahá mé á Jesús ñuyíví yóho já ná jácacu a ndohó já ná a cühun ndó indayá. ²⁷ Tóco ndihi na ndúu ñuu Jerusalén xihín na sacuaña coo ñacandaa ini na ña ñachindahá Ndióxi Jesús ñuyíví yóho. Ta ni coo ñacandaa ini na tuhun ñacahyí profeta saha Jesús tá ñasacahvi na ña veñuhu tá quivi ndíquehe ndée ná. Saha ña cán quea ñasahní na Jesús joo xihín ña ñacaja na yóho najáxinu coo na ña ñacachi profeta sanahá. ²⁸ Ta vatí coo ñañehe ná cuachi chicaan na jata Jesús joo naxica na ñamaní nu Pilato ña ná cahnda da chuun ña ná cahní na Jesús. ²⁹ Ta tá sa naxinu coo tóco ndihi ña cáhí tuhun Ndióxi saha mé á coo anda já najánuu na a ndica crúxu já najánduxu na ña. ³⁰ Joo najánditacu Ndióxi Jesús tañu ndíi. ³¹ Ta tixi cuahá quiví nanaha Jesús mé á nuú na ñañehe táhan xihín á tá ñaquee a estado Galilea cuahan chí Jerusalén. Ta mé na cán cúu na xica cáhan saha mé á nuú ñayivi viti.

³² Saha ña cán quea cáxi tuhun nde tuhun vaha saha

Jesús nū ndóhó viti jáchi janda saha nacachi Ndióxi xihin tásáhnū jícó yō ña já coo. ³³ Ta tá najánditacu Ndióxi Jesús najáxinū coo a tūhun nasahan nū yó, na naquixi chichi na cán. Jáchi já nacahyi a nū Salmo ivi ta saha Jesús nacahan tá nacachi a já: “Jahyi mí i cúu yóhó. Ta yehe cája ña ná catacún quivi viti”, cáchi tūhun Ndióxi. ³⁴ Joo Ndióxi sa nasahan va tūhun a ña jánditacu a Jesús já ná a táhyi yiquí cuñū a. Jáchi já nacahyi a ini libro yii mé á já cáchi a já: “Nū yóhó quiahva i tóco ndihi ña vaha, ña nasahan i tūhun i nū David quiahva i nū dá”, cáchi tūhun Ndióxi. ³⁵ Já cáchi tucu inga Salmo já: “Mé ndó a quiahva toho ndó ñamaní tahyi yiquí cuñū i jáchi cúu u jahyi máni mé ndo, da cája chúun nū ndo”, cáchi tūhun Ndióxi. ³⁶ Ta sa xini yō cō cáhan ña yóho sahá ña nacaja David jáchi tá nandihí nacaja da ña nasahnda Ndióxi nū dá já naxihí da ta najánduxu na da nuú nanduxu tásáhnū jícó da. Ta natahyi yiquí cuñū da cán. ³⁷ Joo yiquí cuñū Jesús coó natahyi toho a jáchi najánditacu Ndióxi ña. ³⁸ Ña cán quea vaxi nde caxi tūhun nde ña yóho nū ndo, ñani i já ná candaa ini ndó ña cája cáhnū ini Ndióxi sahá cuachi ñayivi sahá ña nacaja Jesús tá naxihí a ndica crúxu. ³⁹ Ta cája cáhnū ini Ndióxi sahá cuachi ñayivi tá cándee ini na Jesús. Jáchi ni in tühún ñayivi a cúu nduu ndaa nū Ndióxi sahá ña sácú vaha na ley Moisés. ⁴⁰ Joo cuéntá coo ndó a juú ndoho ndó ña nacachi na profeta sanahá tá nacachi na já:

⁴¹ Cuni johō vaha ndó, ndóhó na sácū ndaa ichi ña cáhan Ndióxi.

Catóntó ndo jáchi cama chá ndihi saha ndo.

Jáchi yehe cúu Ndióxi ta cája i ña náhnū ndivaha, joo cō cándusa ndó ña cája i vatí ndicani java na ña nū ndo, nacachi Ndióxi sanahá —nacachi Pablo xihin ná.

⁴² Ta tá naqueta Pablo xihín na xica xihin dá veñuhu na Israel cán já naxica ñayivi, na coó naquixi chichi Israel

ñamāni nu dá ña ná caḥan da xihin ná sahá tuhun Ndióxi inga quivi ndiquehe ndée ná. ⁴³ Tá naquee ndihi na veñuhu cán já cuahá na Israel xihín cuahá na tóho, na cándusa ley Moisés ta cája cánu na Ndióxi nacasáhá na ndíco na jata Pablo xihín jata Bernabé. Ta Pablo xihín Bernabé jánaḥa da na ña ná candeé cánu ini na Ndióxi já ná caja mé á ñamāni xihín ná.

⁴⁴ Ta tá naxinu co inga quivi ndiquehe ndée ná já nataca tátuhun tóco ndihi ñayivi ñuu veñuhu cán ña taa johu na tuhun Ndióxi cúní na. ⁴⁵ Joo tá naxini na naquixi chichi Israel cán ña nataca cuahá ndivaha ñayivi já nacasáhá na Israel cáhiví ini na. Já nacasáhá na cáhan núu na saḥa Pablo ta nacanaḥá na xihín dá. ⁴⁶ Xihín ña cán nandindeé chága ini Pablo xihín Bernabé já nacasáhá cáchí da já:

—Jihna ñúhú ndítahan nuú nde caxi tuhun nde tuhun Ndióxi nu mé ndó, na naquixi chichi Israel. Joo sándehe nde ña co cúní toho ndó ndiquehe ndó ña. Ta cája nde cuéntá ña co saḥa ndó cuhun ndó indiví. Sahá ña cán queá vaha chága ná cuhun nde caḥan nde tuhun Ndióxi xihín na co naquixi chichi Israel. ⁴⁷ Jáchí já cáa chuun nasahnda Ndióxi nuú nde tá nacachi a já xihín nde:

Nasacu yehe ndohó ña ná caxi tuhun ndó nuú ñayivi tóho ndúu ndijáá ñuyíví,

já ná candaa ini na ndaja caja na ná cacu ndaa ínima ná, nacachi Ndióxi —nacachi Pablo xihín ná.

⁴⁸ Tá naxini johu na tóho, na co naquixi chichi Israel cán ña yóho chí nacají ini na já nacasáhá na cáhan na ña cúu ndusa tuhun Ndióxi ña vaha. Ta tóco ndihi na nacaxi Ndióxi cacu ndaa ínima, nandiví na íchi cuéntá mé á. ⁴⁹ Já nasahin nuú naxita nuu tuhun Ndióxi ní cúu ñundáhyi cán. ⁵⁰ Joo na naquixi chichi Israel cán najándivaa na java najihí, na cátoó cuhun veñuhu, na co

cáhan núu ñayivi saha. Ta najándivaa na java dataa, da ín saha ñuu cán ña ná ndicuita na xihín Pablo xihín Bernabé viti ta anda quiahva ná tavá na da ñundáhyi cuénta ñuu cán. ⁵¹ Anda já naquiji nihni Pablo xihín Bernabé ña yácá ndusá saha mé dá já ná naha nuú na cán ña coó natahan ini da xihín ña cája na Israel cán. Já naquee da ñuu Antioquia cán cuahan da inga ñuu naní Iconio. ⁵² Ta na cúu cuénta Jesús, na nacandoo ñuu Antioquia cán nandicutú ndaa ínima ná xihín ínima yí Ndióxi ta cáji ndivaha ini na.

14

Cáhan Pablo xihín Bernabé tuhun Ndióxi nuú ñayivi ndúu ñuu Iconio

¹ Tá naxinu Pablo xihín Bernabé ñuu Iconio já nandihvi da veñuhu nu ndítaca na Israel cán. Ta cán naçahan da tuhun vaha saha Jesús nu ná. Ta cuahá ndivaha na Israel xihín na coó naquixi chichi Israel nacandee ini na Jesús. ² Joo java na Israel, na coó nacandúsa tuhun Ndióxi nacasáhá na cáva na jiní ñayivi, na coó naquixi chichi Israel ña ná çahan núu na sahá na cúu cuénta Jesús. ³ Sahá ña cán queá nasanduu nahá chága ví Pablo xihín Bernabé mé ñuu cán. Ta co ná yihví na çahan chága ví na tuhun Ndióxi jáchi cándeé ini na Jesús, xitoho na. Ta nasahan Ndióxi ndée á nu ná ña ná cuu caja na cuahá nuú ña náhnu ta xihín ña yóho nacandaa ini ñayivi ña mé a ndaa táhyi quíhvi ini ndusa Ndióxi ñayivi. ⁴ Joo ñayivi ñuu cán nacasáhá na sáhndá táhan na jáchi java na cuahan na jatá na Israel ta java na cuahan jatá na apóstol cán. ⁵ Anda já na Israel xihín na coó naquixi chichi Israel najándique táhan na tuhun na xihín na jutixia ñuu cán ña ndúcú na canahá quini na xihín na apóstol ta nducú na cahní na da xihín yuu. ⁶ Joo tá nacandaa ini Pablo xihín Bernabé ña sácú ini na cán caja xixi na xihín dá já naxinu da cuahan da

chí estado Licaonia. Naxinu coo da ñuu Listra xihín ñuu Derbe xihín java ga ñuu válí ñúhu ndijáá chí cán. ⁷ Ta cán naçahan ri da tuhun vaha saha Jesús nuú ñayivi ndúu cán va.

Cúun na yuu Pablo ñuu Listra

⁸ Tá naxinu coo da ñuu Listra cán já nandique táhan da xihín in dataa, da a cuú caca. Ta ín coo da cán jáchi cúu dá da quíhvi saha janda tá naçacu da cáa da já. ⁹ Ta ín coo da quíhvi saha yóho táa johu da nu cáhan Pablo. Anda já nandicoto nihni Pablo nu dá ta cándaq ini Pablo ña cuu ndivaha da jáchi cándeé ini da quíhvi cán Ndióxi. ¹⁰ Saha ña cán queá naçayuhú Pablo nu dá já cáchi da já:

—Cuáhán candichi —naçachi Pablo.

Ta chí ivi laá naçandita da ta naçasáhá xíca da. ¹¹ Tá naxini ñayivi ñuu cán ña nandaja vaha Pablo da cán já naçasáhá na cán cáyuhú cóhó na mé tuhun cáhan na ñuu Licaonia, ña co cándaq ini Pablo. Já cáchi na já:

—Ndióxi cúu da yóho ña naquixi indivi túní a ñéhe cuití da nahná ñayivi —cáchi na cáyuhú na tuhun mé ná.

¹² Naçachi na cán ña Bernabé cúu dá in ndióxi naní Júpiter. Ta Pablo cúu dá in ndióxi naní Mercurio cáchi na jáchi mé dá cúu da cáhan chága. ¹³ Ta da cúu jutu nuú veñuhu Júpiter, ña ndácaan yuhú ñuu cán ñéhe da tindiqui xihín cuahá ita jáchi ndúcú ndihi na cán cahní na tindiqui joco na rí nu Pablo xihín nuú Bernabé caja cáhnu na da. ¹⁴ Joo tá naçandaq ini Pablo xihín Bernabé ña ndúcú na cán caja cáhnu na da já nandatá da jáhma dá sahá ña co táhán ini da xihín ña cája na. Ta já naçasáhá na xínu na naquihvi na tañu ñayivi cán. Ta cáyuhú Pablo já cáchi da já xihín ná:

¹⁵ —Candehé ndo. A váha toho ña ndúcú ndó caja ndó yóho jáchi ñayivi xihín mé va ndó cúu ndehe. Ndá cuéntá queá cúní ndó caja cáhnu ndó ndehe. Ta chuun vaxi nde

yóho quéa caxi tũhun ndę xihĩn ndó tũhun vaħa saħa Jesús. Ta já ndítahan nu ndo jándacoo ndó ña a váha jan. Ta candico ndó Ndióxi tácu, mé á naçavaħa indivi xihĩn ñuyiví xihĩn tañuhú xihĩn tóco ndihi ñaha ndúu nuú in in ña cán. ¹⁶ Anda sanahá najándicoo ndáħa Ndióxi ñayivi ndijáa nación caja na ndía cúni mé va na caja na. ¹⁷ Joo níi tiempo najánaħa Ndióxi yo cúu mé á nu ná jáchi níi tiempo naçaja vaħa mé á xihĩn ná. Mé a chíndahá javi nu yo. Ta mé á cája ña ná cana vaħa ñundáhyi yo. Ta cája mé á ña ná a cámaní ña cuxú já ná cajii ínı yo —naçachi Pablo xihĩn na cán.

¹⁸ Ta vatı naçahan Pablo tũhun yóho xihĩn ná joo ihvi ndivaħa já naçava da jini ñayivi cán ña ná a cáhni na tĩdiqui joco na nu dá ña caja cáhnu na da.

¹⁹ Tá nandihı já naxinu çoo java na Israel, na naquixi ñuu Antioquía xihĩn java na naquixi chí ñuu Iconio. Já naçava na jini ñayivi já naçati na naçuun na yuu Pablo. Ta tá sa naçahan na naxihı da já ñúhu na da naçahan na najácana na da yuhú ñuu. ²⁰ Joo na cúu cuénta Jesús nataca na ta naçava nuu na nu cándúhu Pablo ta já nandacoo da já naquihvi tucu da ñuu cán. Ta inga quivi itaan já naquee da xihĩn Bernabé cuahan da ñuu Derbe.

²¹ Tá naxinu çoo ndivı da cán ñuu Derbe já naçasáħa da caxi tũhun da nuú ñayivi saħa Jesús ta cuaha ná nandiquehe íchi cuénta Jesús ñuu cán. Anda javı nandico çoo Pablo xihĩn Bernabé chí ñuu Listra xihĩn ñuu Iconio já naquee da cuahan da chí Antioquía. ²² Ta mé ñuu cán najácaħan da na cúu cuénta Jesús ña ná coo ndacú chága na ta ná a jándacoo na ña cándeé ini na Jesús. Ta naçachi da ña já ndusa ndoho ndivaħa ini na janda quiaħva ná xinu çoo na cacomı Ndióxi cuénta saħa ná. ²³ Tá nandihı já naçacu Pablo xihĩn Bernabé java da saçuaha ña ná cacomı da cuénta saħa na cúu cuénta Jesús in in ñuu cán. Ta tá

nāndihi naxijuhun na ta naxiça tahví nā nu Ndióxi saha ná já nandiquiahva da nā ndáha Ndióxi ña ná candaa mé á na jáchi cādeé ini na mé á.

Ndicó coo Pablo xihín Bernabé ñuu Antioquia ña ndácaan estado Siria

²⁴ Tá nāndihi já nayaha Pablo xihín Bernabé chí estado Pisidia janda quiahva naxinu coo na ñundáhyi cuéntá Panfilia. ²⁵ Ta nacañan nā tuhun vaha saha Jesús nuú ñayivi ñuu Perge. Anda já naquee na cuañan nā chí ñuu Atalia. ²⁶ Ta ñuu Atalia cán nāndaa na barco já nāndicó coo na chí Antioquia nuú naquee na jihna. Jáchi mé cán cúu nuú nandiquiahva na da ndáha Ndióxi ña ná caja da chuun mé á. Ta viti sa najāndihi da chuun nātahnda nu dá cán. ²⁷ Tá naxinu coo Pablo xihín Bernabé mé ñuu Antioquia cán já najátaca da tóco ndihi nā cúu cuéntá Jesús nduu ñuu cán já nāndicani da tóco ndihi ña nācaja Ndióxi xihín dá. Nāndicani da ndá quiahva nasañan Ndióxi ñamaní nuú nā coo naquixi chichi Israel ña ná ndiquehe na íchi cuéntá mé á. ²⁸ Ta nācandoo nahá Pablo xihín Bernabé ñuu Antioquia cán xihín nā cúu cuéntá Jesús.

15

Ndítaca nā sacuañā cuéntá Jesús

¹ Ta ndaja coo mé tiempo já java dataa, da naquixi chí estado Judea naxinu da ñuu Antioquia cán. Ta nacasáha nā jánaha nā nuú nā cúu cuéntá Jesús ña ndítahan nu ná caja na ña cáchi ley Moisés ña ná chicaan nā marca yiquí cuñu na já ná cuu jácacu Ndióxi nā. ² Joo Pablo xihín Bernabé nacasáha cáni táhan ndeé yúhu dá xihín nā Judea cán saha ña yóho. Ta saha ña nānditúhún cuahā ná saha ña yóho saha ña cán quéa nasacu ini nā cúu cuéntá Jesús cán chindahá nā Pablo xihín Bernabé xihín java ga da cúu cuéntá Jesús ña ná cūhun nā ñuu Jerusalén já ná

nditúhún chága na sahá ña yóho xihín na apóstol ta xihín na sacuahá comí cuénta sahá na cúu cuénta Jesús ndúu Jerusalén cán.

³ Anda já na cúu cuénta Jesús ndúu Antioquía nachin-dahá na na cán chí naquee na cuahan na. Ta nu xíca na cuahan na cán nayaha na chí ñundáhyi Fenicia xihín ñundáhyi Samaria. Ta cán nandicani na nuú na cúu cuénta Jesús ndá quiahva nandiquehe na coó naquixi chichi Israel íchi cuénta Jesús ta já najándacoo na costumbre yatá nasacaja na jihna. Chí nacajii ndivaha ini na cúu cuénta Jesús cán tá naxini johó na ña yóho.

⁴ Tá naxinu coo Pablo xihín Bernabé xihín java ga na cán ñuu Jerusalén já nandiquehe vaha na cúu cuénta Jesús ndúu ñuu cán na. Ta jári na apóstol xihín na sacuahá veñuhu cán nandiquehe vaha na na. Anda já nandicani Pablo nuú na cán tóco ndihi ña náhnu nacaja Ndióxi xihín dá. ⁵ Joo java na fariseo, na sa ndiquehe íchi cuénta Jesús nandaca ndichi na já nacasáhá cáchi na já:

—Ndítahan nuú na cúu cuénta Jesús, na coó naquixi chichi Israel chicaan na marca yiquí cuñu na. Ta ndítahan nu mí cahán í xihín ná ña ná cacu vaha na ley Moisés — nacachi na fariseo cán.

⁶ Anda já nataca na apóstol xihín na sacuahá veñuhu ña ná nditúhún na ndaja coo sahá ña yóho. ⁷ Sa nanditúhún cuahá ndivaha na cán sahá ña yóho. Anda já nandaca ndichi Pablo tañu na cán ta já nacachi da já:

—Sa xíni vaha ndó, ñani í ña naxaxi Ndióxi yehé jihna ña ná caxi tuhún í tuhun vaha saha Jesús nuú na coó naquixi chichi Israel já ná candeé ri ini na cán va Jesús ña ná jácacu Ndióxi na. ⁸ Ta mé Ndióxi, mé a xíni ndaja cáa ínima in in ñayivi, mé a cán queá najánaha nu yo ña ndiquehe vaha mé á na tóho. Jáchi nasahan ínima yii mé á nu ná tá quiahva nacaja xihín mí, na naquixi chichi Israel.

⁹ Ni in túhún toho í cō cúú yō nā vaha chága a juú ga inga na nu Ndióxi. Jáchi tá quiahva nandaja víí Ndióxi mí sahá ña cándéé iní Jesucristo quiahva já nandaja víí ri a nā cán va sahá ña cándéé ini na Jesucristo. ¹⁰ Ta viti cúú á tátuhun nandindójó ndó ña nacaja Ndióxi tá nachindahá Jesucristo quivi a sahá cuachí. Ta viti cúní ndó caja ndúsa ndó xihín nā tóho yóho ña ná cacu vaha na ley Moisés. Ta sa cándaā ini ndó ña ni mí ta ni tásáhnú jícó yō a cuú caja í cacu vaha í ley cán. ¹¹ Joo ña cándéé cáhnú iní quéa ña jácacu maní uun Ndióxi mí sahá ña táhvi ini Jesucristo saha mí. Ta quiahva já táhvi ri ini a sahá nā tóho cán va —nacachi Pedro xihín ná.

¹² Ta xihín ña yóho nacatáji yúhu tóco ndihi nā cán. Ta táa johó na tá nacasáhá Pablo xihín Bernabé ndícani da nu ná tóco ndihi ña náhnú xihín ña xitúhún ña nasahan Ndióxi ñamaní nu dá caja da nuú nā cōo naquixi chichi Israel cán. ¹³ Tá nandihí nacahan da cán já nacasáhá Jacobo cáchi da já:

—Cuni johó ndó ná cahan í xihín ndó, ñani í. ¹⁴ Sa nacaxi túhún Simón, da naní tucu Pedro nu yō tá nu cuítí nacaja Ndióxi ñamaní xihín nā tóho ta nacaxi a nā ña ná nduu na ñayivi cuéntá mé á. ¹⁵ Ta in quiahva cahan ña yóho xihín ña nacahyí nā profeta sanahá tá nacahyí nā ña nacachi Ndióxi:

¹⁶ Tá sa nayaha tiempo já ndicó cōo tucu ú. Ta tá quiahva nacaja cáhnú ñayivi yehe tá tiempo nasacomí David cuéntá sahá ñayivi Israel,

quiahva já vaxi quivi caja í ña ná caja cáhnú tucu na yehe.

¹⁷ Caja í já jáchi cúní ña ná ndinducú nā tóho yehe ña ná cacuu u xitoho tóco ndihi na,

mé ná cúú ná nacaxi yehe ná cacuu na cuéntá mí í.

¹⁸ Ña yóho quea ñacachi Ndióxi sanahá ndivaha tá ñacaxi tũhun a ndaja coo tiempo viti —ñacachi Jacobo xihín ña cán.

¹⁹ Já ñacachi tucu Jacobo já xihín ná:

—Sahá ña cán quea cáhan i ña co ndítahan caja ndúsa yó xihín ña tóho cacu vaha na ley Moisés jáchi ñacasahá ndíco ña íchi cuéntá Ndióxi viti. ²⁰ Joo ña ndítahan caja í quea cahyí yo in carta ná cũhun a nuú ña cúu cuéntá Jesús ndúu ñuu Antioquía já ná caja na ñamaní ña ná a cáxí ña cuñu quítí, rí najoco ñayivi nuú tiniñu yúú. Ta ná a cóo na xihín ña co cúu ñájíhí ña á yí ná. Ta coto ná a cáxí ña cuñu quítí, rí nasahnú. Ta coto ná a cáxí ña nii. ²¹ Jáchi janda sanahá najánaha ña ña yóho nuú ñayivi ndijáá ñuu tá quívi ndíquehe ndée ná tá jánaha ña ley Moisés nu ná ini veñuhu —ñacachi Jacobo xihín ná.

²² Anda já ña apóstol xihín ña sacuahá veñuhu cán xihín tóco ndihi ña cúu cuéntá Jesús najándique táhan na tũhun na ña caxi na tañu tóco ndihi ña cúu cuéntá Jesús cán java da ná cũhun ñuu Antioquía xihín Pablo xihín Bernabé. Ta da ñacaxi na cũhun cúu Judas, da naní tucu Barsabás xihín Silas. Ndívi da yóho cúu da íin saha nuú ña cúu cuéntá Jesús cán. ²³ Ta ña yóho cúu tũhun ndáa nu carta ñéhe ña cán cuahan ña:

“Tóco ndihi ndehe, ña cúu apóstol xihín ña sacuaaha veñuhu xihín ña cúu cuéntá Jesús ndúu ñuu yóho chín-dahá nde Ndióxi coo ndóhó, ña cúu cuéntá Jesús, ña coo ñaquixi chichi Israel, ña ndúu ñuu Antioquía xihín ñundáhyi cuéntá Siria xihín Cilicia jan. ²⁴ Sa ñañehé nde tũhun ña ñaquee java ña cúu cuéntá Jesús ñuu yóho ñasaa ña chí jan tá coo ñaxica ña ñamaní nuú nde cũhun ña. Ta najáquihvi ña ndóhó ta najájana na jini ndó xihín tũhun cáhan ña jáchi cáhí ña xihín ndó ña ndítahan nu ndó chícaan ndó marca yiquí cuñu ndó ta ndítahan cacu vaha

ndó ley Moisés já ná cuu çacu ndaa ínima ndo. ²⁵ Sahá ña cán queá ñuhu johu ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndohó. ²⁶ Mé Pablo xihín Bernabé yóho ndúu tiahvha da quivi da saha Jesucristo, mé a cúu xitoho í. ²⁷ Ta chindahá nde Judas xihín Silas já ná çahan yúhu mé ná xihín ndo já ná ndicani na saha tóco ndihi ña yóho nu ndo. ²⁸ Mé ínima yii Ndióxi najáçahan ndehe ña co ndítahan nuú nde caja ndúsa nde xihín ndó cacu vaaha ndó tóco ndihi ña sáhdá ley Moisés. Joo ná çahan nde xihín ndo ndía queá co ndítahan caja ndó: ²⁹ Coto a cáxi ndó cuñu quíti, rí najoco na nuú tiniñu yúu. Ta coto a cáxi ndo nii ta a cáxi ndó cuñu quíti, rí nasahnú. Ta coto a cóo ndó xihín ñájíhí á yí inga na. Tá ná cacu vaaha ndó tóco ndihi ña yóho já queá cúu ndó na cája vaaha. Ña yóho cúu tuhun çahan nde xihín ndo ta ná coo Ndióxi xihín ndo.” Ña yóho cáhí carta naçindahá na nuú na ñuu Antioquía cán.

³⁰ Anda já naquee na cán cuahana na ñuu Antioquía. Ta tá naixinu na ñuu Antioquía cán já najátaca na tóco ndihi na cúu cuénta Jesús cán já nandiquiahva na carta nu ná. ³¹ Ta tá nandihí naçahvi na cúu cuénta Jesús mé carta já naçajii ndivaha ini na jáchi nandindeé chága ví ini na naçaja ña cáhí carta cán. ³² Mé Judas xihín Silas cúu da profeta, da jáyaha tuhun çahan Ndióxi nuú ñayivi. Ta xihín ña yóho naçahan da cuahá tuhun ndeé ini na cúu cuénta Jesús. ³³ Naçanduu na cán chá quivi ta chí naçacu ini Judas xihín Silas ndicó coo da ñuu Jerusalén jáchi cán ndúu na naçindahá ñahá ñuu Antioquía. Já nandindayí na cúu cuénta Jesús da ña ná coo vaaha da tá çuhun da íchi. ³⁴ Joo naçacu ini Silas candoo da ñuu Antioquía cán. ³⁵ Ta naçandoo Pablo xihín Bernabé chága quivi ñuu Antioquía cán ta xihín cuahá java ga na najánaha chága na tuhun vaaha saha Jesús nuú ñayivi.

Cuah̄an tucu Pablo cah̄an da tuhun vaha sah̄a Jesús nuú ñayivi

³⁶ Tá nayaha quivi já nacachi Pablo já xihín Bernabé:

—Cóho coto nihní na cúu cuéntá Jesús ndúu ndijáá ñuu nuú naxica nuu í nacahan yó tuhun Ndióxi jihna já ná candehé yo á ndíco yii va na Jesús —nacachi da.

³⁷ Cándusa Bernabé cuhun da joo cúni da candaca tucu da Juan, da cahan na Marcos xihin ña cuhun da xihin ná.

³⁸ Joo Pablo nacahan da ña vaha chága ná a cáñehe na da cuhun da xihin ná jáchi najándacoo da na tá naxinu na estado Panfilia sahá ña coó naxeen ga da caca nuu da caja da chuun Ndióxi xihin ná. ³⁹ Nanditúhún cuaha ná sahá ña yóho joo coó nandique táhan tuhun na sahá ña cán quéa nasahnda táhan na. Sahá ña cán quéa ñañehe Bernabé Marcos cuahan xihin dá chí isla Chipre. ⁴⁰ Ta naxaxi Pablo Silas candaca táhan xihin dá. Ta naxica tahví na cúu cuéntá Jesús nu Ndióxi sahá dá ña ná chindeé a da nuú cuhun da. Anda já naquee da cuahan da. ⁴¹ Nayaha da chí ñundáhyi Siria xihin ñundáhyi Cilicia ta níí cúu nuú cuahan da sáhan da tuhun ndeé ini na cúu cuéntá Jesús ña ná candeé chága ini na mé á.

16

Cátahan Timoteo xica da xihin Pablo xihin Silas

¹ Ta nayaha Pablo xihin Silas ñuu Derbe anda já naxinu coo na ñuu Listra. Ta cán nandiñehe ná in da cúu cuéntá Jesús, naní Timoteo, da cúu jahyi in ña cúu cuéntá Jesús, ña ñaquixi chichi Israel. Ta tátá da cúu griego. ² Ta na cúu cuéntá Jesús ndúu ñuu Listra xihin na ndúu ñuu Iconio nacahan vaha na sahá Timoteo. ³ Cúni Pablo ña ná catáhan Timoteo xihin dá caca nuu da xihin dá sahá ña cán quéa nacaja Pablo ña nachicaan na marca yiquí cuñu Timoteo tá quiahva cáchi ley Moisés já ná a cahan núu na

Israel ndúu ndijáá ñuu válí cán saha dá. Jáchí sa xíní vaha ndihi na cán ña cúu Timoteo jahyi in taa griego sahá ña cán queá coó nachicaan na marca Timoteo tá loho chá da. ⁴ Ta já naquee ndihi na cán cuahan na ta níí cúu ñuu nu xíca na cuahan na cáxi tuhun na nuú na cúu cuéntá Jesús ña ná caja na ña nacachi na sacuahá xihín na apóstol ndúu ñuu Jerusalén cán. ⁵ Xihín ña yóho nandindacú chága na cúu cuéntá Jesús ta cándéé cáhnu chága ini na mé á. Ta in in quiví yáha joho ndícuahá chága ñayivi ndíhvi íchí cuéntá Jesús.

Ña naxini Pablo nacaja Ndióxi tá nasahjin da ñuu Troas

⁶ Ta nasaji ínima yíi Ndióxi na cán ña ná a cühun na estado Asia cahan na tuhun vaha saha Jesús nuú ñayivi cán. Sahá ña cán queá nayaha na ñundáhyi cuéntá Frigia xihín Galacia cuahan na. ⁷ Já naxinu coo na yúhu estado Misia. Ta chí cán yaha na cühun na ñundáhyi cuéntá Bitinia nacahan na. Joo coó nasahan ínima yíi Ndióxi ñamani nu ná caja na ña. ⁸ Anda já nayaha saa na estado Misia janda quiahva naxinu coo na in ñuu naní Troas. ⁹ Ta in nuú nani íin da mé ñuu Troas cán nasani ndímáhnú Pablo. Ta ña naxini da cúu in taa, da naquixi chí estado Macedonia. Ta cándichi da cahan ndahví da xihín Pablo já cáchí da já: “Naha ndó chí Macedonia yóho ña ná chindeé ndó ndehe.” ¹⁰ Tá nandicani Pablo ña yóho nuú nde chí ivi laá nacaja tiahva nde ñaha nde jáchí sa nacandaa cáxi ini nde ña mé Ndióxi queá cána ndehe ña ná cühun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

Xínu coo Pablo xihín na xíca xihín dá ñuu Filipos

¹¹ Tá nandihí já nandaa nde barco ñuu Troas já naquee nde cuahan ndacú nde isla naní Samotracia. Ta janda quiví itaan já naxinu coo nde ñuu Neápolis. ¹² Ta cán

nanuu nde mé barco cuahan sáhá nde chí ñuu Filipos. Mé ñuu Filipos cán cúú á ñuu ña ín chága saha nuú java ga ñuu válí ñúhu chí Macedonia cán. Ta ndíco a ñuu Roma. Ta nasanduu nde ñuu Filipos cán chá quívi. ¹³ Ta in quívi ndíquehe ndée ná já naquee nde cuahan nde yuhú ñuu yati yuhú yuta nu sá taca ñayivi xíca tahví na nu Ndióxi. Já nasacoo nde cán ta nacasáhá nde cáhan nde tuhun vaha saha Jesús nuú najihí, na táca cán. ¹⁴ In mé ñañaña cán naní ña Lidia ta cúú ñá ñá ñuu Tiatira. Mé Lidia yóho cúú ñá ñá jícó jáhma vaha ña color ndíhí. Ta cúú ñá in ñá cája cáhnu Ndióxi. Ta nani xíní joho ñá ña cáhan Pablo saha Jesús já nasuná Ndióxi xíní túní ña já nacandúsa ñá ña cáhan Pablo cán. ¹⁵ Tá nandihi nacandúta ñá xihín na vehe ñá ta já cáhí ña já xihín nde:

—Tá ta mé a ndaa ndícuni ndó yehe ña cúú u cuéntá Jesús caja ndó ñamaní saa ndó vehe e coo ndó —nacachi ñá xihín nde.

Ta nacaja ndúsa ñá xihín nde chí nacandoo too nde vehe ñá cán.

¹⁶ Ta ndaja coo in tañu tá cuahan nde nu sá xíca tahví nde nu Ndióxi já nanditahan nde in ñá tacú, ñá ndácaan ínima quini ini. Ta cája ña cán ña ná ndicuni ini ñá. Mé ñá tacú yóho cúú ñá naxeen na. Ta mé xitoho ñá cán tává cuaha dá jjuhún sahá ña ndícuni ini ñá. ¹⁷ Ta mé ñá tacú yóho nacasáhá ña ndíco ña jata Pablo xihín jata nde ta cáyuhú cóhó ña já cáhí ña já:

—Da cája cáhnu Ndióxi, ña cáhnu ín indiví cúú da casahan yóho. Ta xíca da cáxi tuhun da xihín ndó ndá quiahva cuu cacu ndaa ínima ndo —cáhí ña cáyuhú ña.

¹⁸ Já cuití já cuití cája ña cuahá quívi janda quiahva co ndée ga ini Pablo xihín ña cája ñá. Chí nandicoto nihni Pablo nu ñá já nacachi da já xihín ínima quini ndácaan ini ñá cán:

—Xihín quivi Jesucristo sáhdá i chuun nuun ña ná queún ini ñá loho yóho —cáchi Pablo.

Chí ivi laá naqueta ínima quini cán cuahan.

¹⁹ Joo tá naxini na cúu xitoho ñá cán ña a cóo ga cana jjuhún na caja ñá cán já natiin na Pablo xihín Silas já ñéhe na da nasahan na vechúun nuú na jutixia. ²⁰ Tá naxinu cōo na cán já nacachi na já xihín da cúu juéxe cán:

—Da naquixi chichi Israel yóho nandai cuu da jándinhi da ñayivi ñuu í. ²¹ Jáchi jánahá da costumbre mé va da nuú ñayivi. Ta mí a cúu candúsa í ta ni a cúu caja í costumbre da yóho jáchi cúu yó ñayivi ndíco ñuu Roma —nacachi na cán xihín juéxe.

²² Anda já nandicuíta ñayivi xihín dá. Já nasahnda juéxe cán chuun ña ná tavá na jáhma Pablo xihín Silas ta ná cani na ndívi da xihín yíto. ²³ Tá nandihí nacani quini ndivaha na da já nataán na da vecaa. Ta nasahnda na chuun nuú da ndáa vecaa cán ña ná candaa vaha da da. ²⁴ Tá natahnda chuun yóho nuú da ndáa vecaa cán já nachicaan da Pablo xihín Silas janda sa véhe cuíi vecaa cán. Ta já nachicaan da saha dá tañu ivi yíto naní cepo já ná ndituun vaha da.

²⁵ Joo tátuhun java ñuu xíca tahví Pablo xihín Silas nu Ndióxi ta xíta da ña cája cáhnu da mé á nani táa johó java ga na ñúhu ini vecaa cán nu cáhan da. ²⁶ In jonáa cuití nacasáhá táan ndeé ndivaha chí janda yuu ndúhu sahá vecaa cán canda. Anda já nanuna tóco ndihí yéhe caa cán ta nacuyu cadena nasandico tóco ndihí na nasañuhu vecaa cán. ²⁷ Anda já nandicaxí ini da ndáa vecaa cán ta tá naxini da núná yéhe caa cán já natuhun da yuchú caní dá ña cahní da mé dá jáchi nacaán da sa naquee ndihí na nasañuhu vecaa cán cuahan na. ²⁸ Joo nacayuhú Pablo nu dá já nacachi Pablo já xihín dá:

—A cáhni tohún yohó jáchi yóho ndúu ndihí va nde.

²⁹ Anda já naxica da ndáa vecaa cán in lámpara já xínu da nandihvi da nu ndúu na vecaa. Ta chí quíji mé dá xihín ña yíhvi da já naxatí da nu Pablo xihín nu Silas. ³⁰ Tá nandihí já natavá da na já nacasáhá ndáca tuhún da na já naxachi da já:

—Ndía ndítahan caja i já ná jácacu ndaa Ndióxi ínima i —naxachi da.

³¹ Anda já nanducú ñehe Pablo xihín Silas tuhun nu dá já cáchi da já xihín dá:

—Ndítahan candúsún Jesucristo, xitoho í já ná cacu ndaa ínimun xihín ínima tóco ndihí na vehún —naxachi da.

³² Anda já nacasáhá Pablo ndícani da tuhun vaha saha Jesús nuú da cán xihín nu tóco ndihí na ndúu vehe da cán. ³³ Ta mé hora já naxaja tátá da ndáa vecaa cán nuú nandicuehe jata Pablo xihín jata Silas nuú naxani yíto cán. Ta tá nandihí já naxandúta da ndáa vecaa cán xihín tóco ndihí na vehe da. ³⁴ Tá nandihí já ndáca da Pablo xihín Silas naxahan da xihín dá vehe da. Ta cán naxaja ndíví na ña cuxu Pablo xihín Silas. Ta chí naxajii ndivaha ini da ndáa vecaa cán xihín na vehe da jáchi sa nandiquehe na íchi cuéntá Jesús.

³⁵ Ta naha inga quíví itaan já naxindahá na cúu juéxe cán policia nuú da ndáa vecaa cán ña ná janí da Pablo xihín Silas vecaa. ³⁶ Anda já naxachi da ndáa vecaa cán já xihín Pablo:

—Naxahnda na cúu juéxe chuun nuú i ña ná janí i ndohó cuhun ndo. Saha ña cán quea cáxi tuhun i xihín ndó cuáhán quee ndó ta ná cuhun Ndióxi xihín ndo —naxachi da xihín dá.

³⁷ Joo naxahan Pablo xihín da cúu policia cán já naxachi da já xihín ná:

—A váha toho nacaja na xihín nde jáchí cúu nde na romano ta na jutixia jan nacani quini na ndehe nu táhyí tóco ndihi ñayivi tá cámaní caja vií na sahá nde. Ta tá nandihí já nataán jiin ga na ndehe vecaa. Ta viti cúni na janí jehé na ndehe quee nde cuhun nde. Joo a váha toho cája na já. Sahá ña cán quea a queta nde janda quiahva ná quixi mé ná tavá na ndehe já quee nde —nacachi Pablo xihin da cúu policia cán.

³⁸ Anda já nasahan na cúu policia nandicani na nuú na cúu juéxe ña nacachi Pablo xihin ná. Tá nacandaa ini na cúu juéxe cán ña cúu Pablo xihin Silas da romano chí nayihví na. ³⁹ Anda já nasahan na naxica na ñamani nu Pablo xihin nu Silas ña ná caja cáhnu ini da sahá ña nacaja na. Já natavá na da vecaa ta tá nandihí já naxica na ñamani nu dá ña ná quee da ñuu cán cuhun da. ⁴⁰ Tá naquee Pablo xihin Silas vecaa já nasahan na vehe ña naní Lidia. Ta tá nandihí nandique táhan da xihin na cúu cuéntá Jesús ndúu cán já nasahan da tuhun ndée ini na anda já naquee da cuahan da.

17

Ndínihí ñayivi ñuu Tesalónica

¹ Nani xica Pablo xihin Silas cuahan da íchí nayaha da chí ñuu naní Anfípolis xihin inga ñuu naní Apolonia anda quiahva naxinu coo na ñuu Tesalónica. Cán nasahiin veñuhu nu tácá na Israel. ² Ta sahá ña nacaan Pablo sáhan da veñuhu quíví ndíquehe ndée ná sahá ña cán quea naquihvi da veñuhu cán. Ta tixi uní semana nacahan da tuhun Ndióxi xihin ná mé quíví ndíquehe ndée ná. ³ Ta nu libro yí Ndióxi tává Pablo tuhun ndícani da nu ná ña ndítahan nuú Jesucristo ndoho ini a. Ta tá sa nandihí naxihí a já nditacu a jáchí já cáchí libro yí Ndióxi coo. Já nacachi Pablo já xihin ná:

—Mé Jesús, mé a cáhan i saha nu ndo yóho, mé a yóho cúu Cristo, ña nachindahá Ndióxi cacomí cuéntá sahá ñayivi —ñacachi Pablo.

⁴ Ta chí ñacandúsa java na Israel ña ñacachi Pablo xihin ná. Andá já ñacatáhan na xihin Pablo xihin Silas xíca nuu na. Ta cuahá ri na griego, na sa cája cáhnu Ndióxi ndúu cán ñacandúsa na ña ñacachi Pablo xihin ná. Ta ñacandúsa ri cuahá najihí, na ín toní ñúhú ñayivi xihin ta ñandihvi na íchi cuéntá Jesús. ⁵ Joo na Israel, na co cándúsa Jesús ñacasáhá cáhiví ini na. Sahá ña cán quéa najátaca na java taá quini, da coó chuun nu xíca nuu mé cáyé cán. Já ñacasáhá na jándiníhi na ñayivi mé ñuu Tesalónica cán. Andá já cáti na nasahan na vehe in da naní Jasón. Ta xihín ña ndúsa ñaquihvi na vehe da cán ña ndínducú na Pablo xihin Silas ña tavá na da ndíquiahva na da nuú na sacuahá ñuu cán. ⁶ Joo coó ñandiñehe ná Pablo xihin Silas cán sahá ña cán quéa jandá mé Jasón, da xihín ñaha vehe cán ñúhu na da xihín java ga na cúu cuéntá Jesús cuahan na nuú na jutixia ñuu cán. Tá ñandihí já cáyuhú na já cáchí na já xihín na jutixia cán:

—Da naní Pablo xihín da naní Silas xíca nuu da níí cúu ñuyiví jájana da jiní ñayivi. Ta quiahva já cúni da caja da xihín ñayivi ñuu í. ⁷ Ta da naní Jasón yóho ñandiquehe vaha da da cán vehe da. Ta xihín ña cája na yóho náha ña co cája na ña sáhdá ley ñuu Roma ta ni co cája cáhnu na da cómí cuéntá sahá ñuu Roma. Jáchi mé na yóho xíca na cáhan na ña ín inga da cómí cuéntá sahá ñayivi. Ta cáchí na cúu dá in da naní Jesús —ñacachi na.

⁸ Tá ñaxini johó ñayivi xihín na jutixia cán ña yóho chí ñacasáhá na ndívaá na. ⁹ Joo ñachahvi Jasón xihín java na cúu cuéntá Jesús cán jihuún nuú na jutixia cán já najaní ñahá na.

Cuahān Pablo xihin Silas ñuu Berea

¹⁰ Ta tá sa ñacuaá mé ñuu já ñachindahá ña cúu cuéntá Jesús cán Pablo xihín Silas já ná cuhun ña chí ñuu Berea. Ta tá ñaxinu cõo da ñuu Berea cán já ñandihvi da veñuhu ña Israel cán. ¹¹ Ta ñasuná chága ña Israel cán ínimá ná a juú ga ña ndúu ñuu Tesalónica chí cájii íní ña ñandiquehe na tuhun Ndióxi. Ta ndijáá níi quivi ndínducú ña nuú tuhun Ndióxi ña á mé a ndaa cúu ña jáñaha Pablo nu ná. ¹² Ta cuahá táhan ña ñaquixi chichi Israel cán ñandiquehe na íchi cuéntá Jesús. Ta cuahá najihí griego, ña tácu ini nación cán xihín cuahá ñataa griego ñandiquehe na íchi cuéntá Jesús. ¹³ Joo tá ñañehé ña Israel ñuu Tesalónica tuhun ña íin Pablo ñuu Berea cáhan ña tuhun Ndióxi nuú ñayivi chí ivi laá ñasahan ña jándinihi na ñayivi ñuu Berea cán já ná ndicuita na xihín Pablo. ¹⁴ Joo ivi laá ña cúu cuéntá Jesús cán ñachindahá ña Pablo cuahan ña yati yuhú tañuhú nani ñacandoõ Silas xihín Timoteo ñuu Berea cán. ¹⁵ Ta java ña cúu cuéntá Jesús ndáca na Pablo ta ñasañehe na ña janda ñuu Atenas. Ta tá ñandicó cõo ña cán ñuu Berea já ñéhe na chuun ña ná cuhun quíi Silas xihín Timoteo ñuu Atenas ná ndique táhan da xihín Pablo.

Íin Pablo ñuu Atenas

¹⁶ Nani ndáti Pablo xinu cõo Silas xihín Timoteo ñuu Atenas cán já ñacasáhá ndíhi ini da jáchi níi cúu ñuu cán ñachutú ndaa xihín cuahá tiniñu yúu ndícahán ñayivi ñuu cán. ¹⁷ Sahá ña cán queá ñacasáhá Pablo cáhan ña tuhun Ndióxi xihín ña Israel ini veñuhu na. Ta quiahva já ñacahan ri da tuhun Ndióxi xihín java ña tóho, ña cája cáhnu Ndióxi cán. Ta jári ndijáá níi quivi cáhan ña tuhun Ndióxi xihín ñayivi táca nuú yahvi ñuu cán. ¹⁸ Ta java ña, ña jácuaha íchi cuéntá Epicureos xihín ña jácuaha íchi cuéntá Estoicos ñacasáhá ndítuhún ña xihín Pablo. Joo java ña cán cáchi ña saha Pablo ña cuahá ndivaha cáhan

da ta cō cándaꝯ ini na ndá queá cáhan da. Ta java na cáchí na já saha dá:

—Á tá cōꝯ ta java ga ndióxi xíca nuu da cáhan da saha —cáchí na.

Naçachi na ña yóho saha Pablo jáchi naxica nuu mé dá cáhan da tuhun vaḥa saha Jesús ta cáhan da ña nanditacu tucu Jesús. ¹⁹ Saha ña cán queá ndáca na Pablo cuahan ná in nuú naní Areópago jáchi cán cúú nu ndítaca ñayivi ndítuhún na. Ta tá naxinu cōꝯ Pablo cán já naçasahá ndáca tuhún na da já cáchí na já xihín dá:

—Á cajún ñamaní caxi tuhún xihín nde ndá cúú ña saá ña xícún jánaḥún nuú ñayivi. ²⁰ Jáchi sa nañehé nde tuhun ña cátóntó ñayivi xihín ña jánaḥún nu ná ta viti cúni nde candaꝯ ini nde ndía queá jánaḥún nu ná —naçachi na xihín Pablo.

²¹ Naçachi na já xihín Pablo jáchi tóco ndihi ñayivi Atenas xihín na tóho ndúu cán ndijáá ní quivi ndinuhu ini na ndítuhún na ñaha saá, ña naxini johu na jánaḥa inga na.

²² Anda já naçandichi Pablo tañu na ndúu mé nuú naní Areópago cán já naçachi da já xihín ná:

—Candehé ndó, ñayivi ñuu Atenas. Candaꝯ cáxi ini i ña cúú ndó ñayivi cátóó ndicahán cuahá nuú tiniñu yúú, ña cúú ndióxi ndo ta ndícahán ndó ña xihín ndinuhu ini ndó. ²³ Jáchi tá xíca nuu i ñuu ndó já naxini i cuahá nunáa nu cája cáhnu ndó ña. Ta nu xíca nuu i cán naxini i inga nunáa. Ta nunáa cán ndáa in tuhun ta cáchí a: “Naa yóho cúú nu ndícahán nde ndióxi cō xini nde”, já naxini i cáchí a. Ta vaṭí cō xini ndó Ndióxi ndícahán ndo cán joo cája cáhnu ndó ña. Ta mé Ndióxi cán queá cúni cahan i saha nu ndó viti.

²⁴ Mé Ndióxi cán queá naçavaḥa ñuyiví xihín tóco ndihi ñaha ín ñuyiví yóho. Ta mé á cómi a cuénta sahá indivi

xihin ñuyivi. Ta cõ ndácaan toho mé á ini veñuhu ña ñacavaha ndahá ñayivi. ²⁵ Ta ni cõ xini ñúhú a chindeé ñayivi mé á jáchi sa mé á quéa cája ña ná catacu mí. Mé Ndióxi quéa sáhan tachi yó nu yõ ta mé á sáhan tóco ndihi ñaha nu yõ.

²⁶ Mé Ndióxi cán ñacavaaha in taa nu cuítí. Ta tóco ndihi ñayivi ndúu ñuyivi ñaquixi na chichi mé taa, da ñacavaaha Ndióxi cán. Tá ñandihí já ñajándicuita nuu Ndióxi ñayivi ñaquixi chichi da cán ní cúu ñuyivi já ñatahnda in in nación canduu a. Ta sa ñasacu ini Ndióxi ndaja tiempo canduu in in nación ñuyivi yóho ta ñasacu ini mé á ndáchí coo in in nación. ²⁷ Já ñacaja Ndióxi jáchi cúní a ña ná ndinducú ñayivi mé á ta já ná ndiñehe ná íchi cuénta mé á. Joo mé a ndaa yati va iin Ndióxi nu tóco ndihi ñayivi. ²⁸ Jáchi mé á cája ña ná catacú ta ná canda yiquí cuñu í. Sanahá ñacachi java taa cuénta mé ndó já: “Cúu yó ña vehe Ndióxi.” ²⁹ Joo tá mé a ndaa cúu yó ña vehe Ndióxi cõ ndítahan cahán yõ ña Ndióxi cúu tiniñu yúu ña ñajándicuchu na xihín jiuñun cuáán á xihín jiuñun cúxú. Ta ni cõ ndítahan cahán yõ ña Ndióxi cúu tiniñu yúu cávaha ndahá ñayivi xihín yuu. Jáchi jini mé va ña ñan cána ña cávaha na. ³⁰ Jihna ñasacu ini Ndióxi ña a jándoho toho a ini ñayivi sahá cuachi ñasacaja na jáchi cõ cándaã ini na ña cúní mé á, nduu. Joo viti sáhdá Ndióxi chuun nu tóco ndihi ñayivi ña ná ndicó cõ ini na ta ná a cája cáhnu ga ña tiniñu yúu. ³¹ Jáchi sa ñasacu Ndióxi in quivi cajú vií a saha tóco ndihi ñayivi ndúu ñuyivi yóho. Ta sa ñacaxi mé á Jesús ña cajú vií ndaa mé á saha ná. Ta ñajánditacu tucu Ndióxi Jesús tá ñandihí ñaxihí a. Ta xihín ña yóho ñañaha nuú ñayivi ña mé a ndaa cajú vií Jesús saha ná — ñacachi Pablo xihín ndihi ña cán.

³² Tá ñaxini joho ña cán ña cáhí Pablo ña vaxi quivi nditacu ndii já ñacasáhá java ña cán sácu ndaa na da. Joo

java na cáchí nā já xih̄in dá:

—Vaha chága ná cahún sahá ña jan nuú nde inga tañu
—cáchí nā xih̄in dá.

³³ Andā já naquee Pablo nu Areópago cán cuahan da.

³⁴ Joo java ñayivi, nā nacandúsa ña cáchí da nacasáhá ndíco nā da xíca na. Tañu nā cán nasandacaan in da naní Dionisio, da cúu táhan nā ndítaca Areópago cán. Ta tañu nā nacandúsa cán ndácaan ri in ñáñaha naní Dámaris. Ta jári java chága nā cándúsa nandihvi na íchi cuéntá Jesús.

18

Xínu coo Pablo ñuu Corinto

¹ Tá nandihí já naquee Pablo ñuu Atenas cán já cuahan da chí ñuu Corinto. ² Ta mé cán nandique táhan da xih̄in in da Israel naní Aquila, da nasacu estado Ponto. Ta jacá cúu saá va naxinu coo Aquila ñuu Corinto cán xih̄in ñájihí da, ña naní Priscila. Ta ndíví nā yóho sa naquee na ñuu Roma ndácaan nación Italia jáchi Claudio, da cómi cuéntá sahá nā ñuu Roma cán nasahnda da chuun ña ná quee ndihí nā Israel cuhun nā. Ña cán quea naxinu Aquila xih̄in ñájihí da ñuu Corinto cán. Andā já nasahan Pablo naxito nihni da nā nu ndúu nā cán. ³ Ta nacandoo Pablo vehe nā cán cája chúun da xih̄in ná jáchi sa mé chuun ña cája nā cán tiahva ri da cán va. Ta chuun nasacaja na quea cávaha na vehe lona, ña ndeé. ⁴ Ta tá xínu coo quivi ndíquehe ndeé ná já sahan da veñuhu nā Israel cahan da tuhun Ndióxi xih̄in ná. Ta já najáxinu da ini nā Israel xih̄in nā tóho já nacasáhá nā cándúsa na Jesús.

⁵ Ta ndaja coo najándacoo Silas xih̄in Timoteo estado Macedonia ta naxinu coo na ñuu Corinto cán. Andā javí najándacoo Pablo chuun cája da cán já nacasáhá da ndúcú ndeé chága da cahan da tuhun Ndióxi nuú ñayivi. Ta cáxi táhyí cahan da xih̄in nā naquixi chichi Israel ña mé Jesús

cúu á ña ndáti na chindahá Ndióxi quixi. ⁶ Joo na naquixi chichi Israel cán coo nandiquehe na tuhun cáhan Pablo ta nacasáhá cánahá na xihin dá ta cáhan núu na saha Jesús. Anda já naquiji nihni Pablo jáhma dá já ná candaa ini na ña co ndójo ga da cuachi sahá na Israel cán ta já nacachi da já xihin ná:

—Tá ná cuhun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa nacahan i tuhun Ndióxi xihin ndo ta co cuni ndó cándusa ndó ña. Viti xihin chí nuu cuhun i cahan i tuhun vaha saha Jesús nuu na coo naquixi chichi Israel —nacachi Pablo xihin ná.

⁷ Já naqueta da veñuhu na cán cuahan da. Já nasaa da vehe in da naní Justo, da cája cáhnu Ndióxi. Ta yati jiin veñuhu cán ín vehe da. ⁸ Ta in da naní Crispo, da sáhdá chuun veñuhu cán nacandúsa da Jesús, xitoho í xihin tóco ndihi na vehe da. Ta cuaha táhan mé na ñuu Corinto cán nandiquehe na íchi cuéntá Jesús ta nacandúta ná tá naxini johu na tuhun Ndióxi nacahan Pablo xihin ná. ⁹ Ta ndaja coo in ñuu naquixi tátuhun in sani nu Pablo ta xihin ña cán nacahan Ndióxi xihin dá já nacachi a já:

—A yíhvún cahún sahá i nuu ñayivi ta coto a catáji yuhun cahan chágun xihin ná saha i. ¹⁰ Jáchi ín vi xuhun ta ni in na a cúu tiin yohó ña ná caja xíxi na xuhun. Jáchi sa ndúu cuahá ndivaha ñayivi ñuu yóho, na cacuu cuéntá mí i —nacachi Ndióxi xihin dá.

¹¹ Sahá ña cán quéa nasahjin tóo Pablo in cuia java ñuu Corinto cán ta najánaha da tuhun Ndióxi nuu ñayivi cán.

¹² Joo mé tiempo cán nacasáhá cómi in da naní Galión cuéntá sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cuni na caja xíxi na xihin Pablo chí natiin na da já ñehe na da cuahan da

vechúun. ¹³ Ta mé cán naçasáhá cáchí na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája í já —cáchí na cán xihín gobernador.

¹⁴ Anda já ndúcú Pablo candichi da cahan da joo mé Galión cán naçasáhá cáchí da já xihín na Israel cán:

—Tá cuachi ndeé ná caja da yóho já queá cuu cuni johó i nu cáhan ndo ná ndaja ndichi i saha dá, nduu. ¹⁵ Joo co cúni toho i caja víi sahá ña jan jáchi cúu á sahá tuhun cáhan ndo xihín sahá quivi ñayivi Israel xihín saha ley mé va ndó ña cán queá vaha chága ná caja víi mé va ndó sahá ña yóho —nacachi da cúu gobernador cán xihín ná.

¹⁶ Tá nandihí já natavá da na Israel vechúun cán. ¹⁷ Anda já natiin tóco ndihí na griego cán da naní Sóstenes, da sáhdá chuun veñuhu cán. Ta natiin na da mé nu táhyí mé da cúu gobernador cán nacani na da. Joo coó nasahní toho Galión mé dá sahá ña nacaja na.

Ndíco coo tucu Pablo chí Antioquía

¹⁸ Cuahá va quivi nacandoo tóo chága Pablo ñuu Corinto cán. Anda já nandindayí da na cúu cuénta Jesús ndúu cán já naquee da cuahan da ñundáhyi cuénta Siria. Ta ndáca da Aquila xihín Priscila cuahan na xihín dá. Ta tá naxinu da ñuu Cencrea tá cámani ndaa da barco cuhun chága da chí nuu já najatá lahla da jini dá já ná xinu coo nuu tuhun nacahan da. ¹⁹ Ta tá naxinu coo da ñuu Efeso xihín na ndáca táhan xihín dá cán já najándacoo da Priscila xihín Aquila. Ta naquee da cuahan da chí veñuhu ñuu Efeso cán nuu nacahan da tuhun Ndióxi nuu na Israel, na táca cán. ²⁰ Tá nandihí já naçasáhá cáhan ndahví na Israel cán xihín Pablo ña ná candoo tóo da chága quivi xihín ná. Joo coó

naxeen toho da. ²¹ Ña ñacaja da quea ñandindayí da ña já ñacachi da já xihin ná:

—Ndítahan cuhun i coo i Jerusalén jáchi sa ñandindaa quivi vaxi víco. Joo ndicó coo tucu u coto nihni i ndohó tá cúnj Ndióxi —ñacachi Pablo xihin ná.

Tá ñandihi já ñandaa da barco ñaquee da ñuu Efeso. ²² Ta tá ñaxinu coo da ñuu Cesarea já ñaquee da cuahan da chí ñuu Jerusalén cahan Ndióxi da xihin ña cúu cuénta Jesús ndúu cán. Tá ñandihi já ñaquee da cuahan da chí inga ñuu naní Antioquia. ²³ Ta tá ñandihi ñasahin da chá quivi cán já ñaquee tucu da cuahan da tá in tá in ñuu válí ñúhu chí estado Galacia xihin estado Frigia ña quiahva da tuhun ndeé ini ña cúu cuénta Jesús ndúu cán.

Cáhan Apolos tuhun Ndióxi nuú ña ñuu Efeso

²⁴ Mé tañu já ñaxinu coo in da ñaquixi chichi Israel naní Apolos mé ñuu Efeso cán. Mé Apolos yóho cúu dá da ñacacu ñuu Alejandría. Ta cúu dá in da tiaha vaha tuhun Ndióxi ta tiaha vaha da jánaħa da ña nuú ñayivi.

²⁵ Mé Apolos yóho sa najacuaha vaha da íchi cuénta Jesús, xitoho í ta xihin ndinuhu ini da cáhan da saħa mé á nuú ñayivi. Ta cáxi táhyí jánaħa da saħa Jesús nu ná. Ta ñacahan da xihin ná ña ndítahan candúta ñayivi tá quiahva najácandúta Juan ñayivi jihna. Joo co xini vaha da tóco ndihi ña najánaħa Jesús. ²⁶ Chí já ñaquihvi mé Apolos veñuhu cán cahan da tuhun Ndióxi xihin ñayivi jáchi co yíhví da cahan da xihin ná. Ta ndaja coo ñaxini joho Priscila xihin Aquila nu cáhan da. Ta tá ñandihi já ñéhe na da cuahan ña já ñandicani vaha chága ña nu dá ndaja ín íchi cuénta Ndióxi. ²⁷ Ta tá ñasacu ini Apolos cuhun da chí estado Acaya já ñachindeé ña cúu cuénta Jesús da já ná cuu cuhun vaha da. Ta ñacahyí ña in carta ñasahan ña nu dá ná quiahva da ña nuú ña cúu cuénta Jesús ndúu cán já quea ná ndiquehe vaha na da. Ta tá ñaxinu coo

Apolos yóho estado Acaya cán n̄achindeé cuahá ndivaha da n̄a cúu cuéntá Jesús, n̄a n̄acandeé ini mé á sahá ña n̄atahvi ini Ndióxi sahá ná. ²⁸ Ta n̄u cáxi táhyi ndihi ñayivi nanaha da ña a juú ña ndaa cúu ña jánaha na Israel nuú ñayivi. Ta xihín tuhun Ndióxi nanaha da n̄u ná ña mé Jesús cúu Cristo, mé a n̄achindahá Ndióxi cacomí cuéntá sahá ñayivi.

19

Tá iin Pablo ñuu Efeso

¹ Ta nani iin Apolos ñuu Corinto cán já nayaha Pablo chí yúcu janda quiahva naxinu cõ da ñuu Efeso. Ta cán nandiñehe dá java n̄a cúu cuéntá Jesús. ² Já nandaça tuhún da n̄a já n̄acachi da já xihín ná:

—Á n̄andicutú ndaa ínima ndõ xihín ínima yii Ndióxi tá n̄acandúsa ndó Jesús —n̄acachi da xihín ná.

Já n̄anducú ñehe n̄a cán tuhun n̄u dá já cáchi n̄a já xihín dá:

—Chí a ñaha mé va candaã ini nde sahá ínima yii Ndióxi jan —n̄acachi n̄a cán xihín Pablo.

³ Anda já nandaça tuhún Pablo n̄a já cáchi da já xihín ná:

—Ndaja vaha n̄acandúta ndõ, dá já.

Anda já n̄anducú ñehe n̄a cán tuhun n̄u dá já n̄acachi na já:

—N̄acandúta nde tá quiahva najánaha Juan —n̄acachi na.

⁴ Anda já n̄acachi tucu Pablo já xihín ná:

—Najácandúta Juan ñayivi já ná nahã n̄a nuú ñayivi ña n̄andijama na ta cõ cája ga n̄a cuachi nasacaja na jihna. Joo n̄acahan Juan xihín ná ña ndítahan n̄u ná candúsa na inga da vaxi jata dá. Ta da n̄acahan Juan cán sahá cúu Jesús, mé

a nāchindahá Ndióxi cacomí cuéntá sahá ñayivi —nācachi Pablo xihín ná.

⁵ Tá naxini johō nā cán ñā nācachi Pablo xihín ná chí ivi laá nacandúta ná cuéntá Jesús, mé a cúú xitoho í. ⁶ Ta tá nāchojó Pablo ndáha dá jini ná já naxinu ínima yii Ndióxi najāndicutú a ini na. Andā já nacasáhá nā ndícahan nā inga tuhun ñā cōó nasatiahva na. Ta jáyaha na tuhun nācahan Ndióxi nuú nā ndúu cán. ⁷ Ta tixi ndihi nā cán cúú ná tátuhun uxu ivi taa.

⁸ Ta tixi unī yoo nasahiiin Pablo ñuu cán sáhan da veñuhu jánaħa da saħa Jesús nuú ñayivi xihín ndinuhu ini da. Ta jáxinu da ini ñayivi ñā ná ndihvi na íchi cuéntá Jesús já cuu cacomí mé á cuéntá saħa ná. ⁹ Joo java nā cán sáa ini na ta cōó naxeen na candúsa na nu cáhan da. Ñā nācaja na quēa nacasáhá cáhan núu na sahá tuhun vaha cáhan saħa Jesús nuú ñayivi. Sahá ñā cán quēa natavá xoo Pablo nā cúú cuéntá Jesús tañu nā cán já nasahan ndaca da nā in vehe escuela nu ín in da naní Tiranno ta cán jánaħa Pablo tuhun Ndióxi nu ná ndijáa ní quivi. ¹⁰ Já nasacaja Pablo tixi ivi cuia ta xihín ñā cája da naxini johō ndihi nā ndúu estado Asia tuhun vaha saħa Jesús, xitoho í. Ta nā naxini johō tuhun Ndióxi cán cúú ná nā naquixi chichi Israel xihín nā tóħo viti. ¹¹ Ta nācaja Ndióxi ñā ná cuu caja Pablo cuahá ñā xitúhún nuú ñayivi ndúu cán. ¹² Jáchi janda pañito á jáhma ñā cáni ndaa Pablo cán ñēhe na ñā cuahan nā ta jácani ndaa na ñā nā quihvi xihín á chí ndívaħa na. Ta tá ñúhu ínima quini ini na janda rí cán quēta cuahan.

¹³ Joo java nā Israel, nā cō cúú cuéntá Jesús xica nuu na tává nā ínima quini ñúhu ini ñayivi. Ta ndaja coo nasacu ini na caja chúun na quivi Jesús, xitoho í, ñā ná tavá nā ínima quini. Já nācachi nā cán já xihín ínima quini ndacaħan ini ñayivi:

—Xihín quiví Jesús ña xíca nuu Pablo cáhan da saha, sáhdá nde chuun nuun ña ná queún cūhun —nacachi na cán.

¹⁴ Já nacaja ndíhusa jahyi in da naní Esceva, da cúú da sacuaḥa nuú jutū veñūhu na Israel ndúu ñuu cán. ¹⁵ Joo tá nacachi na ña yóho xihín rí quini ñūhu ini in dataa já nanducú ñehe rí cán tūhun nu ná já cáhí rí já:

—Xíní vī yo cúú Jesús ta xíní ri ndá da cúú Pablo va. Joo mé ndó, cō xíní toho ī ndohó —nacachi rí quini.

¹⁶ Tá nacachi ínima quini cán já chí ivi laá nandava dataa ndácaan ínima quini ini cán jata ndíhusa na cán ta nacaja xíxi quini da xihín ná jáchí a juú quiahva ndacú da. Quini nacaja da cán xihín ná anda naxinu lahla ndihi na jata véhe ta chí a váha na nandicuehe na nacaja ínima quini cán. ¹⁷ Ta chí nacandaa ini ndihi ñayivi ndúu ñuu Efeso cán sahá ña nayaha yóho vatí cúú ná na Israel á cúú ná na tóho ñañehe ndihi na tūhun. Sahá ña cán quea nayihví na. Ta cuahā ná nacahan na ña cáhnu cúú quiví Jesús ña cúú xitoho í.

¹⁸ Ta cuahā táhan na cándúsa Jesús cán nacasáhá na náhma na tóco ndihi cuachi nacaja na. ¹⁹ Ta cuahá na nasacuu na tají ñehe ndihi na libro ña tají naxinu na ta nachicaan ñūhu ná ña nuú ndihi ñayivi. Tá najitá na cuéntá sahá yahvi tóco ndihi libro nacayí cán naxinu a tátūhun ivi jico uxu mil jiuḥun cúxú. ²⁰ Já nacasáhá xíta nuu tūhun váha saḥa Jesús. Ta náha ña mé a ndaa iin ndee Jesús caja tóco ndihi ñaha.

²¹ Tá sa nayaha ndihi na yóho já nasacu ini Pablo cūhun da coto nihni da estado Macedonia xihín estado Acaya. Já quehe tucu da íchí cūhun da janda Jerusalén. Ta nacachi da ña tá sa nasahan da ñuu Jerusalén já yaha da cūhun da chí ñuu Roma. ²² Ta mé Pablo yóho nāchindahá da ivi táhan da xíca chindeé táhan xihín dá ña ná cūhun da chí

estado Macedonia. Ta da nāchindahá da cán cúu Timoteo xih̄in Erasto ta mé Pablo nācandoo too chága da estado Asia.

Ndávaa ñayivi ndúu ñuu Efeso

²³ Mé tiempo já a juú quiahva cuahá ñayivi ñuu Efeso nandivaa na sahá ña nandihvi cuahá ñayivi íchi cuéntá Jesús. ²⁴ In da naní Demetrio cúu dá da najāndivaa na cán. Mé Demetrio yóho cávaha da tiniñu yúu xih̄in jiuñun cúxú ta mé tiniñu yúu cán ndáa tá quiahva cáa in veñuhu cuéntá Diana, ñá cúu ndióxi cája cáhnu na ñuu cán. Ta a juú quiahva vaha cána jiuñun na cája chúun xih̄in dá cán. ²⁵ Sahá ña cán quea mé Demetrio yóho najátaca da tóco ndihi na cája chúun xih̄in dá ta najátaca ri da java ga táhan na cája mé chuun cávaha tiniñu yúu cán. Já nācachi da já xih̄in ná:

—Candehé ndo, sa cāndaā vaha ini ndó ña vaha ndivaha cána jiuñun yo xih̄in chuun cája í yóho ta ndúu vaha í cája ña. ²⁶ Joo sa xíní ndo ta ñehe mé ndó tuñun sahá da naní Pablo. Xíca nuu da cáhan da xih̄in ñayivi ña a juú toho ndióxi cúu ña cávaha ndahá ñayivi. Ta sa cuahá ndivaha ñayivi nācava da jiní. Ta a juú in túhún ñuu Efeso yóho cuití va jáchi sa nācandee da nācava da jiní cuahá na ndúu chí estado Asia viti. ²⁷ Ta ihvi ndivaha cáa ña yóho jáchi cuu cañu da nuú chuun cája í ta nu cána jiuñun yo quea yóho. Ta janda veñuhu ndióxi yo, ñá naní Diana cuu ndihi saha vatí ní cúu cáhan vaha na saha veñuhu ñá. Joo xih̄in ña cája Pablo yóho tá xíca nuu da cuu casahá ñayivi cañan núu na saha Diana ta cuu casahá na candají na ñá cúu ndióxi yo, mé Diana yóho. Ta mé ñá cúu ñá ñá cáhnu ndivaha ta ñayivi ní cúu estado Asia yóho xih̄in ñayivi ní cúu ñuyíví cája cáhnu na ña —nācachi Demetrio cán xih̄in java ga da cávaha tiniñu yúu cán.

²⁸ Ta tá naxini joho ndihi na cán ña nacachi Demetrio chí ivi laá najaa quini na já nacayuhú na já nacachi na já:

—Cáhnú ná cacuu Diana, ñá cúú ndióxi ndícahán na Efeso.

²⁹ Ta xihín ña yóho tóco ndihi ñayivi ñuu cán nacasáhá na ndívaá na. Sahá ña cán queá natiin na ivi dataa, da naní Gayo xihín da naní Aristarco. Ndívi da yóho cúú da da estado Macedonia ta xíca nuu da xihín Pablo. Ta mé ñayivi cán natiin na da já ñúhu na da cuahan da vehe nu ndítaca ñayivi cán. ³⁰ Ndúcu Pablo quihvi nuu da tañu ñayivi cán ña cahan da xihín ná cúni da. Joo na cúú cuéntá Jesús cán coó naxeen na ña ná cuhun da. ³¹ Ta jári java na jutixia cuéntá estado Asia ndúu cán ta xíní táhan vaha xihín Pablo sahá ña cán queá nachindahá na chuun nu dá ña ná a quihvi nuu da cahan da xihín na cán. ³² Tañu nu táca ñayivi ndívaá nahá cán sa jíin sa jíin ñaha cáyuhú na ndúu na. Jáchí cuahá na nataca cán ni co xíni na ndá cuéntá queá nataca na tañu ñayivi cuaha cán. ³³ Joo java ñayivi ndúu cán nandicani na ndaja cáa ña cúú cán nuú in da naní Alejandro. Ta java na Israel ndúu cán nachindahá na Alejandro já ná candichi da cahan da xihín ñayivi cán. Anda já nandiñehe Alejandro ndáha dá já ná catáji tóo yúhu ná já nacasáhá ndíquehe da sahá na cúú cuéntá Jesús. ³⁴ Joo tá naxini ñayivi cán ña cúú Alejandro in da Israel chí ivi laá nacasáhá tóco ndihi na cán cáyuhú na já cáchí na já:

—Cáhnú ná cacuu Diana, ñá cúú ndióxi ndícahán na Efeso.

Ta coó nacatáji na tixi ivi hora cáyuhú na mé tuhun yóho.

³⁵ Ta tá sa nacatáji loho ñayivi já nacasáhá da cúú da cáhyí tutu ñuu cán cahan da xihín ñayivi já cáchí da já xihín ná:

—Candehé ndó, na Efeso. Sa cándaa ini ndihi ñayivi ndúu ñuyívi ña ndítahan nuú ñayivi ndúu ñuu Efeso candaa vaha na veñuhu ñá cúu ndióxi naní Diana. Jáchí mé ñá cúu ñá ñá cáhnu ndivaha ta indiví naquixi nahná ña nandicava nu yo. ³⁶ Ta ni in na a cúu cachi ña cáhan i ña tuhún sahá ña cán queá caja ndó ñamaní catáji ndo ta ndicani vaha ini ndó sahá ña cúni ndó caja ndó. ³⁷ Jáchí ndívi da ndáca ndó nacasaá ndó yóho co cája cuíhná da veñuhu Diana ta ni co cáhan núu da saha ña. ³⁸ Ta tá co táhán ini Demetrio xihín na cája chúun xihín dá sahá ña cája Pablo já ndítahan nu ná cuhun na vechúun nuú jutixia ta cán cuu ndiquehe in in na saha mé ná jáchí sahá ña cán ndúu juéxe cán caja víi na sahá ñayivi. ³⁹ Joo tá inga ñaha queá cúni ndó caja víi ndó saha, xíní ñúhú nditaca ndihí já ná cuu caja víi yó sahá. ⁴⁰ Jáchí cája i cuénta cuu chicaan na cuachi jata yo sahá ña jándicuíta í ñayivi caní táhan na saha tóco ndihi ña nayaha quívi viti. Jáchí mé a ndaa co xíni yo ndá tuhun nducú ñehé tá ná ndaca tuhún na mí ndá cuénta queá nandivaa nahá yo —nacachi da xihín ná.

⁴¹ Tá nandihí nacachi da cáhyí tutu cán tuhun yóho xihín ñayivi cán já najánduta da na.

20

Cuahán Pablo estado Macedonia xihín estado Grecia

¹ Tá sa nanduta ndihi ñayivi, na nandivaa nahá cán já nacana Pablo tóco ndihi na cúu cuénta Jesús jáchí cúni da cahán da xihín ná sahá java ñaha ña ndítahan nu ná caja na. Ta tá nandihí nacahan da xihín ná já nanumi da na ta nandindayí da na já naquee da cuahan da chí Macedonia. ² Níí cúu estado Macedonia cán naxica nuu da sahan da tuhun ndéé ini na cúu cuénta Jesús xihín tuhun cáhan da. Tá nandihí já naquee da cuahan da ta naxinu

da chí estado Grecia. ³ Ta ñacandoo da cán tixi uní yoo. Ta tá ja chá quehe da barco cuhun da chí ñundáhyi cuéntá Siria já ñañehe dá tuhun ña sácu ini ña Israel cán cahní ña da. Sahá ña cán queá ñasacu ini da ña vaha chága ná cuhun sáhá da já ná yaha tucu da chí Macedonia. ⁴ Ta ndáca táhan java ña cúu cuéntá Jesús cuahan ña xihín Pablo. Ta ña cán cúu ña yóho: in da naní Sópater, da ñuu Berea xihín Aristarco xihín Segundo, da ñuu Tesalónica xihín Gayo, da ñuu Derbe xihín Timoteo. Ta tañu ña cán cuahan ri Tíquico xihín Trófimo, da ñaquixi estado Asia. ⁵ Tóco ndihi ña ndáca táhan xihín Pablo yóho ñasahan cuéé ña chínuu candati na ndehe ñuu Troas. ⁶ Joo ndehe, da cúu Pablo xihín Lucas tá sa ñayaha víco tá xíxi na pan ña co cáva táhan yusá ñaxaa xihín já ñandaa nde barco ñuu Filipo cuahan nde chí Troas. Ta janda quiví uhun já ñandique táhan nde xihín ndihi ña cán. Ta chí ñacandoo tóo chága nde usá quiví ñuu Troas cán.

Xíto nihni Pablo ñuu Troas

⁷ Ta quiví domingo ñataca ndihi nde, ña cúu cuéntá Jesús ña cuxu nde pan yíi. Ta sahá ña queta Pablo cuhun da inga quiví itaan sahá ña cán queá najánaha cuaha dá nu ná janda quiahva ñaxinu java ñuu. ⁸ Tóco ndihi ña cúu cuéntá Jesús cán ñanditútú nde ndúu nde in vehe cánúu jiní ninu. Ta chí ndíyihvi ndaa nu ndúu nde jáchi cuahá lámpara cáyi. ⁹ Ta ndaja coo in da loho naní Eutico íin coo da ventana xini johu da nu cáhan Pablo. Joo sahá ña cuaha cáhan Pablo sahá ña cán queá ñanaá ini da loho cán chí ñaquiji da. Já najani dá ñandicava da janda nu ñúhu piso uní. Ta tá ñanuu ña cúu cuéntá Jesús cán ñandiñehe na da jandá ndijí cúu dá. ¹⁰ Anda já ñanuu Pablo ta najáca da mé dá jatá da loho cán ta ñanumi da da ta já ñacachi da já xihín ña cúu cuéntá Jesús cán:

—A cáyihví toho ndó jáchí tácu va da yóho —nācachi Pablo chí najánditacu ñahá da.

¹¹ Anda já nāndaa tucu Pablo cuaḥan da vehe piso ñinu cán. Já ñasahnda java da pan yii cán ta naxixi na ña. Anda já ñacahaḥan chága da xihín ná janda quiaḥva ñativi. Já ñaquee da cuaḥan da. ¹² Ta sahá mé da loho, da ñandicava cán cájii íni ña ndáca vaha na da cuaḥan ña jáchí ñanditacu da.

Qué Pablo ñuu Troas ta cuaḥan da chí ñuu Mileto

¹³ Nasacu ini Pablo cuḥun sahá da anda ñuu Asón. Joo mé nde ñandaa nde barco ñasahaḥan nde mé ñuu cán jáchí janda cán ñacandoo nde ndique táhan nde xihín dá. ¹⁴ Ta tá ñandique táhan nde ñuu Asón cán xihín dá já ñandaa da xihín ndihi nde ini barco. Já ñaquee nde cuaḥan nde ñuu Mitilene. ¹⁵ Cásahaḥan nde ini barco ta inga quiví itaan já ñayaha nde yati isla Quío ta janda tá ñayaha inga tucu quiví já ñaxinu coo nde ñuu Samos. Ta ñaquee tucu nde cuaḥan nde janda quiaḥva ñaxinu coo nde ñuu Trogilio. Ta cán ñandiquehe ndée nde ta janda inga quiví itaan ñaxinu coo nde ñuu Mileto. ¹⁶ Co cúni Pablo cayáncá da estado Asia sahá ña cán quéa coo ñasahaḥan nde ñuu Efeso. Númi da cuḥun da ñuu Jerusalén coo da quiví víco Pentecostés jáchí ñasacu ini da coo da víco cán tá ná quiaḥva Ndióxi ñamaní nu dá.

Cáhan Pablo xihín ña sacuaḥá ñuu Efeso

¹⁷ Ta nani ndúu nde ñuu Mileto cán já ñacana Pablo tóco ndihi ña sacuaḥa veñuhu ñuu Efeso cán já ná quixi na. ¹⁸ Ta tá sa ñataca na nu ndúu nde já ñacachi da já xihín ná:

—Sa xíni vaha ndó ndaja ñacaja i janda quiví nu cuítí tá ñaxinu coo i estado Asia yóho. ¹⁹ Níi tiempo ñasahiin i tañu ndó cán ñacaja chúun i cuénta Jesucristo, xitoho í. Ta

coó nandinehe jícó i mí i sahá ña ñacaja i. Ta cuahá tañu nasacu u saha ndo. Ta nandoho ini i sahá ña cúní na Israel cahní na yehe. ²⁰ Ta coó najándacoo i cáhan i tuhun Ndióxi xihín ndo jáchi xíní vaha i ña jan cuu chindeé a ndohó. Ta najánaha i ndohó nu táhyí ñayivi ta jári ini vehe ndó. ²¹ Ta najánaha i nuú na Israel xihín nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihín ná ña ndítahan candeé ini na Jesucristo, xitoho í. ²² Ta viti cuhun i chí ñuu Jerusalén jáchi cúní ínimá yíi Ndióxi ña ná cuhun i cán ta co xíní ndíá cuu ndoho i ñuu cán. ²³ Ña xíní ndusa i queá ña nacaxi tuhun ínimá yíi Ndióxi xihín i ña ndá ñuu nacuu nuú cuhun i ña jivi i chican ñayivi yehe vecaa á jivi i caja xíxi na xihín i. ²⁴ Joo ni in ña yóho co cája toho a nuú i. Ta vatí ná cahní na yehe co yíhvi toho i. Jáchi ña cúní mí i queá cajíi íní i jáxinu coo i chuun nasahan Jesucristo nuú i caja i. Ta ña yóho cúú á cáxi tuhun i nuú ñayivi tuhun vaha saha mé á ta saha ndá quiahva quíhvi ini a ñayivi.

²⁵ Sa naxica nuu i tañu ndó ta nacahan i xihín ndó ña vaxi quívi cacomí Ndióxi cuéntá sahá ñayivi. Ta viti xíní vaha i ña ni in ndó a cúní ga ndó yehe. ²⁶ Sahá ña cán queá cáxi tuhun i xihín ndó quívi víti ña co ndójo ga i cuachi saha ndo tá ná jándicoo ndó íchi cuéntá Jesús. ²⁷ Jáchi sa nacaxi tuhun i nu ndo tóco ndihi ña sácú ini Ndióxi caja ta coo nachijehé tuhun toho i sahá nu ndo. ²⁸ Sahá ña cán queá ndítahan candaa vaha ndó mé va ndó ta candaa vaha ndó tóco ndihi na cúú cuéntá Jesús ná cuahnu chága na xihín tuhun Ndióxi. Jáchi mé ínimá yíi Ndióxi nasacu a ndohó ña ná cacomí ndo cuéntá sahá na cúú cuéntá mé á jáchi naxita níi mé á sahá ndihi na tá naxihí a ndica crúxu. ²⁹ Cáhan i ña yóho xihín ndo jáchi sa cándaa vaha ini i ña tá sa ná quee yehe cuhun i já quixi java ñayivi ta cacu ini na jándihi na sahá na cúú cuéntá Jesús. Ta tá quiahva

cája ndivahyí jándihi rí sahá ndicachi quiahva já cacúni na jándihi na sahá na cúu cuéntá Jesús. ³⁰ Ta janda mé tañu mé ndó jan va cana java na ta jánaha na ña tuhún nuú ñayivi. Ta nducú na ndiquehe na na sa cúu cuéntá Jesús cuhun na jatá na cán. ³¹ Ña cán quéa cuéntá vaha coo ndó ná a jándahvi na ndohó. Xíní ñúhú ndicuhun ini ndó ña tixi uní cuia coo najándacoo i cahān i xihīn ndó ndāa quéa ndítahan nu ndó caja ndó. Ta ñuú ta ndiví naçahān i xihīn ndó sahā ña yóho ta chí anda nasacu u saha ndo ña ná caja ndó ña cúnj Ndióxi.

³² Viti jándacoo i ndohó, ñani i, ndahá Ndióxi jáchi cáchi tuhun mé á ña quihvi ini a tóco ndihi ñayivi. Ín ndée Ndióxi caja ndacú a ndohó já ná cuu coo ndó xihīn tóco ndihi na naçaxi mé á caja ñamanj xihīn. ³³ Ta xíní ñúhú ndicuhun ini ndó ña coo nandiava ini i quehe e jiuhún á jáhma vaha cómí java ga ñayivi. ³⁴ Ña naçaja i quéa naçaja chúun i xihīn ndahá i já ná a ndímanj ñaha catacu u ta já ná cuu catacu na xica xihīn i. ³⁵ Ta ní tiempo najánaha i nu ndo ña quiahva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímanj ñaha nuu. Ndítahan ndicuhun ini ndó tuhun naçachi Jesucristo tá naçachi a: “Cájij chága ini na jása ñaha a juú ga na ñéhe á”, naçachi Pablo xihīn na sacuha veñuhu ñuu Efeso cán.

³⁶ Tá nandihí naçahān Pablo já naçaxítí da já naçasáhá xica tahví da nu Ndióxi xihīn ndihí na cúu cuéntá Jesús cán. ³⁷ Ta tóco ndihí na cán nasacu na xihīn dá ta nanumi na da ta já natatí yúhu ná sajóho da ña ndíndayí na da. ³⁸ Tóco ndihí na naçacuéha ini na saha Pablo jáchi naçachi da xihīn ná ña a cúnj ga na da. Tá nandihí já ndáca táhan ndihí na naçahān na xihīn dá janda nuú nandaa da barco cán.

21

Cuahan Pablo chí ñuu Jerusalén

¹ Tá nandihí nandindayí nde na cúu cuéntá Jesús cán já nandaa nde barco naquee nde cuahan ndacú nde in ñuu naní Cos. Ta inga quiví itaan já naquee tucu nde cuahan nde chí inga ñuu naní Rodas. Ta já naquee nde cuahan nde chí ñuu naní Pátara. ² Ta mé cán nandique táhan nde xihín in barco, dó cuhun chí estado Fenicia ta chí nandaa nde dó cuahan nde. ³ Ta nani cásahan nde ini dó já naxini nde isla Chipre xoo íti nde. Joo nayaha saa va nde janda quiahva naxinu coo nde ñuu Tiro ndacaan estado Siria jáchi mé cán ndítahan nu ná jánuu na ñaha ndójo dó. ⁴ Mé ñuu Tiro cán nanditahan nde na cúu cuéntá Jesús ta nacandoo too nde xihín ná tixi usa quivi. Ta najacahan ínima yí Ndióxi na cán ña ná caxi tuhun na xihín Pablo ña ná a cuhun da ñuu Jerusalén. ⁵ Joo tá sa nayaha usa quivi já naquee nde cuahan nde chí ñuu Jerusalén. Ta naqueta tóco ndihí na cúu cuéntá Jesús cán xihín ñájihí na xihín jahyi válí na já ndaca táhan na xihín nde cuahan nde anda yuhú ñuu cán. Ta yatí yuhú tañuhú cán nacaxítí ndihí nde naxica tahví nde nu Ndióxi. ⁶ Ta tá nandindayí táhan nde já nandaa nde barco ta na cán naquee na cuanúhu ná vehe na.

⁷ Naquee nde mé ñuu Tiro cásahan nde nuú tañuhú janda quiahva naxinu coo nde ñuu Tolemaida. Ta mé cán nacahan Ndióxi nde xihín na cúu cuéntá Jesús ndúu cán. Ta chí nacandoo nde in quivi xihín ná. ⁸ Ta inga quiví itaan já naquee nde cuahan nde janda quiahva naxinu coo nde ñuu Cesarea. Ta cán nasahan nde vehe in da sáxica nuu cahan tuhun Ndióxi xihín ñayivi. Mé da yóho naní da Felipe ta nasacuu da in táhan ndíhusa da chindeé na apóstol veñuhu ñuu Jerusalén. Ta chí nacandoo too nde vehe da cán. ⁹ Ta nasahin comí jahyi jíhí da, na tacú. Ta tiahva ndícomi ná jáyaha na tuhun cahan Ndióxi nuú

ñayivi. ¹⁰ Tá sa ñacaja chá quiví ndúu nde vehe da cán já ñaxinu coo in profeta, da ñaquixi estado Judea ta naní da Agabo. ¹¹ Mé da yóho ñasaa da coto nihni da ndehe nu ndúu nde cán. Ta nani íin da xihín nde cán já ñatiin da cinturón ñaha Pablo. Já ñacató da ndáha dá xihín saha dá xihín mé cinturón ta já ñacachi da já:

—Cáchi ínima yíi Ndióxi ña tá quiahva ñacaja i ñacató i mí i quiahva já cató ña Israel da xihín ñaha cinturón yóho. Ta já ndiquiahva na da ndahá ña tóho —ñacachi Agabo cán xihín nde.

¹² Tá ñaxini johó nde ña ñacachi Agabo yóho já ñacashá nde cáhan ndahví nde xihín Pablo ña ná a cúhun da ñuu Jerusalén. Ta jári ña cúu cuénta Jesús ndúu ñuu Cesarea cán cáhan ndahví ña xihín dá ña ná a cúhun da.

¹³ Joo ñanducú ñehe Pablo tuhun nuú nde já ñacachi da já:

—Ndá cuénta quéa sácu cóhó ndo ta cája ndó ña cándii ini i. Candehé ndo ná cahan i xihín ndo. Coó caja toho a ná cató ña yehe jáchi íin tiahva i ndiquiahva i mí i quiví i saha Jesús, xitoho í mé ñuu Jerusalén cán —ñacachi da.

¹⁴ Coó ñacuu caja nde cava nde jini dá ña ná a cúhun da. Chí coó ñacahan chága nde saha ña yóho xihín dá ta ñacachi nde:

—Ná coo tá quiahva cúni Ndióxi va.

¹⁵ Tá ñandihí já ñacaja tiahva nde ñaha nde ta já ñaquee nde cuahan nde ñuu Jerusalén. ¹⁶ Ta ndáca táhan java ña cúu cuénta Jesús ñuu Cesarea cán cuahan ña xihín nde. Ta tañu ña cán ndácaan in da naní Mnasón, da ñaquixi isla Chipre. Ta anda sanahá ndíco da íchi cuénta Jesús. Ta sa mé vehe da yóho sácu ini nde canduu tóo nde ñuu Jerusalén cán.

Xíto nihni Pablo da naní Jacobo

¹⁷ Tá ñaxinu coo nde ñuu Jerusalén já cávatá ña cúu cuénta Jesús cán ñandiquehe na ndehe. ¹⁸ Ta inga quiví

itaan já ndáca Pablo ndehe nasahan nde coto nihni nde Jacobo. Ta tá naxinu cōo nde cán já naxini nde ña nataca tóco ndihi na sacuaḥa nuú na cúú cuéntá Jesús cán. ¹⁹ Ta naḥañ Ndióxi Pablo xihin ná já naḥasáhá ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na cōó naquixi chichi Israel. ²⁰ Tá naxini johō na cán ña yóho já naḥaja cáhnu na Ndióxi. Ta tá nandihí já naḥasáhá cáchí na já xihin Pablo:

—Candehé, ñani i. Sa xini vahún ña cuahá ndivaha táhan na naquixi chichi Israel sa ndíco na íchi cuéntá Jesús viti. Ta tóco ndihi na cáchí na ña ndítahan caja na ña sáhndá ley Moisés. ²¹ Joo nañehé ná tūhun ña xica nuún jáñahún nuú na Israel, na ndúu ñuu tóho ña cō xini ñúhú ga caja na ña sáhndá ley Moisés ta ni marca cán cō xini ñúhú chicaan ga na yiquí cuñu jahyi na. Ta jáñahún na ña cō ndítahan caja na costumbre najándacoo tásáhnu jícō yō nu yō. ²² Ta cō xini nde ndíca caja nde viti jáchi nditútú na ndúu Jerusalén yóho tá ná candaa ini na ña naḥasaun yóho. ²³ Sáhá ña cán quea caja nde cuéntá ña vaha chága ná cajún ña cáchí nde yóho: Cañehún comí ṭaa ndúu tañu nde yóho já ná cuhun na xuhun. Jáchi sa naxinu cōo quiví caja ndícomí da yóho ña nasahan da tūhun da nu Ndióxi caja da. ²⁴ Ná cuhún xihin dá já ná ndaja viún mún xihin dá tá quiahva sáhndá ley Moisés ta já ná chahvún nuú jatá jiní dá. Ta xihín ña yóho cuni na Israel ña a juú ña ndaa cúú tóco ndihi tūhun cáhan ihvi na sahun. Ta xihín ña yóho cuni na ña cája tá cájún ña sáhndá ley Moisés. ²⁵ Ta saḥá na tóho, na cúú cuéntá Jesús, sa naḥahyí nde in carta cuahañ nu ná ña ná a jándihí na mé ná caja na ley Moisés. Joo naḥachi nde xihin ná ña ná a cáxí na cuñu quítí, rí naḥocō na nuú tiníñu yúú. Ta ná a cáxí na nij ta ni ná a cúxu na cuñu quítí, rí naḥahnú. Ta ná a cōo na xihín ṭaa á ñaha, na cō cúú yí ná á ñájihí na. Ña yóho cúú tūhun

naçahyí nde nu carta cuahan nuú na tóho —naçachi na saçuaha cán xihin Pablo.

²⁶ Anda já naquehe Pablo ndícomí dataa cán ndáca da cuahan xihin dá. Ta inga quiví itaan já nandaja vií da mé dá nu Ndióxi ta nandivií ndícomí da cán viti. Ta tá nandihi já naquihvi da veñuhu ña çaxi tuhun da xihin ná ndá quiví xinu çoo ña ndivií na já ná cuu joco in in da cán ñaha nu Ndióxi.

Tiin na Pablo veñuhu cáhnu ñuu Jerusalén cuahan da vecça

²⁷ Tá ja chá xinu çoo quiví usa já naxinu çoo java da Israel, da naquixi chí estado cuénta Asia. Ta tá naxini na cán ndácaan Pablo ini veñuhu cáhnu cán já najándivaa na ñayivi já ná ndicuíta na caja xíxi na xihin dá. ²⁸ Ta naçasahá cáyuhú na nuú ñayivi já cáchi na já xihin ná:

—Candehé ndó, na Israel. Caja ndó ñamaní chindeé ndó ndehe xihin da yóho jáchi ní cúu nu xíca da yóho cáhan núu da sahá ñayivi Israel ta jánaha da ñayivi ña ço ndítahan nu ná candúsa na ley Moisés ta ni ço ndítahan nu ná caja cáhnu na veñuhu cáhnu ndácaan Jerusalén yóho. Ta viti cája núu chága da jáchi janda java da tóho, da ñuu Grecia najáquihvi da veñuhu í ta jáyuxu da veñuhu yii yóho xihin da tóho jan —cáchi na.

²⁹ Tóco ndihi ña yóho naçachi taa Israel naquixi Asia cán xihin ñayivi jáchi naçahan da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Naçahan na já jáchi naxini na ndáca táhan Trófimo xihin Pablo xíca nuu da ñuu Jerusalén cán.

³⁰ Xihin ña naçachi da naquixi Asia yóho nandivaa tóco ndihi ñayivi ñuu Jerusalén já xínu na naxinu çoo na natiin na Pablo. Já ñúhu na da natavá na da jatá veñuhu cán ta ivi laá naçicaji na yéhe veñuhu cán. ³¹ Chí ndúcú na cahní na da joo da cúu jefe soldado cán nañehe dá tuhun ña nandivaa ndihi ñayivi ñuu Jerusalén cán. ³² Anda já

najátaca da cúu jefe soldado xihín java ga da náhnu já xínu da naxinu coo da nu ndívaá ñayivi cán. Tá naxini ñayivi cán vaxi da cúu jefe soldado cán xihín java soldado já najáyaa ñahá na chí co cáni ga na Pablo. ³³ Anda já nacayati da cúu jefe soldado cán nu Pablo já ñatiin da da cuhun da vecaa. Ta ñasahnda da chuun ña ná cató na da xihín ivi cadena. Tá ñandihi já ñacasáhá ndáca tühún da ñayivi ña ndá da cúu da yóho ta ndía ñacaja da. ³⁴ Joo sa jíin sa jíin tühun cáyuhú in in ñayivi cán. Sahá ña cán queá coo ñacuu candaa ini da cúu jefe soldado cán ndá cuachi queá jácojo na jatá Pablo jáchi a juú quiahva ndívaá na cán ndúu na. Sahá ña cán queá ñasahnda mé jefe soldado cán chuun ña ná cañehe na Pablo vehe nu ndúu soldado. ³⁵ Ta tá naxinu coo na cán ñacahán na ndaa na cuani vehe soldado cán xihín Pablo joo coo ñacuu ndaa na jáchi chí cándíhi táhan ñayivi cúni na caní na Pablo. Sahá ña cán queá ñasajocó soldado cán Pablo já ñandaa na cuani vehe soldado cán xihín dá. ³⁶ Ta tóco ndihi na cán cáyuhú cóhó na ndícaa na jatá soldado já cáchi na já:

—Cahní ndó da. Ná quivi da —cáyuhú na.

Ndíquehe Pablo saha mé dá nuú ñayivi cán

³⁷ Ta tá sa ndúcú na jáquihvi na Pablo ini vehe soldado cán já ñacachi Pablo já xihín da cúu jefe soldado cán:

—Á quiahva ndó ñamaní nuú i ná cahan i ivi joho tühun xihín ñayivi yóho.

Anda já ñanducú ñehe da cúu jefe soldado cán tühun nu Pablo já ñacachi da já:

—Á tiahvún cahún tühun griego, dá já. ³⁸ Á a juú toho yóhó cúu da ñaquixi nación Egipto viti chá va, da najácahan ñayivi ná ndicuíta na caní táhan na xihín gobierno ta ñasandaca da comí mil da sáhní ndij ñasahan

da chí yucú íchí nuú coó ñayivi. Á a juú toho yóhó cúú mé da cán —ñacachi da cúú jefe soldado cán xihín Pablo.

³⁹ Anda já nanducú ñehe Pablo tuhun nu dá já ñacachi da já:

—Jiin va cúú yehe jáchi cúú u in da ñaquixi chichi Israel ta ñacacu u ñuu Tarso, in ñuu cáhnu ndácaan estado Cilicia. Ta viti á cuu quiahva loho ndó ñamaní nuú i ná cahan i ivi tuhun xihín ñayivi yóho —ñacachi Pablo xihín da cúú jefe soldado cán.

⁴⁰ Anda já nasahan da cán ñamaní nu Pablo ña ná cahan da xihín ñayivi. Anda já nandaca ndichi Pablo nuú cuani vehe cán já nandiñehe da ndáha dá nu ná já ná catáji yúhu ná. Ta tá sa ñacatáji yúhu ná já ñacasáha cáhan da tuhun hebreo xihín ná.

22

¹ Já ñacasáha Pablo cáchi da já xihín ná:

—Cuni johó ndó nu cáhan i xihín ndóhó, na sacuaḥa xihín ñani i jáchi cuni ndiquehe e sahá i viti —ñacachi Pablo xihín ná.

² Tá ñaxini johó na cán ña cáhan Pablo tuhun hebreo, mé tuhun cáhan mé ná já ñacatáji chága yúhu ná. Anda já ñacachi Pablo já xihín ná: ³—Yehe cúú u da ñaquixi chichi Israel. Ta ñacacu u ñuu Tarso ndácaan estado Cilicia. Joo nasahnu u ñuu Jerusalén yóho ta mé yóho najácuaha vi xihín in da naní Gamaliel. Ta tá quiahva sáhdá ley Moisés, ña nasacu vaha tásáhnu jícó yo quiahva já nandihi ini i cája i. Ní tiempo nandihi ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi víti. ⁴ Naxica nuu i cája xíxi i xihín na ndíco íchi cuéntá Jesús janda quiahva sáhní i na. Ta cuahá taa, ñaha viti ñaxica nuu i játaca i na ña ná cuhun na vecaa. ⁵ Ta xini vaha da cúú sacuaḥa nuú jutú xihín ndihi na sacuaḥa

veñuhu ña cáhan i ña ndaa xihin ndo. Jáchí mé na yóho cúu na ñacahyí tutu nasahan na nuú i já ná ndiquiahva i ña nuú ñani, na ñaquixi chíchi Israel ndúu ñuu Damasco cán. Ta nasahan i cán ndínducú u na cúu cuéntá Jesús ña cañehe e na quixi i ñuu Jerusalén yóho caja xíxi nde xihin ná.

Ndicani Pablo ndaja ñacuu ñandiquehe da íchi cuéntá Jesús (Hch. 9:1-19; 26:12-18)

⁶ Joo nani xíca i íchi cuahan i tátuhun caxivi cáa tá sa yati xinu coo i ñuu Damasco cán já in cuití ñandiyehē ndaa nu íin i ta mé a yóho ñaquixi a indiví. ⁷ Chí ñandicava i nu ñúhu ta já ñaxini johó i in a cáhan xihín i já ñacachi a já: “Saulo, Saulo ndá cuéntá queá ndícuítún cája xísún xihín i”, ñacachi a xihín i. ⁸ Anda já ñacasáhá ndáca tuhún i já cáhí i já: “Ndá na cúu ndóhó ta ndaja nani ndo”, ñacachi i xihín á. Anda já ñanducú ñehe a tuhun nuú i já cáhí a já: “Yehe cúu Jesús, da ñuu Nazaret ta xihín yehe ndícuítún cája xísún viti”, ñacachi a cán xihín i. ⁹ Ta na cuahan xihín i cán nayihví na tá ñaxini na ña ñandiyehē nu íin i cán. Joo coo ñaxini johó na ña cáhan xihín i cán. ¹⁰ Anda já ñacachi i já xihín Jesús: “Cahan ndó xihín i, xitoho i ndía ndítahan caja i.” Anda jáví ñacachi a já xihín i: “Candichi ta cuáhán ñuu Damasco nu cáhún cuhun jan. Ta ñuu jan ndicani in da nuun ndía ndítahan cajún”, ñacachi Jesús xihín i. ¹¹ Ta chí ñacuaá nuú i ñacaja ña ñandiyihvi cán. Sahá ña cán queá jandá ñatiin ndaa na ndáca táhan i cán yehe cuahan nde janda quiahva ñaxinu coo nde ñuu Damasco cán.

¹² Ta mé cán nasahin in da nani Ananías, da cája ña sáhdá ley Moisés xihín ndinuhu ini da. Ta tóco ndihi na Israel ndúu Damasco cán cáhan na saha dá ña cúu dá taa vaha. ¹³ Ta mé Ananías yóho nasaa da ñaxito nihni da yehe. Já ñacasáhá cáhí da já xihín i: “Saulo, ñani i candehé tucu viti.” Tá ñacachi da já chí ivi laá ñanuna

nuú i já naxini i da. ¹⁴ Andá já nacachi da cán já xihín i: “Mé Ndióxi, ña nacaja cáhnu tásáhnú jícó yo, mé a cán queá nacaxi a yohó já ná candaá inún ndá queá sácú ini mé á caja xuhún. Ta nacaxi a yohó já ná cunún Jesús, mé a cája ndinuhu ña ndaa. Ta nacaxi a yohó já ná cuni johún nu cáhan Jesús. ¹⁵ Já queá cuhún cahún saha mé á nu tóco ndihi ñayivi. Já ná ndicanún nu ná sahá ña naxinún xihín ña naxini johún. ¹⁶ A cándati chágún viti. Cuándacoo. Cándéé inún Jesucristo viti chí cuáhán candúta já ná ndoo cuachún, caja Ndióxi”, nacachi Ananías xihín i.

Ndicani Pablo ña naxindahá Ndióxi da cahán da tuhun vaha saha Jesús nuú na tóho

¹⁷ Tá nandihí já nandicó cōo i ñuu Jerusalén ta nasahan i veñuhu cáhnu cán caça tahví i nu Ndióxi. Ta nani xíca tahví i cán já naquixi tátuhun in sani nuú i vatí ndíta i. ¹⁸ Ta naxini i Jesús, xitoho i já nacachi a já xihín i: “Camún cuáqueún ñuu Jerusalén yóho jáchi a cándúsa toho na yóho tuhun vaha cahún sahá i”, nacachi Jesús xihín i. ¹⁹ Andá já nanducú ñehe e tuhun nu Jesús já cáchí i já xihín á: “Candehé ndo, xitoho i. Sa xíní vaha tóco ndihi ñayivi ña naxíca nuu i ndijáá veñuhu tiin i na cándéé ini ndohó ta já nacani i na ta nataán i na vecaa. ²⁰ Ta sa xíní na ña tá nasahní na Esteban, mé da naxíca nuu cáhan tuhun vaha saha mé ndó, in nasacuu u xihín na nasahní ñahá cán. Jáchi táhán ini i cándichi i ndáá i jahmá ñayivi cán nani sáhní na Esteban”, nacachi i xihín Jesús. ²¹ Andá já nacachi Jesús já xihín i: “Cuáqueún cuhún jáchi chindahá xíca i yohó cuhún cahún sahá i nuú ñayivi tóho, na coó naquixi chichi Israel”, nacachi Jesús xihín i —nacachi Pablo xihín na cán.

Cáhan chága Pablo xihín mé da cúu jefe nu ndíhi soldado

²² Nasanduu táji na Israel cán nani cáhan Pablo xihin ná. Joo tá nacahan da sahá na tóho cán já nacasáhá cáyuhú na já cáchí na já:

—Cahní ndó da jan. Ná quivi da. Co ndítahan ga nu dá coo da ñuyiví yóho —cáchí na cán cáyuhú na.

²³ Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi. ²⁴ Sahá ña cán queá nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihin churú ní já ná nahma da ndía nacaja da ta ndá saha queá ndícuita ñayivi cán xihin dá. ²⁵ Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahán ndó xihín i á núná nu ndo jácaxáhan ndó in da cúu taa romano tá cámaní yíi caja víi ndó saha dá tá quiq̄hva sáhná ley romano jáchi yehé cúu u da romano —nacachi Pablo xihín soldado cán.

²⁶ Tá naxini johó da ña yóho chí ivi laá nasahan da cáxi tūhun da nu da cúu jefe soldado cán já cáchí da já xihín dá:

—Cuéntá vaha coo ndó ta coto a cája xíxi ndó xihín da jan jáchi cúu dá taa romano —nacachi in soldado cán.

²⁷ Anda já nacayatí da cúu jefe soldado cán nu Pablo já nacasáhá ndáca tūhún ñahá da já cáchí da já:

—Á ndaa cúun taa romano —cáchí da.

—Ajan, taa romano cúu u —nacachi Pablo xihín dá.

²⁸ Anda já nacasáhá cáchí mé da cúu jefe soldado cán já xihín Pablo:

—Yehé nachahvi i cuahá ndivaha jjuhún já nacuu nan-duu u in taa romano —nacachi da cán xihín Pablo.

Ta já cáchí Pablo já xihín dá:

—Joo yehe cúú u taa romano jáchi já nacacu u —nacachi Pablo.

²⁹ Tá naxini johu na cúni jácaxáhan Pablo cán ña yóho chí nayihví na já nacasáhá xíca játa na cáxoo na nu dá. Ta janda mé da cúú jefe soldado cán nayihví da jáchi sa natiin na da vatí cúú dá taa romano.

Ndiquehe Pablo sgha mé dá nuú na sacuahá Israel

³⁰ Ta inga quivi itaan natavá da cúú jefe soldado cán cadena nasandico ndáha Pablo. Ta sahá ña cúni da cán candaá ini da ndá cuachi queá jácojo na jata Pablo sahá ña cán queá najátaca da na sacuahá nuú jutú xihín na sacuahá Israel. Anda já ñéhe da Pablo já nasacu da da nuú na cán.

23

¹ Anda já nasandehé Pablo nu tóco ndihi na sacuahá nuú na Israel cán já nacasáhá cáchi da já xihín ná:

—Candehé ndo, ñani i. Janda jihna ta janda quivi víti cája i ña cúni Ndióxi ta xini mé á ndaja ndacaan jini i —nacachi Pablo.

² Joo da cúú sacuahá nuú jutú naní Ananías cán nasahnda da chuun nuú na ndíta yati xihín Pablo cán ña ná cani na jahndá yúhu dá. ³ Anda já nacachi Pablo xihín Ananías cán:

—Tá quiahva nacani na jahndá yuhú i quiahva já cani Ndióxi yohó, da co cúú tá quiahva ndáa da. Íun jan ndaja ndíchún yehe jáchi jácojo na cuachi jata i ña co sácú vaha i ley. Joo yohó nandava ndojún ña sáhná ley jáchi nasahndún chuun ña ná cani na yehe —nacachi Pablo xihín Ananías cán.

⁴ Anda já nacasáhá na ndúu cán cáhan na xihín Pablo já cáchi na já xihín dá:

—Cuéntá coún jáchi cánahún xihín da cúu jutú sacuaḥa chága nū ndíhi jutú cuéntá Ndióxi —ñacachi na xihín Pablo.

⁵ Anda já ñacachi Pablo já:

—Cáhnū coo ini ndó, ñani i jáchi cō xínī toho i ña cúu da jan jutú sacuaḥa chága nū ndíhi jutú cuéntá Ndióxi. Mé tuhun Ndióxi sáhná chuun já cáchī a já: “A cánahún xihín da cómī chuun sahá ñuu ndó” —ñacachi Pablo.

⁶ Tá nandihī já nandicuni Pablo ña ndúu java na saduceo ta ndúu ri java na fariseo mé cán. Sahá ña cán queá ñacahan cóhó Pablo já ñacachi da já:

—Candehé ndo, ñani i. Yehē cúu u in da fariseo ta in fariseo ñasacuu ri tátá i. Ta viti cája vií na yóho sahá i sahá ña cándúsa i ña vaxi quiví nditacu tucu ndīi —ñacachi Pablo.

⁷ Tá ñacachi Pablo já ivi laá nandicujta na fariseo xihín na saduceo ndítúhún xihín táhan na já ñasahnda java táhan na. ⁸ Jáchi na saduceo cán cō cándúsa na ña vaxi quiví nditacu tucu ndīi. Ta ni cō cándúsa na ña ndúu tátō Ndióxi. Ta ni cō cándúsa na ña ín ínima ñayivi. Joo na fariseo cándúsa va na tóco ndihī ña yóho. ⁹ Tóco ndihī na cán cáyuhú na ndúu na. Sahá ña cán queá nandaca ndichī java na jánaḥa ley Moisés, mé na cuahan xoo na fariseo cán. Já ñacasáhá cáchī na já xihín tóco ndihī ñayivi cán:

—Coó toho cuachi ná caja da naní Pablo yóho. Jáchi ndá ínima yīi queá ñacahan xihín da yóho á tá coó ta ndá tátō Ndióxi queá ñacahan xihín da yóho. Sahá ña cán queá tá ná cahan ihvi yó xihín da yóho cúu á tátuhun cáni táhan i xihín Ndióxi —ñacachi na jánaḥa ley Moisés xihín ná.

¹⁰ A juú quiaḥva ñacasáhá ndívaā ñayivi cán sahá ña cán queá ñacasáhá yíhvī da cúu jefe soldado cán ña tiaḥva náá tiin na Pablo ta jácuachi na da. Sahá ña cán queá ñasahnda da chuun ña ná quixi soldado tavá da Pablo tañu ñayivi

cuaha cán. Ta já ná cañehe tucu na da cuhun da vehe soldado cán.

¹¹ Ta ñuú inga quiví itaan já nacanáha nuu Jesús, xitoho í nu Pablo ta nacañan xihin dá já nacachi a já:

—A ndícani inún, Pablo jáchi tá quiahva nacañún sahá í nuú ñayivi ñuu Jerusalén yóho quiahva já cañún sahá í nuú ñayivi ndúu ñuu Roma —nacachi Jesús xihin dá.

Sácú ini na Israel cañí na Pablo

¹² Ta inga quiví itaan já najándique táhan java na Israel tuhun na ña cañí na Pablo. Ta nacachi na a cúxu na ta ni ticuifí a cóho na janda quiahva ná cañí na Pablo. Ta nacachi xihin táhan na ña cuhun cháhan jata ndá da naxixi á naxihi ticuifí nani tácu Pablo. ¹³ Ta yáha ga nuú ivi jico taa cúu da najándique táhan tuhun caja ña yóho.

¹⁴ Tá nandihí já naquee na nasahan na cañan na xihin da sacuaña nuú jutu cán xihin na sacuaña nuú na Israel cán já nacachi na já xihin ná:

—Tóco ndihí nde najándique táhan nde tuhun nde cañí nde Pablo. Ta nachicaan nde cháhan jata ndá da ná cuxu nani tácu Pablo. ¹⁵ Sahá ña cán quea caja ndó ñamani jándique táhan ndó tuhun ndó xihin java ga na sacuaña jan já ná cañan ndó xihin da cúu jefe soldado já ná cañehe tucu da Pablo quixi da nu ndo. Ta cañan loho ndó xihin dá ña cúní ndó caja vii cuéé chága ndó sahá ña nacaja Pablo. Já va cachi ndó xihin da cúu jefe soldado cán ta ndehe canduu tiañva nde cañí nde da tá ná quixi da íchi —nacachi na xihin na sacuaña cán.

¹⁶ Joo in taa loho, da cúu jaxi Pablo nañeñe dá tuhun ña sácú ini na cañí na Pablo sahá ña cán quea xínu da nasahan da cáxi tuhun da nu Pablo vehe soldado cán.

¹⁷ Tá nandihí nandicani taa loho cán ña yóho nu Pablo já nacana da in táhan da cúu soldado cán já nacachi da já xihin dá:

—Cajún ñamaní candacún da loho yóho ná cūhun da nuú da cúu jefe nu soldado. Jáchí ín tūhun cúní da yóho cahan da xihín da cán —ñacachi Pablo xihín dá.

¹⁸ Anda já ndáca soldado cán da cúu jaxi Pablo nasahan da nuú da cúu jefe soldado cán já ñacachi da já xihín dá:

—Da naní Pablo ndácaan vehe soldado ñaxica da ñamaní nuú i ña ná candaca i da loho yóho quixi i ñehé e da jáchí ín tūhun cúní da cahan da xihín ndo —ñacachi da.

¹⁹ Anda já ñatiin jefe soldado cán ndahá ña loho cán já ñatavá xóo da da já ñacasáhá ndáca tūhun ñahá da já ñacachi da já xihín dá:

—Ndía cúnun cahún xihín i —ñacachi da.

²⁰ Anda já ñacasáhá ña loho cán cáxi tūhun da já ñacachi da já:

—Ñajándique táhan ña Israel tūhun na ña caça na ñamaní nu mé ndó ña ná cañehe tucu ndó Pablo nuú ña sacuahā nuú ña Israel cán ña cavií vaha chága saha dá.

²¹ Joo a cándúsa ndó caja ndó ña cúní ña jáchí yáha chága nuú ivi jico ña ndáti jehé ña íchi ña cahní ña Pablo. Ta ñandique táhan tūhun na ña a cúxu na ni a cóho na ticuí janda quiahva ná cahní ña Pablo. Ta viti ndáti na candehé ña á caja ndó ña cúní ña —ñacachi jaxi Pablo cán xihín da cúu jefe soldado.

²² Ta tá ñandihi já ñacachi da cúu jefe soldado cán xihín dá ña ná a ndícani da nuú ni in ñayivi sahá ña sácú ini ña Israel caja na xihín Pablo. Chí ñaquee da loho cán cuahan da.

Chíndahá ña Pablo cuahan da nuú gobernador naní Felix

²³ Anda já ñacana jefe soldado cán ivi da sáhná chuun nuú soldado ta ñasahnda da chuun nu dá ña ná caja tiāhva da ivi ciento soldado táhan da xíca sáhá xihín uní jico uxu soldado táhan da cándójó cuáyí. Ta ñatahnda chuun nu

dá ña ná caja tiahva da inga ivi ciento táhan da ñéhe lanza já ná candaca na Pablo cūhun da ñuu Cesarea cán. Ta ná quee na cūhun na tátuhun caa in sacuaá. ²⁴ Ta ñasahnda da chuun ña ná caja tiahva na cuáyí canúu Pablo cūhun da. Ta ñasahnda da chuun ña ná candaa vaha na Pablo já ná cuu xinu coo vaha da nuú da cúu gobernador naní Felix ñuu Cesarea cán. ²⁵ Ta ñachindahá da in carta cuahan xihin ná já ná ndiquiahva na ña nuú da cúu gobernador cán ta ña yóho cúu mé tuhun ñachiyi nu carta cán:

²⁶ “Yehe cúu Claudio Lisias ta chindahá i carta yóho nu ndo, tá Felix. Ta nu carta yóho cáhan Ndióxi yehe xihin ndo, da cúu da cáhnu ñuu Cesarea cán. ²⁷ Candehé ndo, tá Felix. Chindahá i da yóho nu ndo jáchi ñatiin na Israel da ta ndúcú na cahní na da. Joo tá ñacandaa ini i ña cúu dá da romano já ñasahan i xihin java soldado ta ñacandaa nde da ndáha na cán. ²⁸ Ta sahá ña cúní candaa ini i ndá cuachi jácojo na jata dá sahá ña cán quea ñasañehe e da ñasahan i nuú na sacuaaha nuú na Israel cán. ²⁹ Já ñacandaa ini i ña jácojo na cuachi jata dá saha ley mé va na. Ta sahá ña coo cuachi ñacaja da nu mí sahá ña cán quea coo ñaxeen nde ña ná cahní na da ta ni janda vecaa coo cáni nu dá cūhun da, cáhán i. ³⁰ Joo ñacandaa ini i ña sácú ini na Israel cahní na da sahá ña cán quea chindahá vaha i da nu mé ndó. Ta ñacachi i xihin na xójo ini xihin dá ña ná saa na nu mé ndó cacu na saha dá ndía ndóho na xihin dá. Ña yóho cúu ndihi ña cáhan i xihin ndo, tá Felix. Ndióxi ná coo xihin ndo”, cáchi carta cuahan xihin Pablo.

³¹ Ta ñacaja mé soldado cán tá íin ñatahnda chuun nu dá. Ta já ñéhe ñuu na Pablo ñasahan na janda ñuu Antípatris. ³² Ta inga quiví itaan já ñandicó coo java soldado, da ñasahan sahá cán chí vehe soldado. Joo java da cándójó cuáyí cán catáhan yii dá xihin Pablo cuahan da. ³³ Ta tá ñaxinu coo da ñuu Cesarea já ñandiquiahva

da carta cán nuú da cúu gobernador. Ta nandiquiahva ri da Pablo nuú da cán. ³⁴ Ta tá sa nandihi nacahvi da cúu gobernador carta cán já nacasáhá ndáca tuhún da Pablo saha ndá ñuu naquixi da. Ta tá nacandaa ini da ña cúu Pablo da ñuu Cilicia ³⁵ já nacachi da já xihin dá:

—Janda quiahva ná xinu coo na jácojo cuachi jatun anda já caja vií i sahún —nacachi Felix cán xihin Pablo.

Tá nandihi já nasahnda da chuun ña ná candaa vaha na Pablo nani ndácaan da vechúun Herodes cán.

24

Ndíquehe Pablo saha mé dá nuú da cúu gobernador naní Felix cán

¹ Ta tá sa nayaha uhun quivi já naxinu coo da cúu sacuahá nuú jutú, da naní Ananías cán. Naxinu coo da ñuu Cesarea xihin java ga na sacuahá ta ndáca da in da ndíquehe sahá na Israel naní da Tértulo. Tóco ndihi na yóho nacatáhan na nasahan na sácú na saha Pablo nuú gobernador cán. ² Ta tá nandihi já nasahan quehe na Pablo já naxinu da nuú ndihi na cán. Anda já nacasáhá Tértulo cán sácú da saha Pablo já nacachi da já:

—Ndíquiahva nde ndixahvi nu ndó, tá gobernador jáchi sahá ña ndíchí jini ndó cúu ndáa vaha ndó ndehe. Ta coó tandóhó tañu nde ta tóco ndihi nde ndúu táji nde. ³ Ñayivi ndúu ndijáa ñuu iin toni ñúhú na xihin ndo ta ndíquiahva na ndixahvi nu ndo, tá Felix jáchi cája cuaha ndó ñamaní xihin nde. ⁴ Ta viti co cuni nde jáquihvi nde ndohó joo caja ndó ñamaní cuni johó loho ndó ña cuni nde cahan nde xihin ndo yóho. ⁵ Candehé ndo, tá Felix. Nanditahan nde da naní Pablo yóho xíca nuu da jáquihvi da ñayivi. Ta níí cúu xíca nuu da sáhnda java táhan da ñayivi naquixi chichi Israel. Ta mé Pablo yóho cúu dá jini nuú in táhnda ñayivi, na naní nazarenos. ⁶ Ta jivi mé da yóho nanducú da

jáyuxu da veñuhu cáhnu nde ndácaan ñuu Jerusalén cán. Sahá ña cán queá natiin nde da ta nanducú nde caja víi nde saha dá tá quiahva sáhndá ley mé nde caja nde. ⁷ Joo da cúu jefe soldado, da naní Lisias cán naquihvi da tañu nde ta xihín ña tóyíi nacandaa da Pablo ndahá nde. ⁸ Ta nacachi da xihín nde ña ná quixi nde cahan cuachí nde nu mé ndó saha Pablo. Ta viti, tá Felix cuu ndaca tuhún ndó Pablo jan ta já nahma mé va da nu ndo. Ta xihín ña yóho cuu candaá ini ndó ña ndaa cahan nde sácú nde saha dá nu ndo —nacachi Tértulo cán xihín Felix.

⁹ Ta jári na Israel ndúu cán nacachi na ña jivi ndusa ña ndaa queá. ¹⁰ Andá já nandiñehe gobernador cán ndáha dá ña ná cahan Pablo. Ta já cáchí Pablo já:

—Cájii ini i ndiquehe e sahá i nu mé ndó, tá Felix jáchi sa cuahá cuia cája víi ndó sahá ñayivi Israel. ¹¹ Tá ná ndaca tuhún ndó ñayivi yóho já candaá ini ndó ña sa ín uxu ivi quivi naxinu coo i ñuu Jerusalén caja cáhnu i Ndióxi. ¹² Ta ni in túhún toho ñayivi co ndítuhún ihvi yehe xihin. Ta ni in túhún toho ñayivi coo najándinihi i veñuhu cáhnu ndácaan Jerusalén cán. Ta ni na táca veñuhu válí ta ni na táca cáyé ñuu Jerusalén cán coo najándinihi i. ¹³ Ta na jácojo cuachi jatá i yóho a cúu caja na naha na nu mé ndó ña ndaa cahan na sahá i. ¹⁴ Na cuni ndusa i caxi tuhun i xihín ndihi ndó queá cája cáhnu i Ndióxi, mé a nacaja cáhnu tásáhnu jícó i tá quiahva najánaha Jesús caja í. Vatí cáchí na Israel yóho ña co xica i íchi ña ndaa. Joo cándusa i tóco ndihi ley nacahyí Moisés ta cándusa i ña nacahyí na profeta sanahá. ¹⁵ Ta tá quiahva cándusa na yóho quiahva já cándusa ri yehe va jáchi cándusa nde ña vaxi quivi nditacu tóco ndihi na sa naxihi. Coó caja toho á cúu ná na vaha á na quini. ¹⁶ Sahá ña cán queá xini Ndióxi ña ndijáá níi quivi cája i ña vaha xihín ndinuhu ini i nu mé á xihín nuú ñayivi.

17 'Sa íin chá cuia naxica nuu i java ga ñuu. Anda javí nandicó coo tucu u ñuu Jerusalén ña quiahva i jjuhún nuú na Israel ta joco i nu Ndióxi ña ndítahan nuú i joco i nu á. 18 Ta nani cája i mé ña yóho ndácaan i veñuhu cáhnu Jerusalén cán já java da Israel, da naquixi chí estado Asia cán naxini da yehe nu ndácaan i ve ñuhu cán. Ta tá nandihi nandaja víi i mí i tá quiahva sáhndá ley cája nde, coó ñayivi cuaha nasanduu cán ta ni in túhún toho na cán coó najándinihi i. 19 Ta na naquixi chí Asia cán, na cán va cúu na ndítahan cacu sahá i nu ndo, tá Felix tá íin a ndóho na xihín i. 20 Joo na ndúu yóho coó saha toho na cacu na sahá i nu mé ndó. Á tá coó ná cahan na tá nandiñehe ná cuachi i tá nacaja víi na sahá i nuú na sacuahá nuú na Israel cán, dá já. 21 In túhún ña nacaja i tá cája víi na yóho sahá i quea nacayuhú u ta nacachi i: “Cája víi ndó sahá i sahá ña cándusa i ña vaxi quivi nditacu tucu ndii”, ña cán cúu ndihi va nacachi i xihín ná —nacachi Pablo cán xihín da cúu gobernador cán.

22 Sa xini vaha Felix cán ndaja íin ña jánaha na cúu cuéntá Jesús cán sahá ña cán quea cuni da candati too da caja víi da saha Pablo. Sahá ña cán quea já nacachi da já xihín na Israel cán:

—Candati ndó janda quiahva ná casaa da naní Lisias, da cúu jefe soldado ñuu Jerusalén já cuu caja víi i sahá da yóho —nacachi Felix.

23 Tá nandihi já nasahnda Felix chuun nuú da sáhndá chuun nuú soldado cán ña ná chicaan tucu na Pablo vecaa. Ta nasahnda da chuun ña ná caja vaha da xihín Pablo ta ná quiahva da ñamaní nuú na xica xihín Pablo coto nihni na da ña ná caja ndívi na nu dá.

24 Tá nayaha chá quivi já nacasaá tucu Felix cán xihín Drusila, ñájihí da, ñá cúu ña Israel. Nacana tucu Felix Pablo ña ná quixi da ta ná ndicani da nu ná ndá quiahva

caja na ndiquehe na íchi cuéntá Jesús. ²⁵ Ta nandicaní Pablo nu ná ña ndítahan nu ná caja na ña ndaa cuití va ta ndítahan nu ná cahnu na nuú ña xíca ini yiquí cuñu na caja. Ta nandicaní Pablo nu ná ña vaxi quiví caja vií Ndióxi sahá cuachi ñayivi. Anda já nayihví Felix cán já nacachi da já xihin Pablo:

—Cuáhán viti. Tá núná nuú i já cana tucu u yohó quisún —nacachi Felix xihin Pablo.

²⁶ Mé Felix yóho ndáti da quiahva Pablo jihún nu dá já janí ñahá da. Sahá ña cán queá cuahá ndivaha tañu nacana da da nditúhún da xihin dá. ²⁷ Ta tixi ivi cuia já cuití nacaja da xihin Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó naxeen da janí da Pablo jáchi cuni da candoo vaha da nuú na Israel cán.

25

Ndíquehe Pablo saha mé dá nuú gobernador Festo

¹ Tá sa nayaha uni quivi nandicojo Festo chuun cúu dá gobernador já naquee da ñuu Cesarea cán nasahan da chí ñuu Jerusalén. ² Ta tá naxinu coo da cán nasahan na sacuahá nuú jutú xihin java ga na Israel, na ñin chága saha cahán cuachí na saha Pablo nu Festo. ³ Ta ñamaní cáhnu naxíca na nu dá queá ña ná cahnda da chuun ná quixi Pablo chí ñuu Jerusalén yóho. Jáchi mé na cán nasacu ini na tiin na Pablo íchi cahní na da. ⁴ Joo coó nacandúsa Festo caja da ña cuni na sahá ña cán queá nacachi da xihin ná ña ndáa vaha na Pablo ñuu Cesarea cán. Ta sahá ña sácú ini da cuhun yachi da mé cán ⁵ sahá ña cán queá nacachi da xihin ná já:

—Ndá na cúu na sacuahá nu ndó jan xíní ñúhú cuhun na ñuu Cesarea xihin i já ná cuu cacu na saha Pablo tá ñin cuachi nacaja da —nacachi Festo xihin na Israel cán.

⁶ Ta nasahiin Festo tátuhun uná á uxu quiví cuití va ñuu Jerusalén cán já nandicó coo tucu da chí ñuu Cesarea. Ta inga quiví itaan já nasacoo da nu silleta nu sácoo na cája vií sahá ñayivi. Anda já nasahnda da chuun ña ná cana na Pablo quixi da nu dá. ⁷ Ta tá naxinu coo Pablo nu Festo cán já tóco ndihi na Israel, na naquixi ñuu Jerusalén cán nacava nuu na jata Pablo já nacasáhá jácojo cuaha ná cuachi ndeé jata dá. Joo co ñéhe ná ndaja naha na nu Festo cán ña cáhan na ña ndaa saha dá. ⁸ Ta nacasáhá Pablo ndiquehe da saha mé dá já nacachi da já:

—Ni in túhún toho cuachi coo nacaja i xihin ley na Israel ta ni xihín veñuhu cáhnu coo nacaja i cuachi. Ta ni nuú da cómi cuénta sahá ñuu Roma coo nacaja i cuachi —nacachi Pablo xihin tóco ndihi ñayivi ndúu cán.

⁹ Ta sahá ña cúni Festo candoo vaha da nuú na Israel sahá ña cán queá nandaca tuhún da Pablo já nacachi da já:

—Á cándúsún cuhún ñuu Jerusalén já ná caja vií i sahun cán —nacachi da xihin Pablo.

¹⁰ Anda já nanducú ñehe Pablo tuhun nu dá já nacachi da já:

—Uhun. Coó saha cúu á cuhun i ñuu Jerusalén jáchi viti ñúhú cándichi i nu mé ndó ta cúu ndó gobernador romano. Ta mé ndó ndítahan nuu caja vií sahá i jáchi sa cándaá cáxi ini ndó ña coo cuachi toho nacaja i xihin na Israel jan. ¹¹ Joo tá nacaja ndusa i cuachi, mé a ndaa co yihví toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jata i sahá ña cán queá co ndítahan nu ndó ndiquiahva ndó yehe nuú na yóho. Ta viti xica i ñamani nu ndo ña ná chindahá ndó yehe ná cuhun i nuú emperador ñuu Roma ná caja vií mé dá sahá i —nacachi Pablo xihin Festo cán.

¹² Tá nandihí já nanditúhún Festo cán xihín nā sacuaḥa cája chúun nu dá cán ndaja ndítahan coo caja da. Anda já nācachi tucu Festo cán já xihín Pablo:

—Vaha dá já. Nu emperador iin ñuu Roma nācachún cūhun cūnun. Ta cán cūhun cavií saḥun —nācachi Festo xihín Pablo.

Tá iin Pablo nu rey Agripa

¹³ Tá nayaha chá quivi já naxinu coo in rey naní Agripa xihín ñā naní Berenice ñuu Cesarea cán coto nihni na Festo. ¹⁴ Ta naṣanduu na chá quivi xihín Festo cán. Ta nani ndúu na cán nandicani Festo nu rey Agripa ndaja cáa ñā ndóho Pablo já nācachi da já xihín dá:

—Ini vechúun yóho ndácaan in da naní Pablo ta anda tá naṣacuu Felix gobernador já natiin na da. ¹⁵ Ta tá naṣaḥan i ñuu Jerusalén já sácú nā sacuaḥa nuú jutū xihín nā sacuaḥa nuú nā Israel saḥa dá ñā ná quivi da caja i. ¹⁶ Anda já nanducú ñehe e tūhun nu ná ñā cō sáhan ley ñuu Roma ñamaní ñā cahní nā ñayivi tá cōó nā sácú saḥa dá ndíta nu táhyí da já ná cuu ndiquehe da saḥa dá nu ná. ¹⁷ Saḥá ñā cán quéa tá nandai cuu nā Israel cán ñuu Cesarea yóho já nandihí ini i já naṣaḥan i naṣacōo i inga quiví itaan nu sácōo na caja víi saḥá ñayivi. Já naṣahnda i chuun ñā ná cañehe na Pablo quixi da nuú i. ¹⁸ Tá naxinu cōo nā cán sácú nā saḥa dá cōó naṣacu na cuachi cáhnu saḥa dá tá quiaḥva cáhán i. ¹⁹ Joo cáhí nā ñā cō cúní da candúsa da tá quiaḥva cándúsa mé ná. Ta sácú nā saḥa dá jáchi xíca da jánaḥa dá saḥa Jesús, mé a naxihí jihna. Joo jánaḥa Pablo ñā tácu yíi va mé Jesús. ²⁰ Ta saḥá ñā cō cándaā ini i ndaja caja i caja víi i saḥá ñā yóho saḥá ñā cán quéa nandaca tūhún i Pablo ñā á cándúsa da cūhun da ñuu Jerusalén caja víi i saḥa dá. ²¹ Joo nācachi da xihín i ñā cúní da cavií saḥa dá nuú da cúu emperador naní Augusto, da iin ñuu Roma cán. Saḥá ñā cán quéa naṣahnda i chuun

ñā ná candaa vaḥa na ḍa jaṇḍa quiaḥva ná cuu chindahá i ḍa nuú emperador já ná caja vií ḍa cán saḥa dá —ṇacachi Festo xihín rey Agripa cán.

²² Andā já ṇacachi rey Agripa cán já xihín Festo:

—Cúni ri yeḥe va cuni johō i ndá quiaḥva cáḥaṇ ḍa naní Pablo jaṇ —cáchi Agripa.

Andā já ṇacachi Festo já xihín dá:

—Itaān já cuni johún nuú caḥaṇ ḍa —cáchi Festo.

²³ Ta inga quiví itaān naḥinu coo rey Agripa xihín Berenice nuú íin Festo cán. Ta ndíxi vaḥa ndivaḥa na naṇḍihvi na xihín in yíco ḍa cúu sacuaḥa nuú soldado xihín nataa íin saḥa ñuu cán. Ta tá naṣanduu na já naṣahnda Festo chuun ñā ná cuḥuṇ ṇa queḥe na Pablo. ²⁴ Ta tá naṣaa ḍa nuú ná já ṇacachi Festo já:

—Mé ndó, rey Agripa xihín ndihi ndó, ṇa nataca ndúu xihín nde yóho. Candehé ndó ḍa naní Pablo cándichi yóho. Cuahá ndivaḥa táhan ṇa Israel, ṇa ndúu ñuu Jerusalén xihín ṇa ndúu ñuu Cesarea yóho sácú ṇa saḥa dá nuú i. Ta a juú quiaḥva ndúcú ndéé ṇa cáḥaṇ ṇa ñā ndítahan quivi da caja i. ²⁵ Joo yeḥe cáhán i ñā co ndítahan toho nuú dá quivi da jáchi coo cuachi cáhnu ná caja da. Ta saḥá ñā naḥica mé dá cavií saḥa dá nuú emperador Augusto íin ñuu Roma cán saḥá ñā cán queā sácú ini i chindahá i ḍa cuḥuṇ ḍa cán cavií saḥa dá. ²⁶ Joo co xini ndía caḥyí i nuú ḍa cúu emperador ñuu Roma saḥá cuachi sácú ṇa saḥa dá. Saḥá ñā cán queā naṣani ndichi i ḍa nuú ndihi ndó xihín nuú mé ndó rey Agripa já ná ndaja ndichí ndó ḍa já ná ñeḥe íni i ndaa caḥyí i nuú carta chindahá i nuú emperador ñuu Roma cán. ²⁷ Jáchi coo saḥa cúu á chindahá i ḍa ñuu Roma tá a cuú caḥyí i ndá cuachi jácojo na jaṭa dá —ṇacachi Festo xihín ṇa cán.

26

Ndíquehe Pablo saha mé dá nu rey Agripa

¹ Andá já nacachi rey Agripa cán já xihín Pablo:

—Viti va sahan nde ñamaní nuun ndiquehún sahun.

Andá já nandiñehe Pablo ndáha da já nacasáhá cáchí da já:

² —Cájii íní i ña cuu ndiquehe e saha mí i nu ndó, rey Agripa jáchi a juú quiahva cuahá cuachi jíquí jácojo na Israel jatá i. ³ Cájii íní i cáhan i nu mé ndó, rey Agripa jáchi cándaá vaha ini ndó ndaja íin costumbre na Israel. Ta cándaá ini ndó ndá ñaha queá ndítuhún táhan nde saha. Saha ña cán queá xíca tahví i nu ndó ña ná caja ndó ñamaní cáhnu coo ini ndó cuni johó ndó ña cáhan i xihín ndo yóho.

⁴ 'Tóco ndihi na Israel xíni vaha na ña nacaja i tá nasacuu u da tacú. Ta anda viti xíni na yehe ta xíni na ña nacaja i ñuu i xihín ñuu Jerusalén. ⁵ Ta xíni vaha na ña janda yúta i nasacuu u ta fariseo ta chí cuu ndicani na nu mé ndó tá cúní na. Ta ndehe, na fariseo cúu nde na cája ley Moisés xihín ndinuhu chága ini nde a juú ga inga na. ⁶ Ta sahá ña cándéé cáhnu ini i ña vaxi quiví jánditacu tucu Ndióxi tóco ndihi na naxihí sahá ña cán queá na Israel yóho ñéhe na yehe nacasaá na caja víi na sahá i nu mé ndó. Ta mé Ndióxi queá nasahan tuhun a nu tásáhnu jícó nde ña nditacu tucu ndii. ⁷ Tóco ndihi ñayivi táhan na naquixi chichi ndíhuxu ivi jahyi Israel cán ndátí na cuni na nuú jáxinu coo Ndióxi nuú tuhun a. Saha ña cán queá ñuu ta ndiví cája cáhnu na Ndióxi. Candehé ndo, rey Agripa. Saha ña cándúsa i tá quiahva cándúsa na cán sahá ña cán queá jácojo na Israel cuachi jatá i viti —nacachi Pablo xihín rey Agripa.

⁸ Andá já nacahan Pablo xihín na Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii —ñacachi Pablo xihín na Israel ndúu cán.

⁹ Anda já ñacachi tucu Pablo xihín rey Agripa já:

—Yehe ñacahán i jihna ña ndítahan caja xixi i xihín na cúu cuénta Jesús, mé a ñaquixi ñuu Nazaret. ¹⁰ Sahá ña cán quea já ñacaja i ñuu Jerusalén jihna. Ta ñasahan i ñaxica i ñamani nuú na sacuaḥa nuú jutú já ná quiahva na ñamani nuú i caja i ña yóho. Ta tá ñañehé e ñamani já ñataán cuahá i na cúu cuénta Jesús vecaa. Ta tá ñasahní ñahá na, cájii ini i sahá ña cája na já xihín ná. ¹¹ Ta cuahá tañu ñacaja xixi i xihín ná ña ná caḥan ihvi na saḥa Jesús, mé a cándeé ini na. Níi cúu veñuhu ñaxica nuu i cája i já xihín ná. Ta janda ñuu tóho ñasahan i ñandicuita ñee e na jáchi ñasaxojo ndivaḥa ini i xihín ná.

Ndicani Pablo ndaja ñandihvi da íchi cuénta Jesús

(Hch. 9:1-19; 22:6-16)

¹² In tañu ñañehé e ñamani nuú na cúu sacuaḥa nuú jutú ñuu Jerusalén ña ná cuḥun i ñuu Damasco taán i na cúu cuénta Jesús vecaa. Sahá ña cán quea ñaquee e cuahán i. ¹³ Candehé ndó, rey Agripa. Nani xica i cuahán i íchi cán cúu á tátuhun caxivi já ñaxini i ñandiyihvi ndaa in ñúhu indivi ta yéhe chága ña a juú ga candii. Ta ñacava nuu a jatá i xihín jatá da cásahan xihín i cán. ¹⁴ Anda já ñacuyu ndihi nde nu ñúhu ta já ñaxini johó nde in a cáhan tuhun hebreo já ñacachi a já xihín i: “Saulo, Saulo ndá cuénta quea ndícuitún cája xísún xihín i. Candehé. Cája xísún xihín mé vún. Ña cájun xihín i cúu á tátuhun ña cája tĩndiqui tá sání ndaa rí nu póyá”, ñacachi a cán xihín i. ¹⁵ Anda já ñacasáhá ndáca tuhún i já cáchí i já: “Yo cúu mé ndó cáhan xihín i.” Anda já ñanducú ñee a cán tuhun nuú i já ñacachi a já: “Yehe cúu Jesús, mé a xica nuún cája xísún xihín. ¹⁶ Ta viti cuahán ndacoo,

candichi. Nanaḥa i mí i nuun já ná caja chúun cuéntá mí i viti já ná ndicanún nuú ñayivi ndaja cáa ña naxinún viti ta já ná ndicanún nu ná java ga ñaha jánaḥa i nuun chága chí nuu. ¹⁷ Mí i jácacu u yohó já ná a cáhni na Israel yohó ni na tóho a cáhni na yohó jáchi nu mé na tóho cán chindahá i yohó cuhún cahún sahá i viti. ¹⁸ Ta jánaḥún nu ná ndaja caja na jándicoo na íchi naá ndivaḥa nu xíca na viti. Jáchi ndítahan nu ná ndicaca na íchi mí i nu yeḥe ndivaḥa. Ta jánaḥún nu ná ña ná a ndiquiahva ga na mé ná ndahá tiñáhá sacuaḥa. Ña ndítahan caja na queá ndiquiahva na mé ná ndáha Ndióxi ta ná caja na ña cúni mé á. Ta ndítahan candeé ini na yeḥe já ná caja cáhnu ini i sahá cuachi na. Ta já ná cuu in nduu na xihín na naçaxi i ñeḥe táhvi ña cúni Ndióxi quiahva nu na”, naçachi Jesús xihín i tá naṣahan i íchi ñuu Damasco.

Ndicani Pablo sahá chuun cája da

¹⁹ Candeḥé ndó, rey Agripa. Coó naçaja sáa ini i. Jáchi naçaja i tá iin naṣahnda Jesús nuú i caja i. ²⁰ Sahá ña cán queá ivi laá naçasáhá caḥan i tuhun vaha saḥa Jesús nuú ñayivi ñuu Damasco cán. Tá nandihi já naquee e naṣahan i caḥan i ña xihín na ndúu ñuu Jerusalén xihín na ndúu ndijáa ñuu estado Judea. Ta janda xihín na coó naquixi chichi Israel naçahan i saḥa Jesús. Ta naçachi i xihín ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná naha ña mé a ndaa táhyí nandiquehe na íchi cuéntá Jesús. ²¹ Ta sahá ña yóho cuití natiin na Israel yeḥe nani ndácaan i veñuhu cáhnu ñuu Jerusalén ta viti ndúcú na cahní na yeḥe. ²² Joo Ndióxi nachindeé a yeḥe sahá ña cán queá coó najándihi na sahá i. Ta anda viti xíca nuu i caḥan i tuhun Ndióxi nuú ñayivi ta coó caja toho a á cúu ná na ndahví á cúu ná na iin cuahá saḥa. Ta tóco ndihi ña jánaḥa i nu ná coo cúu á ña quíxi jini mí i jáchi cúu á ña naçachi na profeta

xihín ña ñacachi Moisés coo. ²³ Ta ña ñacachi ña cán quéa vaxi quiví quixi Jesucristo ñuyiví yóho ta a juú quiahva jándoho na ini a. Ta cahní ña ña ta tá ñandihi jánditacu tucu a. Ta mé á cacuu ña nu cuítí nditacu nuú tóco ndihi ña sa ñaxihí. Ta mé á jánaña nuú ñayivi ndaja cuu cacu ndaa ínimá ná coó caja toho a á cúu ná ña Israel á cúu ná ña tóho —ñacachi Pablo xihín rey Agripa cán.

Cúni Pablo ná ndihvi Agripa íchi cuéntá Jesús

²⁴ Tá ñacatáji loho Pablo nu cáhan ña já ñacayúhú cóhó Festo nu dá já cáhí ña já:

—Ñacatachi vún, Pablo. Ñayaha ndivaha quiahva ñajácuahún sahá ña cán quéa ñacatachun —ñacachi Festo cán xihín Pablo.

²⁵ Anda já ñacachi Pablo já xihín dá:

—Coó ñacatachi toho i, tá Festo jáchi ndinuhu ña ndaa cáhan i xihín ndo. ²⁶ Ta xíní vaha mé rey Agripa yóho ña cáhan i ña ndaa. Ta co yíhví cáhan i nu dá jáchi cándaá ini i ña xíní vaha mé dá ndá saha cáhan i jáchi co cúu á ñaha ñayaha nuú jehé. ²⁷ Ta viti cachi ndó xihín i, rey Agripa á cándúsa ndó ña ñacahan ña profeta sanahá. Cája i cuéntá cándúsa ndó ña ñacachi na —ñacachi Pablo.

²⁸ Anda já ñanducú ñehe rey Agripa cán tūhun já ñacachi da xihín Pablo:

—Ja lóho cuítí ta cavún jiní i ña ná nduu u cuéntá Jesús, nduu —ñacachi rey Agripa.

²⁹ Anda já ñacachi Pablo já xihín dá:

—Á yachi á cuee coó caja toho a. Ña xíca tahví i nu Ndióxi quéa ná xinu coo mé ndó, rey Agripa xihín tóco ndihi ña ndúu yóho cacuu ndó tátūhun mí i jáchi cándeé cáhnu ini i Jesús vatí mé a ndaa co cúni ña ná candico ndáha ndo tátūhun yehe —ñacachi Pablo xihín dá.

³⁰ Tá ñandihi ñacahan Pablo já ñandaça ndichi rey Agripa cán xihín Berenice ta ñandaça ndichi Festo xihín

java gā nā nāsanduu coo xih̄in dá cán. ³¹ Já n̄atavá táhan na ndítuh̄un nā sahā Pablo já cáh̄í xih̄in táhan na já:

—Cō ndítahan toho nuú dā yóho quivi da jách̄i coó cuachi ndeé ná caja da ta jandā ni vecaa cō ndítahan ndacaan dā —cáh̄í nā.

³² Andā já nacachi rey Agripa cán já xih̄in Festo:

—Tá ná a cáhan dā yóho ñā cún̄i dā cavií sahā dá nuú dā cúú emperador ñuu Roma ta cuu janí vún dā, nduu —nacachi Agripa cán xih̄in Festo.

27

Chindahá nā Pablo ñuu Roma

¹ Tá nasacu ini na chindahá nā Pablo ná cuhun dā chí nación Italia nū ndacaan ñuu Roma cavií sahā dá já nandiquiahva na dā xih̄in java gā dā ndacaan vecaa cán nuú dā naní Julio, dā sáhdá chuun nū soldado cuéntá Roma. Mé Julio yóho cúú dá dā cóm̄i cuéntá sahá in táhdá soldado naní Augusto. Ta tañu nā cuhun xih̄in Pablo cán cuahan ri yehe, dā naní Lucas. ² Ta tañu nde cán cuahan ri dā naní Aristarco, dā ñuu Tesalónica, ñā ndacaan estado Macedonia. Nandaa nde ini barco, dó naquixi chí Adramitio. Mé barco yóho cúú dó cuhun ndijáá ñuu vál̄i ñúhu estado Asia cán. Cándójó nde barco cán cuahan nde. ³ Ta inga quiví itaan naxinu coo nde ñuu Sidón. Ta cán nacaja vaha dā naní Julio cán xih̄in Pablo jách̄i nasahan dā ñaman̄i nū Pablo ñā ná coto nihni da nā xín̄i táhan xih̄in dá ndúu ñuu Sidón cán já ná caja ndív̄i nā nū dá. ⁴ Ta inga quiví itaan já nandihvi tucu nde barco já naquee nde ñuu Sidón cán. Ta sahá ñā vaxi tach̄i xoo nuú cuhun barco cán sahá ñā cán queá nayaha nde xoo íti isla Chipre jách̄i cō xícó cuahá tach̄i cán. ⁵ Naxojo cava nde andā inga xoo tañuhú ta já nayaha nde in xoo estado

Cilicia xih̄in estado Panfilia. And̄a já nax̄inu c̄oo nde ñuu Mira ndácaan estado Licia.

⁶ Mé ñuu Mira cán nandiñehé da sáhndá chuun nu soldado cán in barco, dó naquixi chí Alejandría ta cuhun do chí Italia. Ta najánda da ndeh̄e jata dó cán já naquee tucu nde cuah̄an nde. ⁷ Cuéé vaha va cuah̄an nde ta nandoho chá ini nde cuah̄an nde sah̄á ña cán quéa cuah̄a quivi nacaja nde janda quiahva nax̄inu c̄oo nde ñuu Gnido. Ta sah̄á ña xícó ndivaha tach̄i xoo nuú cuhun nde cán sah̄á ña cán quéa nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. ⁸ Cuéé ndivaha cuah̄an nde já yaha nde yati yuhú tañuhú isla Creta cán. And̄a jáví nax̄inu c̄oo nde nuú coo vaha barco naní Puerto Vaha yati ñuu Lasea.

⁹ Sa nayaha cuah̄a quivi ta nacacuáchi nde. Ta iyo ndivaha cáa cuhun nde xih̄in barco jáchi nacayati tiempo vixi. Sah̄á ña cán quéa nacah̄an Pablo xih̄ín ndihi na cán já cáchi da já xih̄in ná:

¹⁰ —Candehé ndo. Cája i cuéntá iyo ndivaha cáa c̄oho xih̄in barco jáchi cuu ndihi saha barco xih̄ín ña ndójo dó cuah̄an do. Ta janda mí cuu quiví —nacachi Pablo xih̄in ná.

¹¹ Joo coó nax̄een da sáhndá chuun nuú soldado cán cuni joh̄o da nu cáhan Pablo. Nacandúsa chága da nuú nacah̄an da ñeh̄e barco xih̄ín da xíñaha barco a juú ga nuú nacah̄an Pablo. ¹² Ña nacachi na quéa a cuú candoo na yóho tiempo vixi jáchi xícó ndivaha tach̄i. Ta tóco ndihi na nacachi na ña vaha chága ná cuhun nde. Tiahva náá jana quee vaha nde x̄inu c̄oo nde janda ñuu Fenice cáhán na. Mé ñuu Fenice cán ndácaan isla Creta ta co xícó ndeé nah̄á tach̄i cán. Sah̄á ña cán quéa nasacu ini na canduu na cán tiempo vixi.

Tá nax̄icó ndivaha tach̄i nuú tañuhú

¹³ Tá nandihí já nacasáhá vitá uun xícó tachi sahá ña cán queá nacaán na ña cuu va quee nde cuhun nde. Anda já naquee nde cuahan nde yati yúhu isla Creta cán xíca nde cuahan nde. ¹⁴ Joo tá nandihí já naxinu tachi ndeé jata barco. Mé tachi ndeé cán vaxi a chí xoo norte xihin chí nu cána candii. ¹⁵ Ta nacasáhá ñúhu mé tachi ndeé cán barco cuahan do. Ta sahá ña coó nacuu caja nde jándicaca nde barco cán xoo nuú vaxi tachi sahá ña cán queá nasahan nde ñamani ña ná cañehe a barco cuhun do tá quiahva cúni tachi. ¹⁶ Tá nandihí já nayaha nde jata in isla loho naní Claudia. Ta mé cán coó naxicó nahá tachi ndeé. Anda já nacasáhá nde jándaa nde lancha loho, dó jítá barco cáhnu cán. Joo nandoho chá ini nde já nacuu najándaa nde do jata barco cáhnu cán. ¹⁷ Tá nandihí já nacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sándaca barco cán ña ná cañehe mé tachi do. Nacaja na ña yóho jáchi yíhvi na xinu coo barco xoo naní Sirte nu yají tañuhú ta cán cuu cachihin dó ñutí. ¹⁸ Ta chí coó nasacuiin tachi ndeé nahá cán inga quivi itaan sahá ña cán queá nacasáhá na jácana nihni na ñaha ndójo barco cán ini tañuhú já ná ndicama dó. ¹⁹ Ta tá naxinu quivi uni janda mé nde viti nacasáhá nde jácana nde ña sácaja chúun barco cán ini tañuhú já ná ndicama chága do. ²⁰ Ta tixi cuahá ndivaha quivi coó naxini nde nuú candii ta ni quimi coo tívi. Ta javi nacuun quini ndivaha dó ta a juú quiahva naxicó ndivaha tachi. Sahá ña cán queá chí nasahnda vaha ini nde: “Yóho quivi viti”, nacaán nde.

²¹ Cuahá ndivaha quivi nayaha ta ni in nde coo cúni cuxu. Sahá ña cán nandaca ndichi Pablo tañu tóco ndihí na cán já nacasáhá cáhí da já:

—Tá ná coo johó ndó tá nacaahan i xihin ndo ta ná candoo í ñuu Creta, nduu. Ta ni a ndóho í ña ndóho í yóho

viti ta ni a tíví toho ndihi ñaha ñasandojo barco yóho, nduu. Joo coó ñaxeen ndó candúsa ndó ña ñacahan i xihín ndó. ²² Joo cáchí i xihín ndó viti ña co ndítahan ndicani ini ndó. Jáchí ni in túhún toho ndó a quíví vatí mé barco ndihi saha do. ²³ Jáchí yehe cúu u cuéntá Ndióxi ta cája cáhnu i mé á. Ta mé ñuu janda véhe ñanaha in tátó Ndióxi mé á nuú i. ²⁴ Ta já ñacachi a já xihín i: “A cáyihví tohún, Pablo. Jáchí ndítahan xinun tá xinun nuú da cúu emperador ñuu Roma cán. Ta saha yóhó jácacu ri Ndióxi tóco ndihi na ñúhu xuhun ini barco jan já ná a quíví na ini tañuhú”, já ñacachi tátó Ndióxi xihín i. ²⁵ Saha ña cán queá a ndícani ga ini ndó jáchí cándeé cáhnu ini i Ndióxi ta cándaá cáxí ini i ña coo tá iin ñacachi tátó Ndióxi xihín i. ²⁶ Joo in tachí ndeé caja ña ná tiví barco yóho yati in isla —ñacachi Pablo xihín na cán.

²⁷ Sa ñaxinu sahun quívi xíca nde ini barco cán cuahan nde. Ta in ñuu ñaxinu coo nde in xoo tañuhú naní Adria. Joo tá xoo johó tá xoo cáa ñéhe tachí nde cuahan nde. Joo tátuhun java ñuu já ñaxini da ñéhe barco cán ña cáyati nde yuhú tañuhú cuahan nde. ²⁸ Anda já ñacasáhá chíquiahvá na ndá quiahva cúná tañuhú yati yúhu nu ndúu nde cán. Ta quiahva cúná do ñasacuu oco sahun in metro. Tá ñacasáhá cáyati chága barco yúhu cán já ñachiquiahva tucu na. Ta cán sa yájí chága ta cúu á oco usa metro quiahva cúná a. ²⁹ Ta saha ña yíhvi na xinu coo barco cani ndaa dó tótó ñúhu yati cán saha ña cán queá ñatiin na rieta ña ndíco comí caa gáncho cáhnu nu cán. Ta ñajácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhvi na ndáti na ná tiví. ³⁰ Joo ndaja coo java da cája chúun xihín barco cán ñacahan da quee jehé da xihín lancha loho cán cuhun da. Saha ña cán queá ñacasáhá da ndaxí da lancha loho cán ña jánuu da do nuú tañuhú

ta já cūhūn dā, cáhán dā. Ta načasáhá cája da tátūhun táán chága dā cāa gáncho cán ini tañuhú já ná tiin a barco xoo chí nuu do. ³¹ Joo naxini Pablo ña cája da sahá ña cán queá naçaxi tūhun da nuú dā sáhndá chuun nuú soldado ta xihín nuú soldado cán já cáchí dā já xihín ná:

—Tá ná quee dā jan cūhūn dā já queá ndihi saha ndó ini tañuhú —naçachi Pablo.

³² Anda já naçahan soldado cán naçahnda da rieta ndíco lancha loho cán já najándicava da dó ini tañuhú.

³³ Ta tá sa yati tiví yaa já najácahan Pablo tóco ndihi na cán ña ná cuxu na vatí loho. Já naçachi da já xihín ná:

—Sa nayaha sahun quiví co xíxi ndó ta ni co quíji ndo.

³⁴ Sahá ña cán xíca i ñamaní nu ndó ña ná cuxu ndó vatí chá va. Xíní ñuhú cuxu ndó já ná coo ndée ndo chindeé ndó mé ndó já ná cacu ndó. Jáchi cacu ndihí. Ta ni janda in túhún ijí jiní yo a ndíhi saha —naçachi Pablo xihín ná.

³⁵ Tá nandihí naçachi Pablo ña yóho xihín ná já natiin da in pan ta nu táhyí ndihí na cán nandiquiahva da ndixahví nu Ndióxi. Tá nandihí já naçahnda java da ña ta naçasáhá dā xíxi da. ³⁶ Xihín ña yóho nandindeé ri ini na java cán ta naçasáhá na xíxi na. ³⁷ Ta tóco ndihí nde, na naçañuhu ini barco cán naçacuu nde iví ciento uní jícó sahun in ñayivi. ³⁸ Tá nandihí naxixi nde ña cúni nde já naçata na trigo ini tañuhú já ná ndicama chága jata barco cán.

Cácoo barco çahá tañuhú

³⁹ Joo tá nativi yaa já naxini na ñundáhyi. Joo coó naçuu ndicuni dā cája chúun xihín barco cán ndá ñuu cúu á. Ta tá nandihí já naxini na ña ín ñutí nu yáji yuhú tañuhú cán. Anda já naçahán na jácayati na barco yati yuhú cán.

⁴⁰ Sahá ña cán queá naçahnda na rieta ndíco barco cán já najani dó. Ta naçandoo cāa gáncho ini tañuhú naçaja na. Ta tá nandihí já najánditayi na yitó nuú jahnda ta xihín

yíto cán naçasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín tachi. Ta xihín ña yóho naçasáhá barco cán cáyati dó yuhú tañuhú. ⁴¹ Ta in cuití naxinu barco cán nu ndíque táhan ivi táhnda tañuhú. Ta sahá ña naçayájí tañuhú nuú ñutí cán sahá ña cán queá naçatiin nuu barco cán. Ta ni loho ga coo naçuu cuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán queá naçasáhá cháchí dó. ⁴² Anda já nanducú soldado cahní ndihi da na cuahan vecaa ñuu Roma cán. Jáchi tiahva náa jítá na cuhun na nuú tañuhú ta cunu na cuhun na tá sa naqueta na yuhú tañuhú, cáhán na. ⁴³ Joo da sáhnda chuun nuú soldado cán coo nasahan da ñamaní ña ná caja na já jáchi cúni da jácacu da Pablo. Ña naçaja da queá nasahnda da chuun nuú na tiahva jítá ticuíí ña ná jácana na mé ná ini tañuhú cán já ná xinu na nu ñúhu. ⁴⁴ Ta na java, na co tiáhva jítá ticuíí cán naçachi da xihín ná ña ná ndaa na jata yíto á jata túhun barco cán já ná xinu na nu ñúhu. Anda jáví naxinu coo vaha tóco ndihi nde nu ñúhu.

28

Ín Pablo isla Malta

¹ Tá sa naxinu coo vaha ndihi nde yuhú ñundáhyi cán já naçandaa ini nde ña naní a isla Malta. ² Ta vaha ndivaha naçaja ñayivi ndúu isla cán xihín nde. Nandicahmi na ñúhu jáchi naçasáhá cúun ga javi ta a juú quiahva vixi xíní nde. Chí naçahan na xihín nde ña ná cativi nde catúní nde. ³ Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naqueta in coo tañu títo cán xínu rí sahá ña ihní ñúhu. Ta natiin rí ndáha Pablo. ⁴ Ta tá naxini na isla Malta cán ña ndícaa coo ndáha Pablo já naçasáhá cháchí xihín táhan na já:

—Ndá da sáhní ndii cúu da yóho jáchi vatí coo naxihí da ini tañuhú joo yóho cúni Ndióxi jándihi a saha dá — naxachi na.

⁵Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da. ⁶Tóco ndihi na cán ndátí na cuni na ña ná quihvi cuiñu ndáha dá á tá coo ta in cuití ndicava da quivi da, naxahan na. Ndátí na java cán cuni na ndáa ndoho Pablo joo tá sa naxanahá ndátí na coo ñaha ná ndoho toho Pablo cán. Anda já nandijama jiní ná ta nacasáha na cáhan na ña cúu dá in ndióxi.

⁷Yati nuú naxinu nde cán nasacuu a ñundáhyi da naní Publio, da cómi cuénta saha isla cán. Ta tixi uní quivi nandiquehe vaha ndivaha da ndehe ta vaha naxaja da xihín nde. ⁸Ta ndaja coo quihvi tátá Publio cándúhu dá ndóho da cuehe nij ta chícaan cáhni ñahá. Ta já nasahan Pablo naxito nihni da da ta nacasáha Pablo xíca tahví da nu Ndióxi saha dá ta naxinúu Pablo ndáha dá jiní dá ta já nandivaha da. ⁹Tá naxini java ga na quihvi ndúu isla cán ña naxaja Pablo já naquixi na nu dá ña ná ndaja vaha da na chí nandivaha na. ¹⁰Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quivi ndaa nde barco cuhun nde já nasahan na ña xíní ñúhú nde cuhun nde.

Xínu coo Pablo ñuu Roma

¹¹Nasanduu nde tátuhun uní yoo isla cán janda quiahva nandaa nde in barco, dó nasandati yaha tiempo vixi mé isla Malta cán. Mé barco cán naquixi dó chí Alejandría. Ta nuu do cándaa ivi tiniñu yúu ndióxi cája cáhnu na cán. In a naní a Cástor ta inga a naní Pólux. ¹²Naquee nde cuahan nde já naxinu nde in ñuu naní Siracusa ta cán nasanduu nde uní quivi. ¹³Ta naquee nde cuahan nde yati yúhu tañuhú janda quiahva naxinu coo nde ñuu Regio. Joo inga

quíví itaān já nacasáhá víí uun xícó tachi chí sur sahá ña cán queá tá sa nayaha ivi quívi já naxinu nde ñuu Puteoli. ¹⁴ Ta cán nanditahan nde java na cúú cuéntá Jesús. Ta nacañan na xihín nde ña ná canduu nde in semana xihín ná ta já nacaja nde. Ta tá nandihi já naquee nde cuañan sáhá nde chí ñuu Roma. ¹⁵ Ta na cúú cuéntá Jesús ndúu ñuu Roma cán sa ñañeñe ná tuhun ña xinu coo nde cán. Sahá ña cán queá naqueta na vaxi na ñeñe ná ndeñe. Java na naquixi janda ñuu nu sáhiin yahvi cáhnu naní a Apio ta java na naquixi janda ñuu naní Uní Taberna. Tá naxini Pablo na cán já nacasáhá ndíquiñhva da ndixahvi nu Ndióxi ta nandindacú ini da. ¹⁶ Ta tá naxinu coo nde ñuu Roma já nandiquiñhva da sáhndá chuun nuú soldado cán tóco ndihi da cuañan vecaa cán nuú in da cómi chuun saha mé vecaa ñuu Roma cán. Joo nasahan na ñamaní nu Pablo coo jíin da vatí nasacu na in soldado ndáá ñahá.

Cañan Pablo tuhun Ndióxi xihín na ñuu Roma

¹⁷ Tá sa naxinu uní quívi naxinu coo nde ñuu Roma cán já nacana Pablo tóco ndihi na sacuañan nuú na Israel ndúu ñuu Roma cán. Ta tá sa nataca ndihi na ndúu na já nacachi da já xihín ná:

—Candehé ndó, ñani i. Ni in túhún toho ñaha núu coo nacaja yeñe xihín na Israel mé ñuu Jerusalén cán ta ni xihín costumbre nacaja tásáñnu jícó yo. Joo ñatiin na Israel yeñe ta nandiquiñhva na yeñe nuú na cúú cuéntá gobierno ñuu Roma yóho. ¹⁸ Ta tá nandihi nandaja ndíchí na yeñe já nasacu ini na janí na yeñe jáchi coo ñañeñe ná cuachi i sahá ña cuu cahní na yeñe. ¹⁹ Joo ndaja coo na Israel coo naxeen na ña ná janí na cán yeñe. Sahá ña cán queá naxica i ñamaní ña ná cavií sahá i nu emperador ñuu Roma yóho. Joo yeñe co cuni toho i jácojo i cuachi jatá na Israel jáchi cúú ná na naquixi chichi nuú naquixi mí i. ²⁰ Sahá ña cán queá nacana i ndohó viti jáchi cuni cuni i

ndohó já ná nditúhún i xihin ndo. Cúni ndicani i nu ndo ña ndíco ndáha i xihin cadena yóho sahá mé a nachindahá Ndióxi jácacu a ndihi yó, na Israel —nacachi Pablo xihín na Israel cán.

²¹ Anda já nanducú ñehe na cán tuhun nu Pablo já cáchí na já xihin dá:

—A ñaha quixi carta estado Judea nuú nde ña cáhan sahá ña cájún. Ta ni na cúu táhan na Israel tá nandai cuu na ñuu yóho coó toho tuhun núu ñehe na ná casaa na nuú nde saha yóhó. ²² Joo cúni nde ña ná ndicanún nuú nde ndía cándúsún jáchi níi cúu ñuyívi cáhan núu ñayivi sahá na cúu cuéntá Jesús —nacachi na Israel cán xihin Pablo.

²³ Tá nandihí nasacu na in quívi cáhan Pablo xihin ná ta tá naxinu coo mé quívi cán nataca cuahá ndivaha ñayivi mé vehe nu íin Pablo cán. Ta naha ta janda sahini najánaha da nu ná ña cúni Ndióxi cacomí a cuéntá sahá ñayivi. Ta xihín ña nacahyí Moisés sanahá ta xihín ña nacahyí na profeta já nandicani da nu ná saha Jesús ña ná candeé ini na mé á. ²⁴ Java na cán nacandúsa na ña nacachi Pablo xihin ná joo java na coo naxeen na candúsa na. ²⁵ Ta sahá ña coo nacuu ndique táhan vaha tuhun na Israel cán sahá ña jánaha Pablo sahá ña cán quéa nacasáhá na quée na cuahan na. Tá naxini Pablo ña yóho já nacasáhá cáchí da já xihin ná:

—Mé a ndaa nacahan ínima yii Ndióxi nuú tásáhnu jícó yo tá nacahyí Isaías já:

²⁶ Cuáhán cáhan xihín ñayivi Israel jan já cachún já xihin ná:

Mé a ndaa táhyí cuni johó ndó joo a cándaa ini ndó.

Ta vatí sándehe ndó in ñaha joo co ndícuni ndó ña.

²⁷ Jáchi ihvi ndivaha cúu ini ndó ta co cúni ndó caja ndó ña cáchí i.

Ta co cúni ndó cuni johó ndó ña cáhan i xihin ndo.

Ta cō cúnĭ ndó ndicuni ndó ña cája ndó cuachi.
 Jáchi tá ná jándacoo ndó cuachi cája ndó,
 já quēa cuu caja cáhnu ini ĩ saha ndó,
 ta já cuu coo vaha ini ndó, já nacachi ínima yĭ Ndióxi xĭhĭn
 tásáhnu jícó yō.

²⁸ Anda já nacachi tucu Pablo já xĭhĭn ná:

—Ta viti xínĭ ñúhú candaa ini ndó, na Israel ña sa naxini
 johō na coó naquixi chĭchi Israel tuhun vaha saha Jesús.
 Ta cája ĩ cuéntá candúsa mé na cán ña —nacachi Pablo
 xĭhĭn ná.

²⁹ Tá nandĭhi nacahan Pablo ña yóho já nanditúhún
 cuehe xĭhĭn táhan na Israel cán ta já naquee na cuahan
 na.

³⁰ Nacandōo Pablo ĩvĭ ní cuia vehe nuú nachahvi ndojo
 da. Ta nandiquehe vaha da tóco ndĭhi na sahan xĭto nihni
 ñahá. ³¹ Ta ni cō yĭhvĭ da cáxi tuhun da xĭhĭn ñayivi ña
 cúnĭ Ndióxi cacomí a cuéntá saha ná. Ta najánaha da
 tuhun vaha saha Jesucristo, xitoho í ta ni in na coó nasaji
 nuu nu dá caja da ña.

Tuhun saá ña najándacoo Jesucristo nu yo: El Nuevo
Testamento en el mixteco de Silacayoapan
New Testament in Mixtec, Silacayoapan (MX:mks:Mixtec,
Silacayoapan)

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 14 Jun 2022 from source files dated 13 Jun 2022

7f2d3ecf-6d15-55a5-9081-6e970474df2f